

CIMELIA

Qu

4515

VI. b. 276


Teol. 4800.



4515

CIMELIA

X. i. 35.



VI. 6.

Y. IX. 566

N V N T I V S
S A L V T I S,

Siue

D E I N C A R N A T I O N E,
ad laudem Dñi nostri Iesu Christi,
eiusq; gloriosissimæ matris
honorem.

*Ad sereniss. Sigismundum III.
Poloniæ Regem.
Ecæt.*

Stanislai Socolouij, Canonici Cracouiens.
Sermones quinq;



C R A C O V I A E,
Ex Officina Lazari. Anno Domini,
M. D. LXXXVIIIJ.

III. Reg. cap. 2.

VENIT ERGO BETHSABEA AD REGEM
SALOMONEM, VT LOQVERETVR EI
PRO ADONIA, ET SVRREXIT REX
IN OCCVRSVM EIVS, ADORAVITQ. EAM,
ET SEDIT SVPER THRONVM SVVM,
POSITVSQ. EST THRONVS MATRI
REGIS, QVAE SEDIT AD DEXTERAM
EIVS.

Luc. 2.

FECIT MIHI MAGNA QVI POTENS EST,
ET SANCTVM NOMEN EIVS.



BIBLIOTH. UNIV.



JAGELLONICAN

Lim. Qu. 4515

AD SERENISS.
SIGISMUNDVM III.

Regem Poloniae, &c.

Stamislai Socolouii Canonici Cracouien,

PRAEFATIO.



*D*uplex fuit semper in omni religione ac Repub. sacrorum ac caeremoniarum ratio, duplexq; modus; aut enim publica sacra erant, aut priuata. Publica illa, quæ passim à toto & pro toto populo, publico sumptu, vno & simplici ritu peragebantur: Priuata, quæ singularum gentium ac familiarum erant, indeq; gentilitia dicebantur; unde illa duplicia sacrorum iura: duplices ritus ac caeremoniæ, priuatorum, inquam, & publicorum; de quibus cum aliàs, tum in Pontificalibus libris plurima. Quod idem est, fuitq; semper obseruatum, in ciuitate Dei, ac vniuerso Christiano populo. Sequitur enim hic sacra, religionisq; modum publicum: ubi vna communi forma & regula, eodem ritu, vno corde, vno ore, totus populus per vniuersum orbem fusus, ex eadem ab Apostolis profecta formula, locis & temporibus statutis, circumstantiis

A ij

item

item, cantu, hymnis, psalmis, ac verbis conceptis, Deum colit ac veneratur; nihil de suo addens, detrahens nihil. Officium id publicū, sacris ac ritualibus libris consignatum & notatum, vocant. Habent item singulae provinciae ac gentes, suos quosdam priuatos & peculiare ritus, priuata sacra & caeremonias, quas certis & definitis, quae à publicis sunt sacris libere, temporibus, nihil de publico cultu immutantes, aut cōtaminantes, sanctè & pie obeunt ac conseruant; ut ita & vna sit sponsa Christi: vna dilecta eius: vna columba eius: vnica matrisuæ; & nihilominus circumdata varietate: vnus cantus: vna pictura; sed variis coloribus & sonis distincta. Sunt hæc eadem omnia in hac ipsa nostra Sarmatia, hocq; ipso regno; quod tu diuinitus, cum propter alias præstantissimas tuas virtutes, tum præcipue propter eximiam pietatem, autæq; studium religionis, quæ paternis regnis, ipsiq; paternæ charitati, toties maximo animo antetulisti, nunc præhendis: & vtinam diutissime teneas. Amplectitur enim communem ecclesiæ catholicæ cultum, ab ipsis Apostolis inchoatum: à sanctis Patribus auctum & locupletatum: à sacrosancta Tridentina Oecumenica Synodo confirmatum & expurgatum: & vtinam constanter & concorditer sequatur. Sunt enim quidam homines inobedientes, suiq; ipsorum amantes; qui omnia contaminant, omnia miscent; ac
nisi

nisi quid de suo addant, morituros se putant: quibus id demum placet, quod publica auctoritate damnatur: id displicet, quod catholicum est, quod cum publica religione coniunctum, quod à summis ecclesiae capitibus iubetur: qui frugibus inuentis, glande vescuntur: qui ad ollas Aegypti iterum respiciunt: qui, dum veram & sinceram antiquitatem impugnant, maximos se antiquitatis zelatores esse putant: qui, quod antea priusquam damnatum & interdictum esset, despiciebant; hoc demum ubi publica auctoritate abrogatum est, sequuntur, laudant; hacque potissimum ratione, si inobedientes sint, obsequium se Deo praestare putant. Verum missos faciamus istos. Ut autem nos cum ipsum publicum cultum, de quo dixi, secuti sumus; ita & priuata quaedam sacra, & caeremonias à maioribus nostris sanctissimis & pientissimis viris institutas amplexi, firmiter persequimur, ac obseruamus. Multa quidem illa & varia; prout pietas gentis tum temporis tulit: maximè tamen ea, quae ad beneficium incarnationis, & conceptionis domini nostri Iesu Christi spectant, honoremque beatissimae matris illius pertinent, incredibili quadam deuotione complexi sumus: ac usque adhuc constantissimè inter tot haeresum ac impietatis fluctus tuemur. Summa illa utraque: nam incarnationis Saluatoris nostri beneficium illud est, in quo (ut inquit Damascenus) summe demon-

stratur, simul bonitas & sapientia, iustitia & potentia
 Dei atq; virtus. Bonitas quidem, quoniam non despe-
 xit proprii plasmatis operisq; sui infirmitatem; sed mi-
 sertus illius cadentis, ei benignam porrexit manum.
 Iustitia verò, quòd homine victo, non per alium, quàm
 per hominem, fecit vinci tyrannum. Sapientia, quòd
 rei difficilimæ curandæ inuenit modum ac remedium
 conuenientissimum. Adbæc potentia, siue virtus infini-
 ta: quidenim maius est, quàm Deum fieri hominem?
 Per eandem quoq; incarnationem omnium creaturarum
 partes in diuina persona eleuari voluit. Nam, cùm in
 vniuersa natura quatuor rerum gradus atque ordines
 reperiuntur: primus, non habentium vitam, vt lapidū:
 secundus, habentiū quidē vitam, sed sine sensu tamen, vt
 plantarum & virgultorum: tertius, viuentium vitā, sed
 sensitiuam tantū, vt brutorū: quartus, viuentium vita
 mentis & intellectus, vt angelorum, & hominum. hæc
 omnia in vno eodēque inueniuntur homine, & ideo
 à quibusdam μικρόκοσμος, id est, minor ac in compendi-
 um redactus mundus, appellari solet. Homo ipse, inquit
 Gregorius, nomine omnis creaturæ intelligitur. Dum
 igitur Deus homo fit, carnemq; assumit; omnium crea-
 turarum partes & ordines in sua persona extollit.
 Verùm in hoc loco omnis oratio infans & muta est.
 De virgine autem sancta, quid amplius dicam, quàm
 illam

illam ipsam matrem Dei esse, eamque benedictam prædicari ab omnibus generationibus debuisse? Quod futurum longè antè plena Spiritu sancto ipsa prædixit: Fecit enim illi magna, qui potens est, & sanctum nomen eius. Cuius orationes & merita, huius regni, contra tot feras & barbaras gentes, à quibus undique cinctum & obsessa est, propugnaculum ac peculiare quoddam præsidium esse, pius & acer quidā dixerat Hispanus: quā tamen non ut Deam, quod falsò hæresis mentitur; sed ut matrem Dei colimus ac veneramur. Docti enim sumus cælitus ab Angelo, eam benedictam esse inter mulieres, & benedictum fructum ventris eius. Memores illius Hieronymi: Nulli dubium esse, quin totum ad laudem & gloriam pertineat Dei, quicquid dignè genitrici suæ impensum fuerit. Et Bernardi similiter: Quicquid in laudibus matris proferimus, ad filium pertinere. Et rursus: Cùm filium honoramus, à gloria matris nos non recedere. Et quamvis hanc ipsam sacrorum partem de qua dixi, quotidie sanctè & piè obeamus, eaque utamur; maxime tamen, & præcipuo quodam cultu, illo ipso sacro aduentus tempore, quo idem argumentum tractat ac recolit vniuersa ecclesia, id facitamus. Idque ea ratione & modo. Noctu ante lucem congregatur in ecclesiam frequens populus; noctis illius & tenebrarum, in qua ante incarnatū verbum ver-

saba-

fabamur omnes, rationem omnem, & conditionem designans. Accenduntur varia et multiplicia lumina, lumen naturæ, philosophiæ, et legis scriptæ referentia: quæ, etsi utcunque in ea regione umbræ mortis lucebant, diem tamen non efficiebant; nondum enim erat orta lux vera, quæ illuminat omnem hominem venientem in hunc mundum. Etsi enim, inquit Clemens Alexandrinus, omnes stellæ luceant; dies tamen non est, ubi ipse sol non exoritur neque lucefcit. Prophetiæ itē, desideria ac gemitus patrum leguntur, ac recensentur, roris cælestis irrigatio (unde sacro Rorate nomen est) Isaïæ verbis cælitus imploratur: Rorate cæli de super, etc. Non, quòd nouum (ut impudenter hereses calumniantur) cum Iudæis Mesiam expectemus; sed ut pro præteritis beneficiis æterno Patri gratias agamus: & ut nunquam tanti beneficii ex animis & ore hominum decus ac memoria excidat. Lectiones tam noui quàm veteris testamenti, quibus summa incarnationis verbi continetur, clari & illustri voce ad populum recitātur: hymni, & psalmi cantantur: eodem ferè modo, quem iam Traiani temporibus vsitatum fuisse populo Christiano, ipse non Christianus Plinius minor refert; qui eos stato die ante lucem conuenire; carmenq; Christo, quasi Deo, dicere secum inuicem; seque sacramento, non ad scelus aliquod, obstringere; sed ne furta, ne latrocinia, ne ad-

ne adulteria committerentur; ne fidem fallerent; ne depositum appellati abnegarent, *Triano* scribit. Ad quam tam raram, tam illustrem, tam piam *Panegyrim* exorandam, cum alii alia conferant: aurum alii: sacrum vestem alii: thus & cereos nonnulli; ipse pro mea tenuitate, hacq; afflictâ valetudine, flores fero: in honoremq; *Christi* incarnati, eiusq; beatissimæ matris, quasi ex voto, hoc ipsum ex doctissimorum patrum hortis decerptum ac contextum sertum, & coronam, illi dico: hanc tabulam & anathema in templo eius religiosè suspendo; precibus & meritis illius me, caputque meum afflictum commendans. Te autem, *Serenissime Rex*, potissimum compellandum cum talibus donis esse duxi. Primum, ne ad tantum regnum prebendum venientem, vacuis manibus salutem: sed ut, vel flores, & ramos ipsos in illius occursum spargam. Deinde, quod hæc talia munera, regem adolescentem maxime exornent, atque commendent, si tali corona se, temporaq; sua redimiat, ac in lege Domini meditetur die ac nocte. Et quod rei caput est, quod eorum sacrorum cum multis alios præclaros *Duces*, tum præcipue maiores tuos viros diuinos habeamus; ac imprimis illum immortalis memoriæ virum *Auum* matrum tuum *D. Sigismundum primum*: qui & ipse beatissimæ virginis *Mariæ* studiosissimus, honorisq; illius

B obser-

obscrutissimus fuit: qui in summo ac principe Regiæ
 suæ templo, pro amplissimis ex multiplici genere hosti-
 um, Moscis, inquam, Tartaris, Moldauis, Prussis
 victoriis, aliisq; felicissimis regni sui successibus, varia
 monimenta, & quasi trophæa quædam ad omnem po-
 steritatem erecta, reliquit. Inprimis autem illud admi-
 rabili opere, marmore vario, auro & gemmis pretiosis,
 incredibili sumptu, celeberrimum sacellum, in honorem
 eiusdem beatissimæ virginis extruxit; quod inter septē
 illa, quæ mundus dilaudat miracula, referri iure possit:
 honestissimorū sacerdotum collegium fundauit: canto-
 res ac muscos omnis generis instituit: ad Mausoleumq;
 & urnam suā quotidie perpetuis temporibus hoc ipsum,
 de quo diximus, sacrum, antelucano tempore, variis
 ac multiplicibus sonis, & concentibus celebrari iussit.
 Eiusdem deuotionis habemus ducem etiam hanc ipsam
 Annam Iageloniam Materteram tuam, fœminam le-
 ctissimam ac pientissimā; quam Deus omnipotens regni
 huius temporibus necessariis vsq; adhuc seruare digna-
 tur, & utinam, quàm diutissime seruet: quod regnū illa
 precibus continuis, studio & meritis suis, iuuare nun-
 quam desinit: quam Deus in eum honorem crescere
 fecit, ut regis filia, & soror, & coniunx simul esset;
 & nunc duplici regno auctum nepotem videat. Neque
 quorumq; regum; sed illorum, ex quibus pater quidem
 illud

illud aliquādo testimonium retulit: Non surrexisse maiorem Regem in diebus suis. Maritus autem propter virtutis & industriæ magnitudinem, nedum quidem par dignitati suæ clogium inuenit, nec ita facile inueniet. Quæ quidem Anna, Deum immortalem, quantum eundem ipsum locū, de quo locuti sumus, auxit & exornauit! Magnam partem fortunarū ornatusq; sui regij ad eum illustrandū cōtulit: latum & diuitem fundum addixit: vasa pretiosissima intulit: vestes, in quibus ars cum materia certat, admirandas cōpamuit; ut quod apud externas gentes in hoc genere miremur, nihil nobis amplius reliquisse videatur. Te quoque ipsum præstantissime Adolescens, miro studio matris Dei teneri ab omnibus audimus, & gratulamur: quod ut porrò etiam atque etiam facias: ac quemadmodum regni, ita & sacrorū hæres succedas, in eademq; sacra transeas, obsecramus. Quod tamen iam à primis cunabulis te fecisse, ac etiam nunc omisis hæreticorū fraudibus, constantissimè tueri cognouimus. Quod reliquū est, pietatem ante omnia colas: bona studia, eorumq; cultores diligas: voluptatem, in cuius regno nullus est locus virtuti, fugias: res gere, intende prosperè, procede, & regna.

CAVSÆ CVR DEVS HOMO.

Ex libro de incarnatione D.

Athanasii.

CAusam igitur eius in corpore apparitionis, aliqua ex parte (quatenus licuit, & quatenus assequi datum fuit) iam antè exposuimus; non fuisse videlicet vllius alterius officium, corruptibile in incorruptibilitatem transmutare, nisi ipsius saluatoris, qui in principio ex non entibus omnia condiderat: neque fuisse vllius alterius opus, exemplar imaginis diuinæ hominibus restituere, nisi eius qui erat imago Patris: neque alterius, mortale immortale efficere, nisi eius qui ex se ipsissima vita est, hoc est, Domini nostri Iesu Christi: neque ad alium quempiam pertinuisse de Patre docere, & idololatriam purgare, nisi rationis verbiq̃ue, omnia in mundo gubernantis, qui solus Patri suo verus & vnigenitus Filius est. Quando quidem igitur debitum pro omnibus soluendum erat, debebatur autem (vt iam dixi) vt omnes morerentur; quæ causa illi potissima fuit huc proficiscendi. Ideoq̃;
post

post edita perfecta diuinitatis suæ monumen-
ta, reliquum iam erat, vt pro omnibus sacrifi-
cium offerret: pro omnibus templum suum
morti tradens; quò omnes inobnoxios, & li-
beros à veteri prauaricatione efficeret: seq;
declaret mortis victorem, suumque
corpus immortale redditum, pri-
mitias publicæ omnium
resurrectionis
esse.

B 3 Capita

Capita rerum, quæ in hoc opusculo adumbrantur.

De incarnatione.

De gratiarum varietate.

De titulis B. Mariæ.

De prærogatiuis eiusdem ante omnes res creatas.

De salutatione Angelica.

De votis & virginitate.

De ministerio & discretionem spirituum.

De nomine Iesu.

De throno David.

De vera humanitate & diuinitate Christi.

De vera præsentia Iesu Christi, tam in vtero virginis, quàm sub speciebus panis & vini in Eucharistia.

De eo quatenus sit progrediendum in per-
scrutatione diuinorum.

Nuntius

Nuntius Salutis,
Siue
DE INCARNATIONE,

Ad sereniss. Sigismundum III.

Regem Poloniæ.

& cæt.

STANISLAI SOCOLOVII.

Sermo Primus.



ERTAMVS ERGO
aratum, idemque iteremus
nouale, ac nouam inchoemus
vertentis anni agriculturam.
Redit enim hoc tali tempo-
re ecclesiæ populoq; Chri-
stiano nouum. ver: noua a-
ratio: noua cultura; vnde il-
le solet inchoare sua omnia. Hinc rem diuinam, sa-
cro sanctumq; altaris cultum: hinc sacerdotum pre-
ces, ac supplicationes: hinc cæremonias: hinc de-
nique eam, quæ ad populum fit doctrinam, orditur.
Cuius quidem sui instituti idem facit fundamentum,
quod & totius salutis initium est; Incarnationem sci-
licet, ac descensum de cælo, Dñi nostri Iesu Christi:
qui, cum in forma Dei esset, non rapinam arbitra-
tus

tus est esse se æqualem Deo: sed formã serui accepit: & habitu inuentus vt homo. Et merebatur quidem hoc tale beneficium, quod tantum est, vt nullo vnquam temporis spatio satis laudari ac prædicari possit; vt solùm toto celebraretur anni decursu: nisi cætera quoque, quæ ex primo hoc & summo promanant, beneficia, aliquã sibi meritò eiusdem temporis vendicarent partẽ. Quemadmodũ enim nulla pars præteriti antè incarnatum verbum æui fuit, quo nõ tot signis, figuris, cæremoniis, vaticiniis, votis, ac desideriiis, hoc tantum testatum ac repræsentatum arcanum esset; sic eodem modo, & longè magis sequenti omni ætate, in omnem æternitatem nunquã eius memoria ac veneratio ex piis pectoribus debuit aboleri. In huius spe ac expectatione Adã & Eua, primi parentes nostri, æuo & laboribus fessi, quietè & iucundè dormierunt: in huius desiderio Noë aquas diluuii superauit: in huius fide, pater omnium credentium Abraham, contra spem in spem credidit, filium suum obtulit, in eiusque die exultauit: in huius amplexu Iacob collectis pedibus suis mortuus est, illo vitæ suæ epilogo factò: *Expectabo salutare tuum Domine.* addit Rabi Ionatas in suo Thargumo: Non expectabo salutare Gedeon filii Ioas, quæ est salus temporalis; neque salutare Samson filii Manuë, quæ est salus transitoria; sed

sed expectabo salutare Messiae filii David: hunc expectat anima mea, donec veniat desiderium collum æternorum. Huius aduentum desiderat Moyses: *Mitte Dñe quem misurus es.* Et Davidis quidem Exod. 13. illa violentiora vota sunt: *Inclina cælos tuos Domine, & descende.* Psal. 143. id est, sublimitatem tuam, quæ humiliari non potest, magnificè humilia: Deusque perfectus existens, perfectus efficiaris homo. *Utinam disrumperes cælos.* (si ea vis illorum est, ut te arceant) *& descenderes.* *Ostende nobis Domine misericordiam tuam, & salutare tuum da nobis.* Pf. 84. & 79. *Excita potentiam tuam, & veni ut saluos facias nos.* *Deus conuerte nos: ostende faciem tuam, & salui erimus.* Isaias similiter: *Rorate cæli de super.* id est, benignum rorem fundite, illum, inquam, de quo paulò post: Spiritus sanctus superueniet in te, & virtus altissimi obumbrabit tibi. *& nubes pluant iustum, aperiatur terra & germinet saluatorem.* Isa. 45. *Ubi est zelus tuus & fortitudo tua? ubi multitudo viscerum & miserationum tuarum?* Luc. 1. David eodem modo: *Tu exurgens miserere Sion, quia tempus miserendi eius, quia venit tempus.* Psal. 101. Et Daniel: *Exaudi Domine, placare Domine, attende, & fac ne moreris propter te ipsum.* Dani. 9. Ut igitur nulla pars præteriti, ut diximus, temporis fuit, quo non tantum beneficium coleretur: ita certè nulla eodem modo in posterum esse debet, in qua

pro tam eximio munere non suæ debeant institui gratiarum actiones. Quod fecit facitque semper, non vno aliquo die, sed omni planè, potissimū autem hoc sanctissimo, huic ipsi rei dicato, aduentus tempore, Christianus populus; non quod cum Iudæis, vt hæresis mentitur, nouum Messiam expectet, nouaq; pro venturo instituat vota; sed, vt pro quaesito iam beneficio gratias agat: eiusque sempiternam memoriam reuocet: desideria patrum repræsentet, indeque se ad maiorem gratitudinem excitet. Quod ecclesiæ sanctæ institutum secuti, & nos hoc idem agemus: in eodemque incarnationis argumento, quantum homini licebit; cum timore tamen & tremore versabimur. Quid enim aut sublimius, aut vtilius, tali tempore tractari possit, non videmus: namq; hoc argumentum, fert Dei cum hominibus coniunctionem: adoptionis nostræ dignitatem: imaginis reformationem, ac in melius profectum: in cælos exaltationem, atque ascensionem. Verùm cum hæc humeris mortaliū sublimiora sint, nefasque tanta, mysteria homini curiosè scrutari: nefas seruum arcana secretioris cubiculi ingredi; ideò & nos ea sola in medium adferre in hoc genere duximus, quæ cælitus ab ipso Deo, per summum Angelum matri Dei, quæ tanti operis instrumentum, & arca sanctissima fuit, ex superna curia
allata

allata ac explicata, nobisque hoc tempore ab ecclesia proposita sunt. Quis enim aut maiora aut certiora tentare aufit? nullus locus hinc humano relinquitur ingenio, nullus experimento; ex sola diuina pendent hæc omnia operatione atque virtute: parumque pudici pectoris est, plura velle posse in hoc genere cognoscere, quam aut cælesti nuntio, aut ipsi matri impertitum est. Quod his creditum non fuit, credetur profectò nemini: aut quod isti non capiunt, quis capiet? *Quod natum*, inquit Hieronymus, *non habuit, usus nesciuit, ignorauit ratio, mens non capit humana; pauet cælum, stupet terra, creatura etiam miratur omnis cælestis, hoc totum est, quod per Gabrielem Mariæ diuinitus nunciatur, & per Christum adimpletur.* hacque cælesti legatione ac nuntio tota redemptionis summa, vt inquit Beda, continetur: cælum aperitur: terra regem vniuersi clanculum excipit: miserationum Pater humanam deformitatem vnico filio suo despondit: Pater omnis gloriæ humani generis misertus: corruptam in Adamo naturam, propitius intuitus est: *Misericordia & veritas obuiauerunt sibi mutuò, iustitia & pax osculatae sunt.* Neque tamen hoc solùm nunc cælitus adfertur, quod tamen ipsum per se ingens est, matrem virginem, verbum carnem, Deum hominem factum esse; sed summa simul totius fidei nostræ (quæ ad-

Psal. 84.

Lucæ 1.

huc orbem latuit) cælitus ab Angelo mundo credenda admirandaque proponitur, vnius, inquam, & trini Dei clara & distincta confessio, illis Angelicis verbis: *Spiritus sanctus superueniet in te, & virtus altissimi obumbrabit tibi: & ideo, quod nascetur ex te sanctum, vocabitur filius Dei.* Vbi cernis virtutem altissimi, spiritum sanctum, filium Dei, clarè & distinctè, vt nunquam antea, nominari, ac toti orbi terrarum, vnius & trini Dei fidem & doctrinam cælitus promulgari. Magni igitur nuntij tempus, summæ legationis mysterium est: tamen ad maiestatem tanti argumenti illud sufficit, quod Athanasius caput negotij esse dicit, nempe, hîc de filio Dei, eiusq; de cælis in terrâ descensu agi. Quo loco liceat mihi poëtæ christiani verbis, Spiritum sanctum tanta mysteria & obumbrantē, & aperientē alloqui.

*Qui mare, qui terras, qui cælum numine complex
Spiritus alme tuo; liceat mihi munere regem
Bis genitum canere, è superi qui sede parentis
Virginis intactæ grauidam descendit in aluum,
Mortalesq; auras hausit puer; vt genus vltus,
Humanum eriperet tenebris, & carcere iniquo
Morte sua, manesq; pios inferret Olympo.*

Te verò sancta parens, principis veteris Graciæ
Theologorum Gregorij verbis alloquar.

Vene-

Gregori. in
Christo pa-
tiente.

Veneranda, ô virgo casta, felicissima,
Quando beata nunc beatorum in polo,
Exuta quicquid fecis humanæ, sedes
Æternitatis pallio ornata, ut Dea
Habita, senectæ expers; supremo ex æthere
Benigna adesto vocibus meis : preces
Admitte, virgo ô inclyta, hîc quando tibi
Verbi parenti, sed supra modum tamen,
Legemq; solus inter omnes contigit
Honor. Ego fretus his, tibi me audentius
In verba supplex offeram, & suauissimo
Contextam ab horto, qua tuum exornem caput
Coronam, ô domina proferam ; ut quæ gratia
Modum supra omnem, me tua semper leuans,
Me genere quouis casuum eruis omnium :
Hostes apertos, quodq; longè maius est,
Illos latentes, machina qui me petunt
Auertis.

Septuaginta igitur hebdomadibus notissimis illis, Dan. 9.
super genus mortale abbreviatis, ut inquit Dani-
el, vbi tempus cunctis desideratum seculis, atq; gen-
tibus aduenisset : ut consumaretur præuaricatio : ut
finem acciperet peccatum : ut deleatur iniqui-
tas : ut adduceretur iustitia sempiterna : ut implere-
tur visio & prophetia, & vngeretur sanctus sancto-
rum (quod quidem totum tempus pædagogum ad

conuerſionem vocat Damascenus ; vt cognōſceret mundus, quanta vis ſit peccati : quanta iræ diuinæ grauitas: quanta ſæueritas vindictæ.) designat pater omnipotens nuntium & legatum, cum tot deſideriis expectato nuntio, ad virginem Ieſſæo ſemine oriundam, nouam ſcilicet progeniem cælo demittendam alto, Deum ex cælo : Deum in vtero virginis : Deum hominem : Deum ſuper terram : Deum inter homines ; eius autem cæleſtis germinis, non aliam quàm eam ipſam, ad quam nuntius mittitur, virginem futuram matrem. Cuius tam rari, tam noui nuntij, ac legationis, Lucas Euangelifta, rationem & ſeriem hunc in modum deſcribit ; vt primùm ipſius legationis, atque nuntij expeditio, ac circumſtantiæ deſcribantur omnes; deinde ipſa legatio, eiusq; perfunctio; demùm effectus ipſe. Quibus partibus tribus vniuerſa huius legationis ratio concluditur, quod totum quale ſit, paucis expendamus. Primùm igitur ſummam omneſque circumſtantias ipſius legationis cōſideremus, in qua nulla pars relinquitur eorum adiunctorū, quibus maximæ legationes conſtare ſolent ; temporis, inquam, loci, perſonarum, mittentis, & eius qui mittitur, & ad quam fit miſſio : quæ ſingula qualia ſint, diligentius videamus. *In menſe igitur ſexto, ſextæ & vltimæ ætatis,* poſtquā prægnaſ effecta Elizabeth, Ioannesq; futu-

futurus præcursor domini conceptus est: mense Martio, quo item totam vniuersitatem rerum constitutam, hominemque primum creatum esse, testatur Athanasius: quo eodẽ tempore, sexta diei hora, hic ipse nasciturus Emmanuel, vt ita vltima respondent primis, mortuus est: *Mittitur Angelus Gabriel* Lucæ 1.
à Deo in ciuitatem Galilææ, cui nomen erat Nazareth, ad virginem desponsatam viro, cui nomen erat Ioseph, de domo David, & nomen virginis Maria: vt quondam missus est serpens ad desponsatam Adæ, cui nomen erat Eua, illudque Isaia impletur: Sicut Isai. 66.
cæli noui, & terra noua, quæ ego facio stare coram me, dicit dominus: sic stabit semen vestrum, & erit mensis ex mense, sabbathũ ex sabbatho: veniet omnis caro vt adoret coram facie mea. Mittitur autem Angelus, non seipsum ingerit, quod malignorum spirituum & hæreticorum est proprium: mittitur in ciuitatem Galilææ, quæ confinis tam Iudææ quàm gentibus fuit: quia vtrique genti, hic ipse puer salutem allaturus, adueniebat. In ciuitatem, cui nomen Nazareth: quod nomẽ à separatione, custodia, sanctificatione, flore deducũt docti. Conueniebat enim florem ex radice Iessæo, ex virga rectissima, & sine omni nodo fœcundissima oriundum, in florem cælitus demitti; eum qui natura sanctus est, in loco sanctificationis concipi: florem, inquam, pulcherrimum:
florem

florem suauissimum : florem saluberrimum : florem
 cordis ipsius omni lilio nitidiorem : omni rosa pul-
 chriorem : omni balsamo fragrantiozem. Qui qui-
 dem flos, in conceptione floruit : in natiuitate ap-
 paruit : in passione emarcuit : in resurrectione re-
 floruit : fructum dabit in gloria. Voluit autem Deus
 nuntium præcursoris Ierosolymis in templo, filij au-
 tem sui in Nazareth vili oppido, in abdito virginis
 conclauis explicari ; non quòd in ea legatione ali-
 quid stultum mundi contineretur, vt putat rei tan-
 tæ deprimendæ studio. Calvinus, (sunt enim hîc am-
 plissima omnia) sed Oeconomix potius causa. Pri-
 us enim aurora exoritur, quàm sol ipse in publicum
 se profert : prius vox sonat, quàm verbum prodit :
 prior & notior præcursor & προδρομος suo rege te-
 stis, illo, cui testimonium reddit. Tum quod tanta
 eius legationis sublimitas esset ; vt eius cognoscen-
 dæ populus subito capax esse non posset. Nam si Za-
 charias ad nuntium de ortu Ioannis filij obstupuit ;
 si virgo nunc turbatur ; quid multitudo imperita in
 tā incredibili ac inopinato fecisset nuntio ? Mittitur
 aut non quiuis *Angelus*, sed Irenæo quidem Archan-
 gelus Dimiurgi : Andrea Ierosolymitano, vnus è
 præcipuis Angelis : Cedreno, Angelorum princeps,
 maximam diuinitatis lucernam, & totius orbis non
 occidens luminare ; ad arcanorum futura mysteria
 intro -

introducens : Pantalæoni, diuinissimus Angelus ab omnipotente missus, pronubus verbi, gerendi belli præpositus : Gregorio, summus Angelorum summa nuncians : Bernardo, nuntius cum Deo & homine : Theophilacto, Deum & hominem ipso nomine sonans. Dignum autē erat, inquit Gregorius, ad hoc mysterium summum Angelorum venire, qui summum omnium venire nuntiabat. Mittitur *Gabriel*, id est, fortitudo Dei; qui dominum virtutum, potentem in prælio, accinctum gladio, venire nuntiabat : & qui eam generationem prædicebat; quæ omnem vim naturæ excedens, ipsius virtutis & fortitudinis diuinæ opus esset. Idcirco enim, inquit Gregorius, Angeli priuatis nominibus censentur; vt fingetur per vocabula, etiam quod in operatione valeat. Neque enim in illa diuina ciuitate vllis nominibus opus habent; in qua ex natura & luce diuina, non ex nomine, cognoscuntur. Itaq; ille, qui curandi Tobia causa missus fuerat, Raphaël, hoc est, medicina Dei dicitur: quemadmodum hic, qui virtutis partum nuntiat, virtus & fortitudo appellatur Dei. Mittitur autē, a Deo ipso, non ab aliquo superiore Angelo, (quod tamen aliquando factum esse legimus) ne cui vel beatorum spirituum, antequam virgini suum Deus reuelasse putetur consilium; vt noua gratia, noua liberalitas & munificentia soli vir-

D

gini

gini primùm declaretur. Effecerant enim primi parentes nostri, per illud familiare cum Diabolo colloquium, vt à diuino consortio & contubernio excluderentur. Itaque per multas quasdam ambages, locutus est Deus cum hominibus; nunc ipse sine omni medio, suum mittit ad virginem nuntium. Mittitur autem à tota trinitate hic nuntius, cuius omnia opera, in his quæ extra operatur, communia sunt. Nam & patri incumberebat prouidentia, de filio sponsaque ac genitrice eius: & ipsi filio de templo & tabernaculo suo: & Spiritui sancto tanquam paranymphe & obltetricanti de nouo & inusitato partu. Sed quomodo mittitur à Deo, si Dominus (vt paulò post dicet Angelus) cum illa est? Quia quæ à Deo sunt, ordinata sunt: & quæ ipse potest per se præclare perficere; illa per media facere solet. Ille ipse ægros curat; sed manu medici: ille terras fecundat; sed opere agricolæ: ille victorias dat; sed sudore & labore militis: ne eorū tantum quæ alienæ actioni subiecta sunt, & non agunt; sed & eorū, idq; multò magis, quæ agendi vi sunt prædita (quod docebat Plotinus) sit Deus & Dominus; quod hæretica Babylon, vel non videt, vel videre non vult. Mittitur autē Angelus, ad angelicam vitam ducētē; vt sit conueniens nostræ reparationis principium nostræ perditionis principio: vt scilicet Angelus à Deo
ad vir-

ad virginem partu consecrandam diuino mitteretur: quemadmodum olim à diabolo serpens missus fuit ad virginem Euam, nostri fundi calamitatem, spiritu superbiæ decipiendam. Proinde illa serpenti credens libidine corrupta est; hæc Angelo credens virgo seruatur: vt filij Euæ, qui ex corrupta nascerentur corrupti; per filium virginis, qui ex incorrupta natus est, saluarentur, liberarentur, & sanctificarentur. Quod præclare explicat Irenæus: *Seducta est male, inquit, illa, quæ iam viro destinata erat virgo Eva: per veritatē euangelizata est bene ab Angelo iā sub viro virgo Maria. Quemadmodū enim illa per Angelicū sermonem seducta est, vt effugeret Deū, præuaticata verbum eius; ita & hæc, per Angelicum sermonē euangelizata est, vt portaret Deum, obediens eius verbo: & sicut illa seducta est, vt effugeret Deum; sic hæc suasa est obedire Deo, vt virginis Euæ, virgo Maria fieret aduocata. Addit Epiphanius: Eva mortis causa facta est hominibus; per ipsam enim mors ingressa est in mundum: Maria verò causa vitæ, per quam genita est nobis vita, & per hanc filius Dei accessit in mundum: & vbi abundauit peccatum; ibi superabundauit & grātia; vt vita pro morte fieret: & qui per mulierem nobis vita factus est; mortē ex muliere indutam excluderet: & quoniā illic Eva; cū adhuc esset virgo, per inobedientiā transgressa est; è contrario per*

virginem obedientia gratia facta est, annuntiato aduentu in carne de cælo, & vita æterna. Mittitur autem ad virginem hic talis nuntius, non frustra, sed magnas & graues ob causas: partim vt prius mens virginis verbo instrueretur, quàm illud carne conciperet; felicior enim fuit virgo percipiendo fidem Christi, quàm concipiendo carnē eius, inquit magnus Augustinus: partim vt possit esse certior testis tanti sacramenti, de quo est diuinitus instructa: partim propter spontaneum & voluntariū consensum; sine quo nec bonum nec malum quicquam potest esse; & sine quo Deus nihil in homine operari solet: contraquàm falsò iudicat hæresis: partim vt ostenderetur hoc ipsum esse quoddam spirituale matrimonium, inter filium, inquam, Dei, & humanam naturam, cuius per hoc & tale nuntium expectabatur consensus, virgine, loco totius humanæ naturæ, consentiente, ac beneficium cæleste submissè, ac reuerenter amplectente. Mittitur ergo Angelus ad virginem: virginem, inquam, mente, & animo: virginem affectu & proposito: virginem voto: virginem corpore, & sensu: virginem sermone: virginē moribus, ac omni vita & opere. Cuius dotes & laudes, cum vna aliqua, aut oratione, aut imagine; neque scriptura, neque ecclesia, neque sancti patres, dignè exprimere potuissent: illa multiplici imagi-
num

num, adiunctorum & similitudinum congerie exprimere conantur; dum illam *matrem pulchræ dilectionis*, propter excellentiam & dignitatem vocant: *electam* ut solem, *pulchram* ut lunam, propter singularitatem atque claritatem: *cupressum*, *cedrum*, *palmam*, *lignum paradysi*, *aciem ordinatam*, propter robur, diuturnitatem & stabilitatem: *lilium*, *rosam*, *florem campi*, propter candorem & odoris fragrantiam: *puteum aquarum*, *fontem signatum*, *hortum conclusum*, *virgam Aaron*, propter foecunditatem: *rubum ardentem*, *nusquam tamen adustum*, *speculum sine macula*, *vellus Gedeonis*, *arcum fœderis*, *portam clausam*, *soli Deo apertam*, propter puritatem & integritatem: *ciuitatem Dei*, *portam cæli*, *thronum & arcam Dei*, *domum excelsi*, *templum sanctum*, *aulam regis*, *thronum Salomonis*, *cælum gaudij*, *montem obumbrantem*, *montem Dei pinguem*, *coagulatum*, *montem iucundum*, *montem in quo Deo habitare placuit*: *candelabrum aureum septem lychnorum*, *turrim Dauid*, propter Dei in ea residentiam: *arcam Noë*, *præsidium ac portum salutis*, *stellam maris*, propter confugium. Adde illam innumerabilem, quæ à sanctis patribus ei tribuuntur epithetorum copiam: *triclinium trinitatis*: *sacrarium spiritus sancti*: *cæleste tabernaculum Dei*: *mysticarum secretarium nuptiarum*: *sponsam trinitatis*: *parentem parentis*: *fontem*

tem fontis viui: originem principij: creatoris matrē:
 incircumscripti circumscriptionem: nutricem om-
 nia nutrientis: cuncta comprehendentis compre-
 hensionem: gestatricem eius, qui suo verbo portat
 vniuersa: paradysum secundi Adami: sanctam vir-
 ginitatis tellurem, ex qua nouus Adam, noua ficti-
 one formatus est, qui veterem saluti restituit for-
 mam: matrem viuientium: gloriam luti nostri: præ-
 claram naturæ nostræ coronam: solis gloriam: fon-
 tem lucis, omnem hominem illuminantis: solis or-
 tum, nullum ferentis occasum: abyssum gratiæ: ma-
 re curationum: mare spiritale: gratiarum pelagus:
 arcum foederis: vitem veritatis foecundissimam, &
 quoâd virginitatem nunquam vindemiatam, nec
 vnquam manu humana fossam: nubem cælestem
 Spiritu sancto coruscantem: sacram & animatam
 arcam Dei viuientis, manna cæleste continentem:
 aurum purum: thronum Cherubico splendidio-
 rem: cathedram Cherubicam: lucernam ardentem: vr-
 nam auream: animatum altare panis vitæ: cliba-
 num intellectualem, qui panem vitæ peperit: sacrū
 Dei fermentum: thesaurum dispensationis: arma-
 rium vitæ: Dei splendidissimum & luculentissimum
 vas: admirabile opus excelsi: purpuram regis: tē-
 plum maius cælo: volumen nouum, in quo ineffa-
 bile Dei verbum inscriptum fuit: purificantis car-
 bonis

bonis forcipem: hortum virentem salutis: pratum
totius fragrantie Spiritus sancti: hortum deliciarum:
agrum amplissimum: speciosissimi floris radicem:
Bethleemicam illam cisternam, quam veluti vite re-
ductricem David desideravit: telam, ex qua, & in
qua ineffabili quodam modo admirabilis illius vni-
onis tunica est contexta: Angelorum gloriam: morta-
lium vitam: fidelium facem: virginem virginum:
matrem matrum: in mulieribus virginem beatissi-
mam: restaurationem feminei sexus, quia per ipsam
à ruina patrie maledictionis sunt subtractæ: pretio-
sam margaritam orbis terrarum: coronam virgi-
nitatis: consolationem infirmorum: redemptionem
captiuorum: liberationem damnatorum: salutem v-
niuersorum: dulcedinem credentium animarum: v-
nicum leuamen molestiarum: omnium cordis do-
lorum medicamentum: lætitiæ organum: immensum
cælestis gaudij genitricem: matrem filij vbique re-
gnantis: matrem & virginem: matrem vitæ: ma-
trem gratiæ: matrem misericordiæ: mundi reginam
& dominam: regenerationis heram: sceptrum recte
fidei: magnum miraculum ecclesiæ, decus, gloriam, &
firmamentum: contemplatiuæ cognitionis intellectu-
ale speculum: dioptram perspectiuam, per quam Dei lu-
men perspicitur. His illa epithetis & aliis multis ab
Athanasio, Ephrem, Cyrillo, Epiphanio, Augustino,
Ambro-

Ambrosio, Gregorio, Bernardo, Andrea Ierosolymitano, Epiphanio, Hesychio, Chysippo Ierosolymitano, Methodio martyre, Pantalæone, Damasceno & aliis insigniri solet. Sed & Rabini non obscurioribus epithetis, hanc regis Messie matrē honorârunt. Hanc enim petram primariam vocant, ex qua veluti excidendum esse Messiam, prædixit Daniel: hanc primam creaturarum in humano genere, primumque hominem à peccato prorsus immunem: hanc prophetissam, quæ cuncta præ cæteris norit, omniumque prophetarum dominam & magistrā: hanc abacū Dei, in quo gloriā maiestatis suæ mortalibus cunctis ostenderet, appellant. Quorum quidem attributorum illam rationem adfert magnus Athanasius: *Quandoquidem ipse rex est, qui natus est ex virgine, idemque & Dominus & Deus; eapropter & mater, quæ eum genuit, & regina, & domina, & deipara propriè & verè censetur: licebitque nobis ita congruenter dicere, dum ad ipsam, & ad eum, qui ex ea genitus est carniferum filium, respicimus. Fenestra cæli, quia per ipsam; addit Fulgentius, Deus verum lumen fudit seculis. Scala cælestis, quia per ipsam Deus descendit ad terras, ut per ipsum homines mererentur ascendere in cælos. Nihil horum hæreses, sed contraria omnia; sunt enim ex castris illius, de quo dictum est: Et tu insidiaberis calcaneo eius. Ad eam igitur*
tot

tot laudum plenam titulis virginem, Angelus paulo post Deo plenam futuram mittitur. Nasci autem Deum ex virgine debuisse; & prophetarum oraculis, & Sibyllarum carminibus denuntiaturum est. Ex prophetis, primus Moyses, ipsius summi creatoris decreta referens, *Inimicitias*, inquit, *ponam inter te*, Gene. 3. *& inter semen tuum, & semen illius: ipsa conteret caput tuum, & tu insidiaberis calcaneo eius.* ubi dicit semen mulieris, non viri, ostendit futurum Messiam, ex incorrupta virgine, sine virilis feminis commitione nasciturum. Salomon deinde, sapiens dum sapientiae pandit conceptus, Lactantio referente Lib. 4. de vera sapientiae cap. 12. inquit: *Infirmatus est uterus virginis, & accepit foetum, & grauata est, & facta est in multa miseratione mater virgo.* Et ante Salomonem pater eius David: *Permanebit cum sole, & ante lunam, in generatione & generationem, descendet sicut pluuia in vellus*, Psal. 71. id est, sine omni strepitu ac contaminatione: *& sicut stillicidia stillantia super terram, cum magna vbertate & foecunditate.* Sed longè clarius post istos Isaias: *Ecce*, inquit, *virgo concipiet, & pariet filium, & vocabitur nomen eius Emmanuel.* Eesai. 7. Et Daniel item: *De monte abscissum iri lapidem sine manibus.* Dan. 2. id est, de virgine, sine omni opera viri, nasciturum caeli regem, ac omnia aurea, aerea, ferrea, testacea regna comminaturum praedicat. Sibylla similiter,

E Accipe

Accipe virgo Deum gremio intemerata parico.

Et paulò post, Puer inde creatus

Virginco partu, nim est mortalibus hæc res.

Sed & veteres illi Rabini, qui ante Christum vixerunt, hoc idem præclarè docuerunt: dum virginem sanctam mundissimæ Sapphiro comparant: quo nò solum intemeratæ virginis gloriam; sed ipsius quoque omnimodam puritatem designant. Quia sicut Sapphirus, licet ex elemento terreno, opaco & obscuro originem habeat; à sui tamen principio pellucida & clara est; ita immaculata virgo, etsi à parentibus peccato obnoxiiis prodiit, à sui tamen initio, absque omni contagione atque macula libera fuit. Probant hoc idem sanctorum patrum convenientissimæ rationes. Sicut enim lignum vitæ in paradiso natum fuit ex illa terra benedicta, quam nulum aratrum aut rastrum tetigit: ita vera vita Christus, secundum carnē, ex vtero virginali & intemerato, nullo maritali aut virili amplexu intercedente natus esse debuit. Et quemadmodum primus homo Adam, de virgine, id est terra, quæ nullo vomere aut aratione rupta, nec opere violata est, manu Dei ipsius formatus fuit; ita eodem modo alter Adam cælestis, solo opere spiritus sancti, in vtero intemerato & inuiolato, ex purissimis sanguinibus, homo, virtute altissimi, factus est; vt sic omnes generatio-

nis

nis partes compleantur. Nam prima generatio fuit in Adamo, sine viro & foemina: secunda in Eua, ex viro sine foemina: tertia in nobis, de viro & foemina: vltima facta est in Christo, sine viro de foemina. Quemadmodum enim ipse pater Deus origo & principium rerum, quoniã parentibus caret, & ex nullo est procreatus, ἐκ πάτρός & ἀμῆτως, à Trismegisto verissimè nominatur; ita etiam filium bis nasci voluit, vt ipse etiã fieret ἀπάτρός atq; ἀμῆτως. Ac in prima quidẽ natiuitate diuina & spiritali ἀμῆτως fuit; quia sine officio matris, à solo Deo patre progeneratus est: in secunda verò, humana & carnali ἀπάτρός: quoniam sine patris officio è virginali vtero procreatus est. *Ut enim certum esset à Deo emissum*, inquit Lactantius, *non ita illum nasci oportuit, sicut homo nascitur ex mortali vtroque concretus: sed vt appareret etiam in homine, illum esse cælestem, creatus est sine opera genitoris. Habebat enim spiritalem patrem Deum: & sicut pater spiritus eius Deus sine matre; ita mater corporis eius virgo sine patre.* Fuit igitur & Deus & homo, inter Deum & hominem medius constitutus; nempè vt mediam inter Deum & hominem substantiam gerens, nostram hanc fragilem imbecillemque naturam, quasi manu ad immortalitatem posset educere. Adde, quòd nouo partui, noua debebatur generationis ratio: vt,

Anselmus in
lib. 2. cur Deus
homo.

Li. 4. Institutio.

Contra Try-
phonem.

si Deum concipi vel nasci debuerat, inquit Bernardus, non nisi de virgine conciperetur & nasceretur; & si virgo conceptura & paritura erat: non nisi Deum conciperet & pareret: ut sic quasi duobus testibus probaretur Christi diuinitas, matris virginitate, & patris diuinitate. Conueniebat item, eum, qui in cælis natus est sine matre, hîc nasci in terra sine patre; ne filius Dei alium patrem haberet quàm Deum: ne dignitas Dei patris transferretur ad alium: ne vnus, ut ait magnus Basilius, duobus natus esse putaretur parentibus. Et quemadmodum primum peccatum conceptum fuit in animo mulieris, ut dicit Iustinus martyr, sine vlla opera, aut persuasione viri, solo instinctu spiritus inimici: sic & Christus Dominus, primi peccati antidotum conuenientissimè concipi debebat ex sola muliere, solo spiritu Dei sine omni opera viri. Adde illud D. Thomæ, verbum absq; omni corruptione cordis concipi: quinimò cordis corruptionem, perfecti verbi conceptionem non admittere. Quia ergò caro sic fuit à verbo Dei assumpta, ut esset caro verbi dei; conueniens fuit, etiam ipsam sine corruptione matris concipi, & eodè modo nasci. Quo eodem illud Ambrosii spectat. cuius membra mystica ex virgine ecclesia sancta nascitura erant, iuxta illud Pauli: Despondi vos vni viro, virginem castam exhibere
Chri.

Christo, ipsum eius corporis caput non nisi ex virgine nasci debuiffe. Ita enim Ambrosius: *Verè de-* In Lucam.
sponsata, sed virgo, quia est ecclesiæ typus, quæ est im-
maculata, sed nupta: concepit nos virgo de spiritu, parit
nos virgo sine gemitu. Et ideò fortasse sancta Maria,
alii nupta, ab alio repleta: quia & singulæ ecclesiæ
spiritu quidem replentur & gratia: iunguntur tamen
ad temporalis speciem sacerdotis. Et vt per Euam vir-
ginem adhuc, facta est humani generis perditio:
ita per Mariam perpetuam virginem, fieret eiusdè
reparatio. Vt igitur à filiis, iræ mortisq; decretū in
se ferentibus, distingueretur ille; qui decretū mortis
sublaturus erat: iure & meritò ob eas ipsas causas,
quas diximus, ex virgine virginitatis author & ama-
tor, ac remunerator nasci debuit. Fas enim nō erat,
inquit Augustinus, vt per eius aduentum violaretur
integritas, qui venit sanare corrupta. O sancta igitur
virginitas, quibus te laudibus efferam nescio: quia quæ
cæli capere non poterant, tuo gremio contulisti: quæ
Ioannem Baptistam, quo non surrexit maior inter
natos mulierum, quæ matrem Dei, quæ filium ip-
sum altissimi, ducem & authorem habes. Quam ta-
men virginitatem, frigidi isti ac humi repentes no-
stri euangelici, non modò non mirantur, neq; fo-
uent; sed, quantum possunt, infamant, rident, ac
extinctam esse volunt. Honorable, inquit, conu- Heb. 13.

bium in omnibus, & thorus immaculatus. Verùm, si eà quæ sequuntur spectes: *Adulteros enim & fornicatores iudicabit Deus.* At, si ad virginitatem te referas, tum illud Pauli audies: *Qui elocat filiam suam, benè facit: qui non elocat, meliùs facit.* Nam & argentum pulchrum & honorabile est, si illud cum plumbo & scoria compares; at, si idem cum auro conferas, nihil est quod multùm argentum laudes. Bonus est prouentus tricesimus; sed melior quinquagesimus: & utroque longè præclarior centesimus. Sed doctrina talibus authoribus orta, quid doceat aliud quàm ventrem, & ea quæ illi subiecta sunt? Verùm nos ad alia transeamus. Mittitur igitur Angelus ad virginem, sed *desponsatam viro*: Desponsatam, non tamen nuptam: Hanc enim nuptam Ioseph nunquam deferere cogitasset. Desponsatam autem, non solùm propter ministerium, non solùm propter legem generisquæ successionem: non solùm propter publica munera, ac tot laborum, tot fugarum solatium: non solùm ob integritatis virginalis testimonium: non solùm ut in matrimonij carnalis umbra, mysteria redemptionis nostræ celarentur, ut docet Sanctus Ignatius, atque Ambrosius, ut quemadmodum Diabolus Euam sub fructu; ita Diabolum Maria sub connubio caperet: & qui spe diuinitatis seduxerat hominem, carnis præ-

prætextu deciperetur: non solū propter firmitatem fidei nostræ; causam enim mentiendi sponsa non habet, cū coniugii præmium & gratia nuptiarum partus sit fœcunditas: non solū vt ordo vterque tam virginalis, quàm coniugalis eodem partu consecratur & honoretur; sed multò magis, vt placet Ambrosio, ne temeratae virginitatis mater adureretur infamia; vt sanctus sanctorum sanctè, non solū quantum ad rem ipsam, sed etiam quantum ad opinionem nasceretur: neué vlla prauæ suspicionis, aut in matre, aut in filio macula relinqueretur: *Maluit enim Dominus aliquos*, inquit Am- In Lucam, brosius, *de suo ortu, quàm de matris pudore dubitare. Sciebat enim teneram esse virginis verecundiam, & lubricam famam pudoris: nec putauit ortus sui fidem, matris iniuriis astruendam: & qui nascendo integritatem matris non minuit, nec eius gloriā aliqua dedecoris labe aspersam esse voluit. Nec enim in hoc venit; vt, quæ nostræ essent, imminueret: sed vt ea nouis accessionibus aucta cumlaret.* Et ideò commentum Caluini non placet; qui promissam tantummodo sponsam fuisse Ioseph, & nō etiam domū traditā docet. Quomodo enim grauida & plena vtero, in domo paterna infamiam effugisset; si promissa tantū, & non etiā tradita marito fuisset? sed ille, dum casta ex mutuo consensu matrimonia euertere vult, virginem infamiae,

miæ, non ad dæmones tantum, sed etiam ad homines, vel contra suam sententiam, quod ambitiosi facere solent, exponit. Seruatur itaque sanctæ Mariæ, sicut pudore integra, ita inuiolabilis opinione virginitas. Oportet enim sanctos, & ab iis testimoniū habere, qui foris sunt: nec decuit sinistra virginibus opinione viuentibus velamē excusationis relinqui: quod infamata quoque Domini mater videretur: & vt in omne reliquum tempus, detur exemplum omnibus quidem, præcipuè tamen regibus, atque principibus domos suas, non solum à factō, sed etiam ab omni suspicione facti, alienas habere. Multa enim, plerunque in principum ædibus eueniunt: quæ, etsi mala non sint, ac ioco nonnunquam fiant; seriò tamen nomina eorū & domos infamant, multisq; malum exemplum præbent. *Desponsatam* viro, cui nomen erat Ioseph, de domo David. Salutatur ab Angelo, desponsatur lignario fabro. Pulchra virtutis corona pulchra permittio, inquit Bernardus, virginitatis & humilitatis, sine qua ne virginitas quidem placuisset. Per humilitatem placuit: per virginitatem concepit: per hancque scalam Deus ad homines descendit. Vide autem rex Stephane, rerum humanarum miram vicissitudinem ac conuersionem, domus inclyta David, diues opum, diues gloria, ad mercenarium fabrum est reuocata:

sic

sic, omnia sunt hominum tenui pendentia filo :

Et subito casu, quæ valere, ruunt.

Ex magnis parua ; & rursus ex paruis magna vicissim exorjuntur. Nihil igitur hîc magnum , nihil diuturnum , nihil meritò censerî debet admirandum.

Et nomen virginis Maria : quod quidem aliis domina , vt Theophylacto : aliis exaltata , vt Hieronymo : amaritudinis mare aliis : stella maris , periucundè Bernardo dicitur . quia sicut sydus sine sui diminutione emittit radium ; sic illa absque sui læsione parturiuit filium : nec syderi radius suam minuit claritatem ; nec virgini filius integritatem. Stella clara in ortu conceptionis suæ : clara in summo cardine generationis Christi : clara in occasu assumptionis suæ. stella maris , cuius vita inelyta cunctas illustrat ecclesias : & quæ suo exemplo , suffragio , & merito naufragantes seruat : quæ cui benigna apparuerit , eum in spem optimam portus & salutis erigi oportet. Quæ tamen stella , lumen , vim , & dignitatem , veri solis Iesu Christi non aufert ; sed ab illo potius accipit , illique inseruit. Neque enim aut cum modernis Hagiomachis , matrem Dei contemnimus : neque cum antiquis Collyridianis , qui virginem sanctam , tanquam Deam coluerunt , illique sacrificia sua offerebant , Deam putamus : sed filium quidem , vt verum Deum colimus ; matrem autem

tanquā gratia plenam, & cum qua est Dominus, benedictū super omnes mulieres prædicamus; ab illo opem, ab hac preces petimus: & illū quidē coronā primā & summam cū Hieronymo confitemur; hanc autem coronam sub corona Christi. Et hic quidem apparatus legationis tantæ est; in quo nihil cernimus, quod non magnum sit; & quod non dignissimam, imò propemodum solam, eam legationem esse probet. Siue enim mittentem, ut diximus spectes, hic Deus est, ipsa que summa trinitas, qua nihil maius, nihil sublimius, aut esse, aut cogitari potest; siue cum qui mittitur, princeps est Angelorum, summus Archangelus; siue ad quem mittitur, mater Dei est; siue quò & quando mittitur, tempus quidem creationis & renouationis, locus redemptionis; siue qua de causa, inauditi connubij, inauditæ vnionis, inauditæ salutis gratia. Deum immortalem, hominum né causa hæc tanta fiunt? aut quis modus diuinæ dilectionis & amoris erga nos? aut quo & quanto nostro mutuo pro tantis beneficiis opus est? Hæccine huius luti ac cineris, tanta dignitas est? Quod si hic apparatus eius legationis tantus; quæ & qualis legatio futura? aut qua præparatione, non tam aurium, quàm cordis, ut cum fructu hæc tanta arcana in animos nostros influant, & ibidem remaneant, opus est? Huc igitur animos, huc mentem, huc aures conferamus.

NVNTII SALVTIS

SERMO SECVNDVS.

Aue Maria gratia plena, Dominus tecum, benedicta tu in mulieribus, & benedictus fructus ventris tui IESVS.

A Pparatum & expeditionem cælestis legationis vidimus: nunc ipsam legationem erectis mentibus & animis audiamus. Cuius, ex more aliarum legationum, duæ sunt partes, salutatio, donorumque exhibitio, atque ipsa negotij explicatio: Vtramque suo ordine expendamus.

Ingreditur igitur in sacrarium pudici cubilis Angelus ad virginem: ingreditur medius inter Deum & hominem, pignus reconciliationis ferens. Inuenit verè almam, id autem est absconditam. Virginitas amat secretum, inquit Ambrosius: vas vitreum ne frangatur, tectum seruari oportet. Nam & arca testamenti nunquã ab interiori templi parte efferebatur. Clausum erat cubile; sed hominibus, nō Angelis, quibus nihil clausum est: facile autem erat Angelo, id est ministro sponsi, clausis ianuis ingredi; sponso, vt putat hæresis, difficile erat, ac planè impossibile? dementiæ hoc est. Sola autem virgo erat in templo animi sui commorans, sed nunquam

minus sola; Deus enim erat meritò solitudinis cum illa. Sola, sed non otiosa, sed lectioni atq; contemplationi futurorum mysteriorum dedita. Beatam autem illam solitudinem omnibusque celebritatibus anteferendam, cui cum Deo & Angelis contubernium est. Dominus enim vacuos complet, solitarios comitatur, plenos euacuat, comitatos à turba desertos facit. Soli igitur aliquando simus, vt Dominum comitem habeamus. Accedit ergo Angelus ad angelicam vitam ducentem: stupet nouæ & nulli antea Angelorum cômiffæ legationis onere pressus: & vnde in causam ingrediatur, meditabundo similis factus cogitat, quid primum, quid vltimū eloquatur: num lætam esse iubeat: num gratia plenam annuntiet: num Dominum cum ea: nū benedictam inter mulieres: num Deum genituram. Quid enim prius aut maius sit, vel Angelico ingenio difficile est discernere. Illud igitur apud se statuit, salutis hanc legationem esse, immensi gaudij procemium, inde ordiendum esse, inde auspican- dum restituendi generis humani negotium. In omni cogitat læsæ maiestatis pacificatione, primam fieri infamiæ, quæ perduellem sequitur, sublationē oportet; cum infami enim nō est transactio. Omne autē mulierum genus, propter Euan eiusque transgressionem, infame est, dolori & molestiæ partus subie-

subiectum. Hoc igitur decretum, primò à virgine auferam, eamque gaudere ac lætari, summæ Trinitatis nomine, iubebo. *Aue* igitur, inquit, *Maria*. Omne genus mulierû dolori & mœrori in suo partu obnoxiiû fuit; tu prima, in gaudio & lætitiâ, absq; omni mœrore paries: nec tâtum in tua solius lætitiâ & gaudio paries, sed cômune hoc erit cunctis mortalibus gaudium; NASCETVR ENIM ILLIS EX TE SALVATOR. Omnes aliæ mulieres damnationi pariebant; tu saluti paries: nam si in Ioannis nuntij & præcursoris salutis natiuitate multi gaudebunt; quantò magis in natiuitate ipsius salutis omnes gaudere debebunt? Gaude igitur gratia plena, plenè ac superplenè gaude. Tuum est enim reuera auere & gaudere: tuum est verissimè audire istud, Gratia plena, quia tecum est vniuersus lætitiæ thesaurus, totius lætitiæ & gratiæ, rex cum ancilla: cum speciosa inter mulieres, speciosus forma præ filijs hominum: cum puella impolluta, is qui sanctificat omnia. Tecum est conditor omnium: tecum, inquam, vt ex te gignatur: tecum conceptione, vt ex partu tuo generetur: tecum velut Deus, vt ex te fit Deus & homo. Nuntius Euæ, nuntius fuit doloris; nuntius tuus, nuntius gaudij. Sit noua salutatio, in noua gratia: in nouo partu, nouum exordium: in noua causa, gaudij vocabulo saluteris, quæ veri

F iij gaudij

gaudij largitorem feres ab illo, qui veri gaudij munera fert. Ave, inquam, gratia plena; pater misericordiarum operis manuum suarum recordatus est; qua eadem manu tecum nunc reconciliatur. Ave, inquiunt Andreas Ierosolymitanus, atq; Hesychius, *gratia plena, multis virtutibus exornata virgo, in lampade gestans lucem inextinguibilem, sole splendidiorem: gaude, inquam, utpote inter omnes virgines in matrem Dei electa. Ave gratia plena, hanc spiritualis esca; in te siquidem habemus diuinitas. Ave gratia plena, lætitiæ organum, per quod ruinæ nostræ sunt restitutæ, & vere gaudij plena facta est compensatio. Ave gratia plena, quæ sitientes perennis fontis satias dulcedine. Ave gratia plena, mare spirituale, habens cælestem Christum. Ave gratia plena, splendidum cælum, quæ in cælis incomprehensum continet Deum. Ave gratia plena, quæ cherubicum thronum diuinitatis fulgore superas. Ave gratia plena, quæ cæli circulum habes, & Deum incomprehensum, angusto potissimum loco, in te ipsa continet. Ave gratia plena, nubis columnæ similis, quæ Deum habes, qui populum deduxit per desertum. Ave lux, ave pax, ave gaudium, & salus mundi; ave generis humani lætitia, patrum præconium, lignum vitæ, paradyse deliciarum, liberatrix & auxiliatrix. Duo autem verba esse, inquit Damascenus, orbi nuntiata,*

ata, qualia in terris nec aliquando dicta, neque dicenda sint, in quorum comparatione omnia mutæ debeant apparere. Primum verbum, quod ipse rugitum altissimæ vocis appellat, in hoc Archangeli dicto statuit; *Aue* gratia plena: eo enim incarnationem Dei, redemptionem hominum, & mundi renouationem, docet contineri. Alterum verbum Ioanni tribuit, qui, vt verè filius esset tonitruui, vocem illam tali aquila dignam protulit: In principio erat verbum. Neque verò nudis solis verbis Angelus virginem gaudere iubet, sed eo amplius causas, cur meritò gaudere debeat, subnectit; ac dona, quæ cælitus fert, largè promit. Quarum prima hæc est, eam esse *gratia plenam*. Iram, inquam, primæ sententiæ amplius ne metuas, sublatum est Eux decretum: tu non modò Deo grata, sed gratissima; sed gratia plena & es, & vocaberis semper. Ac si diceret, omnes dotes, quæ gratiam Dei consequuntur, affatim es consecuta: tecum est fons vniuersæ gratiæ. Plena, inquam, illuminatione sapientiæ, inquit Bonauentura: plena mundatione gratiæ: plena possessione bonæ vitæ: plena vñctione misericordiæ: plena fecundatione prolis piæ: plena perfectione ecclesiæ: plena resperusione odoriferæ famæ: plena resultatione diuinæ gloriæ: plena etiam fruitione æternæ letitiæ. Est autem affirmantis potius oratio hæc, quàm

quàm futurum beneficium prædicentis; magisque de præfenti gratia gratulantis, quàm futurum quid denunciantis. Oblatio est muneris, non simplex salutationis officium, inquit Chrysologus. Gaude, ut potè inter omnes virgines in matrem Dei electa, inquit Euthymius. Quæ quidem gratia, Dyonisio, est deificatio: quæ, cum accesserit similitudo, creaturam creatori amabilem & dilectam reddit. Gregorio Nysseno, puritas dicitur à fonte Christo in nos deriuata: vel sicut Basilius loquitur, Spiritus sancti participatio. Chrysostomo, bonitas infusa immensa: Eusebio, puritas occulta: Cyrillo Alexandino: sanctitas, quæ nobis insit à Christo communicata: Prosper, virtutes, & Deum ipsum in nobis habitantem vocat: Macarius, arcana quædam cælestis pulchritudinis vestimenta nuncupat: Augustinus verò, ut diligentissimus, ita integerrimus gratiæ vindex, vocat illam occultam quandam communicationem, & inspirationem gratiæ spiritualis & dilectionis, quam Deus infundit & paruulis: vocat interioris hominis pulchritudinem, & pignus donumque spiritus, per quod operamur iustitiam, & à præuaricationis damnatione liberamur. Eidem gratiæ tribuit nouitatem & virtutem tantam spiritus viuificantis, quæ iustificatos, non solum à lege peccati & mortis liberet, sed etiam intus hominem iusti-

De cæl. hier.
cap. 1.

Lib. de perfecta hominis natura.

Lib. de Spiritu S.

In Psal. 118.

De corpore & sanguine Domini.

Lib. 11. Thez. cap. 3. & 5.

De libero arbitrio.

Lib. de perfectione spiritus.

Lib. de peccatis.

ca. 9. & 10. Item lib.

4. contra duas epistol.

Pelagianorum c. 5. epistol. 65. ad Consentium

lib. de spirit.

& ltr. ca. 15. & 30.

iustificet, ac legem vniuersam docet impleri; conuersos enim à Deo gratia eius adiuuari, vt carnis vincant concupiscentias; & in accepta iustitia, tum proficiant, tum perficiantur. Benè autem sola gratia plena dicitur, quæ sola gratiam, quam nulla meruerat alia, consecuta est, vt gratiæ repletur auctore. Mirari autem hoc loco licet, eius spiritus, qui hæreticos vexat, & qui à principio genus humanum seduxit, malignitatem & inuidiam: cui non satis est legitimæ potestati, Pontificibus, inquam, regibus, ac aliis in sublimitate positis, inuidere atque obrectare: non satis est viris sanctis, & probis ac religiosis detrahare: non satis spiritus sanctos, qui perpetuo cælo fruuntur, odisse; nisi ipsi matri Dei, hanc ipsam plenitudinem gratiæ, quam illi nunc cælitus Angelus nuntiat, inuideant. Itaque hunc ipsum locum, *Gratia plena*, miris modis deprauare ac inuertere moliuntur, iam ipsius vocabuli multiplici interpretatione, iam expositionibus variis, ac longissime petitis, contra omnem omnium veterum sensum ac consensum, commentis potius, quam commentariis. Alij igitur verbum Græcū *εχρησιστομένην* exponunt, gratiosa, vt Bucerus: aut gratiam consecuta, vt Calvinus: aut gratis dilecta, vt Beza: alij gratificata & dilecta, vt Bulingerus: alij grata Deo, passiuè, quod ipsa sit in gratia, sicut Sarcarius & Æmylius, interpretan-

pretantur : alij, cui Deus faueat, vt Lofsius : alij, accepta, vt Castalio : vel quæ in gratiam à Deo recepta fit, vt Hemingius, interpretantur. modò illud, quod Bernardus, quod Ambrosius & vniuerfa vetustas sequitur, non imitentur. Vt autem verbi interpretatione tantum honorem virgini ereptum esse volunt ; sic multiplicibus loci expositionibus hoc idem efficere conantur. Quorum summa illa est : Virginem, nullo præcipuo, aut lumine, aut dote, aut ornamento, vel charitatis, vel humilitatis aliorumque donorum, cælitus illustratam, & dotatam fuisse : sed iplo solo vacuo fauoris, aut dignationis nomine, fallacis & egentis mundi more, compellatam fuisse. In qua gratia nihil plus reponunt, præter ipsam peccatorum remissionem, qualem publicanus, qualem Maria Magdalena, qualem latro in cruce, consecuti sunt. Quasi verò, vlla vnquam peccati labe contaminata fuerit illa ; quam etiam à mentione peccati excipit Augustinus : qui non tantum eius gratiæ, qua virgo singulari quodam priuilegio repleta fuit, sed omnis etiam omnium aliorum sanctorum gratiæ, cum Diuo Paulo, duas partes ponit : peccatorum inquã remissionem, & spiritus charitatis infusionem. Neque enim satis est mori peccato, nisi resurgamus iustitiæ ; vt peccato mortui, iustitiæ viuamus : aliudque est ablui, aliud sanctificari. *Et hæc,*
inquit

inquit Paulus, *fuiſtiſ, ſed abluti eſtiſ, ſed ſanctificati e-
 ſtiſ, &c.* Quæ igitur hæc eſt impudentia, aut potius
 blaſphemia, nõ plus tribuere matri, quã publicano,
 Magdalenæ, latroni (quanquam & iſti ſuiſ gratiæ
 doniſ, & gradibuſ, id eſt, charitatiſ, humilitatiſ, pœ-
 nitentiæ, non caruerint) tributum ſit? Quasi verò,
 cùm inter alioſ omneſ ſanctoſ munificentiffimuſ
 Dominuſ largè talenta ſua diſtribuerit; ſolam ma-
 trem nudam & indotatam reliquerit! aut quaſi no-
 uum ſit electoſ Dei ſpecialibuſ doniſ exornari, ac
 priuilegiis! Sic Ioanneſ ſpiritu ſancto repletuſ eſt in
 vtero matriſ ſuæ: ſic Pauluſ gratiam Dei in ſe man-
 fiſſe, nec vacuam fuiſſe profitetur: ſic Stephanuſ
 prothomartyr gratia & fortitudine plenuſ dicitur.
 Quid? nonnè lōgè maiuſ illud eſt: *Si quiſ diligit me,* Ioan. 14.
ſermonem meum ſeruabit, & pater meus diliget eum;
& ad eum veniemuſ, & manſionem apud eum facie-
muſ? Sed ſerpens iſte prodiſ ſe illum eſſe, de quo
 dictuſ eſt: *Et tu inſidiaberis calcaneo ei.* Non igi- Gen. 3.
 tur aut vana, aut ieiuna, aut aulica, aut hæretica,
 hæc gratia fuit; ſed quæ omneſ gradus plenitudi-
 niſ in vniuerſitate gratiarum omnium habuerit: ſi-
 ue illam plenitudinem gratiæ ſpecteſ, quæ ſacra-
 menta conſequitur: ſiue quæ virtuteſ, tam eaſ quæ
 Chriſtianæ dicuntur, quàm eaſ quæ morũ ſunt: ſi-
 ue ſeptiformem plenitudinem donorum: ſiue bea-

titudines ipsas: siue fructus spectes à Paulo explicatos: siue reliquas dotes, etiam illas quæ gratis dantur; consideres: vt prolixè & subtiliter ea singula probat & inuestigat Albertus, illudque addit: eam omnibus modis gratia plenam dici: Primò, quia omnes gratias generales & speciales, omnium creaturarum, perfectè habuit. Secundò, quia illas gratias habuit, à quibus omnis vacua fuerit creatura. Tertiò, quia sua gratia tanta fuit, quòd pura creatura maioris gratiæ capax nō fuerit. Quartò, quòd gratiam increatam totam in se continuit; & sic eam per omnem modum gratia plenam fuisse. Tribus autem in omni scriptura tributum esse legimus, eos scilicet gratia plenos fuisse: ipsi Iesu Christo saluatori nostro imprimis, iuxta illud: *Et vidimus gloriam eius, gloriam quasi unigeniti à patre, plenū gratia & veritate.* Stephano prothomartyri: *Stephanus*, inquit Lucas, *plenus gratia & fortitudine faciebat prodigia & signa magna in populo.* Et nūc virgini tribui audimus, *Plena gratia*: suo tamē modo cuiq;. Nam Christus quidem plenus gratia dicitur, per naturam absolutè, & vt scholastici loquūtur, propria, datiua, & effluxiuua gratia, fontis instar, non receptiuua, non ab vlllo communicata: omni ex parte, siue essentiā gratiæ, siue operandi virtutem, siue primos & summos effectus spectes, perfectā; eò quòd tota & vniuersa,

In Luc. ca. 1.

Ioan. 1.

Acto. 6.

uersa, non capitis tantum, sed etiam membrorum omnium, ac vniuersæ tam militantis, quam triumphantis ecclesiæ, gratia Dei, sit & requiescat super illum. *De eius enim plenitudine accepimus omnes*: siue illa sit mater Dei, siue Stephanus, siue alius quis sanctus. quicumque aliquando placuerunt Deo, ipsius merito & eius gratia placuerunt, iuxta illud: *Sicut vnguentum in capite, quod descendit in barbam*, Psal. 122. *barbam Aaron, quod descendit in oram vestimenti eius.* Stephanus autem, & Maria, pleni item dicuntur gratia; sed iam longè dispari modo: ille enim simpliciter uti dictum est, & per omnia gratia plenus fuit, super quem inhabitauit plenitudo diuinitatis omnis; at isti pleni gratia pro capacitate quisque sua, gratia susceptiua, ut scholastici loquuntur communiter, riui & fluminis instar; & ad illud opus tantum dignè exequendum, ad quod per Dei designabatur prouidentiam. Quomodo item vas aliquod plenum liquore aliquo dicimus, non quod totum illum liquorem occuparit; sed quod ita plenum sit, ut amplius illius capere nihil possit. Quale quid de vasis 4. Regum. 4. olei Helisei legimus. Quam gratiam alio modo scriptura, talenta, quæ cuique ad eius opus dantur, vocare solet. Et Stephanus quidem fuit gratia plenus, quantum ad inclytam illam & illustrem martyrij pugnam, & victoriam pertinebat: Virgo autem, ut di-

gna mater Dei fieri posset singulari & proprio modo, gratia præ eminentiæ & prærogatiuæ (vt aiunt scholastici) plena fuit. Neque enim tantopere suis meritis (quanquam non sine illis) quàm gratia Dei, eo tanto munere digna est effecta. Quantò igitur functio matris maior est omnibus functionibus, omnium quicumque aliquando Deo placuerunt sanctorum: tantò præ omnibus aliis plenior gratia meritò fuisse dicitur, propinquissima fonti, præter unionem cum Deo hypostaticam, Deo illam eligente & perficiente, per super eminentem quandam virtutem & operationem: & quòd propinquissima auctori gratiæ, illum qui natura gratia plenus est, in se recepit, eumq; tanquam vitis quædam præstantissima edidit: de quo illud: *Erit fons patens domui Dauid, in ablutionem peccatorum, et menstruata*. de plenitudine enim illius (vt dictum est) accepimus omnes. Et gratia quidem Christi, gratia fontis est: gratia Mariæ, gratia fluminis, de qua illud: *Fluminis impetus lætificat ciuitatem Dei*: gratia autem sanctorum, gratia riuorum, & palmitum: *Ego sum*, inquit, *vitis, vos palmites*. Gratia Dei balsamum est purissimum, purissimo vase indigens, inquit Bernardus. Quantò igitur vas sanctius Maria fuit, tantò plus eius balsami cepit. Vnde Hugo de S. Victore, his verbis Mariam compellat: *Rectè dicta es gratia plena, de qua*

Zachar. 13.

Psal. 45.

Ioan. 15.

de qua ortus est fons gratiæ; ideò totū nobis quodā-
modo à te, quod per illū nobis est, qui natus est ex
te. Benè enim dicta es gratia plena, & in tantū ple-
na, vt ex tuo redundante totus hauriat mundus. Si
enim prudentes virgines acceperunt oleum in vasis
fuis cum lampadibus; tu prudentissima virgo vir-
ginum, non vnum tantū vas habuisti oleo gratiæ
repletum, quo lampadem tuam inextinguibilem ar-
dentem nutries; sed aliud gestabas vas redundans
& indeficiens, ex quo effuso oleo misericordiæ o-
mnium lampades illuminares, & vasa omnium vsq;
ad summum repleres, & in illo nihil minueres. Pru-
dens ergo fuisti, vt tibi prouideres; nec timida, vt
aliis subuenires: nec dixisti, ne fortè non sufficiat
mihi & vobis; sed sciens quia sufficeret & tibi & no-
bis, & sufficienter retinuisti, & sufficienter tribuisti;
Lumen in lampade, in carne fuit virginitas: oleum
in vase, in corde humilitas: & erat aliud vas huma-
nitatis verbi, in vtero tuo gratia plenum; ex cuius
plenitudine tu quoque accepisti, & lumen virgini-
tatis in carne, & oleum humilitatis in corde: post-
ea partu intemerato, nobis propinans ipsum inde-
ficiens tribuisti, vt ex illius plenitudine effunderetur;
quò & lampades nostræ extinctæ illuminaren-
tur, & vasa vacua replerentur. Sic gratia plena fui-
sti, cū de terra carnis tuæ, fons gratiæ erupit, vt
& ma-

& manaret super omnem terram, & irrigaret aridam, & sterilem foecundaret. Quomodo autem, id quod Christo proprium est, gratia esse plenum, hoc loco datur virgini, datur Stephano; sed longè alio modo & ratione quàm Christo; ita similiter & alia Christi attributa, matri Dei aliisque sanctis dari solent; sed longè diuerso modo, quàm illi. Quod cum hæresis distinguere nesciat, confundit, & accusat. Ita Moysen mediatorem scriptura vocat: Cyrum, Christum domini: Apostolos lucem, ipse Christus: fundamenta, Paulus: sic eandem virginem cum vetustissimo Irenæo, aduocatam, reginam, & matrem misericordiæ, & id genus alia vocare ecclesia solet. Quod si in nobis ecclesiaque damnant; damnent primùm in scriptura: damnent in ipso Salvatore, qui sua cum suis largissimè communicare solet: damnent in Angelo. Atqui spem, dicunt isti, vestram impiè Mariam vocatis. Vocamus equidem, & libenter, idq; cum Bernardo: Impius igitur Paulus, qui suos Tessalonicenses in hunc modum compellat: *Quæ est enim nostra spes, aut gaudium, aut corona gloriæ? nonne vos ante Dominum nostrum Iesum Christum estis in aduentu eius? vos enim estis gloria nostra, & gaudium.* Sic eodem modo Philippenes: *Frates, inquit, gaudium meum, & corona mea, sic state in Domino charissimi.* At in alio

1. Thessa. 2.

Philip. 4.

alio sensu dices, & nos eodem, vti dixi, modo in alio: Vocat Paulus Moysen mediatorem, vocat & Christum Dominū. At qua ratione, ipse se explicat, Christum nempe, *quia dedit semetipsum redemptionē pro nobis: per cuius sanguinem, siue quæ in terris, siue quæ in cælis sunt, reconciliantur atque pacificantur, quem præposuit Deus propitiatorem per fidem in ipsius sanguine.* Moysen autē, quia legis ordinatio in manu eius facta est. Quod itē similiter de aliis intelligendum est. Porro virginē (vt aliquando hunc locū cōcludamus) sanctis aliis, atque adeò Angelis, gratiæ plenitudine multis de causis antecelluisse, testatur scholæ theologicæ princeps D. Thomas. Primū quidem, quòd animam omni gratiæ copia refertā haberet, cū ad omne peccati fermentum euitandum, à quo illa quidem fuerit immunis, tota pulchra & sine macula; tum ad omnia virtutum genera exercenda; in quibus illa velut viuum & absolutum exemplar, se omnibus præbuerit atque præluxerit. Deinde, quòd plenitudo gratiæ ex anima eius ad corpus siue carnem, sicut in nullo alio redundārit; adfuisse illi quippè Spiritum sanctum, cuius amor, non modò sanctificationis gratiam in pectus virginis infuderit; sed etiam singulariter in eo arserit: nec solū in eius corde, sed etiam in carne mirabilia fecerit: illudque potissimum,

H

mum,

mum, vt ex illa Deus & homo procrearetur. Postremo, illam non sibi tantum, sed ad communem etiam totius humanæ gentis salutem, præ cæteris omnibus, & sanctis, & Angelis; qui, neque à Deo sic illuminantur, neque mundum adeò illuminare possunt; abundante gratia cumulatam fuisse. Accedit & maxima, quæ illi est cum Deo, familiaritas, ne Angelis quidem obtingens, quæ illam totius Trinitatis nobile trichinium, & omnium creaturarum quasi dominam fecit. Atqui hæc ipsa est illa corona duodecim stellarum, quæ circumdat caput mulieris: corona duodecim, inquam, priuilegiorum: duodecim gratiarum, ex quibus Bernardus texit eam ipsam pulcherrimam coronam: Gratia, inquam, mirificæ conceptionis: Angelicæ salutationis: Sancti spiritus superuentionis: filij Dei immutabilis conceptionis: gratia item virginitatis incorruptæ, foecunditatis, sine grauedine oneris, puerperij sine dolore: gratia denique deuotæ humilitatis, reuerentiæ, pudoris, fidei, martyrij cordis. Non vacua igitur, neque donorum egens hæc fuit (vt hæresis mentitur) gratia; sed plena omnis vbertatis, atque foecunditatis; vt verè illud virgo dicere posset: *Ego mater pulchræ dilectionis, & timoris, & agnitionis, & sanctæ spei: in me gratia omnis viæ & veritatis: in me omnis spes vitæ et virtutis.* Verè igitur ipsa gratia plena.

Eccl. 24.

plena. Nos ergo egētes & vacuōs faciat participes plenitudinis suæ. Sed vnde hoc illi, vt tanta gratia referta sit, vt tantoperè lætari debeat? num à natura? num ex genere Daudico? num ab aliquo præcipuo merito? nequaquam: sed quoniam Dominus cum ea. Qui ante te, inquit, est, hodie vnà tecum est, vt ex te paulò pōst nascatur: quem prius conceperas virgo mente, nunc vtero concipies: præcedo nuntius Deum, sed à Deo non recedo. O vas mirabile, quod maius seipso continet; idq; neque apertum, neque refferatum vnquam. *Dominus*, inquit, *tecum*: tecum certè, tecum fuit, tecum est, tecum erit; quia tu cum eo, tu, inquam, cum eo, voto, studio, moribus, & vita semper fuisti. *Dominus tecum*, in via, Dominus in patria, Dominus in labore & in gloria: ille tecū, qui à patris sinu auelli non potest: gaudium, veritas, via & vita tecum: omnipotens tecum, naturæ totius ac vteri tui dominus tecum est. Qui dixit fiat lux, & facta est lux: fiat firmamentum, & factum est. qui idem ad omnia illa perficienda, quæ dicentur tibi, poterit abundè sufficere. Nihil igitur tibi videatur nouum: nihil difficile, nihil impossibile: confidenter age: omnia potest, qui tecum est. Quid hac re maius? quid sublimius? quid magnificentius esse potest, quàm Deum præsentem habere, quàm eius contu-

2. Reg. 7. bernio frui? Dixerat Nathan Dauidi regi: *Quidquid in corde tuo est, vade, age, & perfice illud; tecum enim*
- Iob 17. *Dñs est. Pone me iuxta te, dicit Iob, et cuiusvis manus pugnet contra me: vbicunque ille est, cælum & tota*
1. Reg. 18. *cælestis familia adest. Saul percussit mille, & Dauid decem millia, quia manus Domini erat cum eo. Et de*
- Luc. 1. *Ioanne inquit scriptura: Puer crescebat, & confortabatur spiritu; manus enim Domini erat cum illo. V-*
tinam autem tibi itidem rex Stephane, in hoc prin-
cipio huius tui ad nos aduentus, hoc idem contin-
gat, quod Gedeoni aliquando precatus est Ange-
lus: vt Dominus tecum sit, fortissime virorum: vt
Dominus non recedat ex corde tuo, non recedat ex
ore tuo, non recedat ab opere tuo. & erit certè te-
cum, si cum illo tu esse volueris: neque enim amat
& deserit. Dominus tecū, inquit: sicut flos, cum vir-
ga ipsum producente: sicut rex, cum regina ad illū
ingrediente: sicut sponsus, cū sponsa in eius ample-
xus ruente. Dominus tecum, per amorem & cōcor-
diam voluntatis, cuius non tantū voluntatem, sed
& carnem sibi cōiunxit: qui, etsi nec totus de Deo,
nec totus de te; totus tamen Dei, & totus tuus est:
nec duo filij, sed vnus vtriusq; filius est: nec tantū
filius tecū, quem carne induis; sed & pater, & spiri-
tus sanctus, de quo, & per quem concipis, tecū est.
Pater, inquam, tecum, qui filium suum, facit esse tu-
um: Fi-

um : Filius tecum, qui ad cōdendum in te mirabile sacramentū miro modo & sibi reseat conclusū secretū, & tibi seruat virginale signaculum: Spiritus S. tecum, qui cum patre & filio tuū sanctificat vterū. Dominus tecum, qui per te factus est Emmanuel, id est, nobiscum Deus. Quòd si magnum est, esse cum Deo, quod de Enoch dictum est, eum cū Deo ambulasse, hoc est, ex omni parte voluntati eius obtemperasse; quantò maius est, cum quo ipse est Deus, hoc est, cuius paret voluntati? Qui igitur est dominus omnium per creationem, dominus hominū per redemptionem, dominus tuus per piā vocationem; erit tecum per præsentiā, per inhabitantem gratiā, per corporalem essentiam. Meritò igitur gratia plena & es, & esse diceris: meritò summo gaudio & summa illa lætitia gestire debes. Cuius gaudii, non minor illa causa, quia *benedicta es in mulieribus*. Benedicta Dei benedictionibus primū, deinde hominum: benedicta cum Rachel, sed supra Rachel; quia illa mater, sed corrupta; tu mater, simul & integra: benedicta præ mulieribus cum Iudit, sed supra Iudit; quia illa vidua, tu virgo fœcunda: benedicta super omnes mulieres cum Ester, sed supra Ester; quia illa inuenit gratiā & misericordiam apud Assuerum, tu verò apud Deum. Neque verò nomine solo inter omnes benedicta, sed re eti-

am ipsa, propter eas dotes, quas habes ante omnes mulieres. Omnes enim omnium seculorum dotes ac benedictiones, siue illæ ante legem fuerunt, siue in lege, siue sub gratia, tua benedictione continentur: ac in eo filio, quem tu paries, & propter illum, in te complebuntur. Nam si propter Iacob benedixit dominus domui Laban, si propter Ioseph benedixit domui Phutiphar, si propter arcam domui Obededom; quantò magis tu benedicta propter eū, in quo benedicendæ erant omnes gētes? Habet autem virgo septē præcipuas dotes, ac peculiaria ante omnes mulieres priuilegia, & prerogatiuas, ob quas meritò beata inter omnes mulieres & est, & dicitur. Primū, quòd speciali gratia sit plena, ante omnes alios: *Cæteris per partes*, inquit Hieronymus, *præstat*, *tur; Mariæ verò se tota infudit plenitudo gratiæ.* Cuius gratiā cum Angelorum gratia conferens, beatā, inquit, & gloriosam virginem Mariam credendū est ampliora promeruisse virtutum priuilegia, & percepisse etiā gratiam ab Angelis collaudandā. Secundum tantæ matris priuilegium, quòd nunquam vlli peccato obnoxia fuit: non in conceptione sua, non in partu, non in vita, non etiam in exitu suo: de qua illud dici potest; sed longè magnificētius, quod Iudith de se prædicat: *Viuit autem ipse Dominus,* *quoniam custodiuit me Angelus eius & huc euntem,* *& ibi*

*ibi commorantem, & inde hac reuertentem; & non
 permisit me Dominus ancillam suam coinquinari, sed
 sine pollutione peccati reuocauit me vobis gaudentem
 in victoria sua, in euasione mea, & in liberatione ve-
 stra. Tertium, quod ab omni maledictione fuerit
 alienissima, quod vel ipse Lutherus nolens vo-
 lens agnoscit. Nam omne mulierum genus maledicto
 subiectum fuisse hinc patet: vel enim erant illæ quæ
 pariebant, vel quæ steriles remanserant. quæ parie-
 bant, illud maledictum ferebāt: In dolore paries fi-
 lios tuos: quæ non pariebant, illud reportabant;
 Maledicta sterilis, & quæ non parit. Hæc prima ta-
 lis mulier est, quæ ab utroque maledicto libera fuit;
 nam & sterilis non erat, mater enim: & sine dolore
 peperit; Virgo enim, instar amygdali, quæ suo mo-
 do habet virginitatem, & foecunditatem, quæ sibi
 virorem floris cum partu fructificationis reseruat;
 vt dicere possit: *Flores mei fructus honoris & honesta* Eccle. 24.
*tis: virgo cum foecunditate, & mater cum virgini-
 tate, vt separet pretiosum à vili. vnde illud: Partus
 & integritas, discordes tempore longo, Virginis in gre-
 mio fœdena pacis habent.* vt, quæ pretium vniuersitatis
 debebat parere, cum omni ordine vniuersitatis
 haberet aliquid commune. Et cum coniugatis com-
 mune quidem habuit, partum prolis: cum conti-
 nentibus, votum castitatis: cum virginibus, perseue-
 ran-*

rantia virginitatis: vt dum continentes, coniugatas, & virgines virgineo partu suo redimeret, simul fructus trigessimus, sexagesimus, & centesimus ad eam proueniret. O quam beata mater ista est, quæ sine contaminatione concepit, & sine dolore peperit medicinam, inquit Augustinus; ita vt in ea floreat virginea foecunditas, & foecunda virginitas. O quam magnum & omnibus seculis inauditum priuilegium, quod virgo in vtero concepit, & filium ab altissimo peperit. Merito igitur benedicta inter mulieres, quæ sola omnium maledictum effugit. Singulare hoc priuilegium notauit in Canticis spiritus sanctus: *Venter tuus sicut aceruus tritici vallatus liliis*. Dum ventrem tritici aceruo comparat, maternitatis foecunditatem significat: dum liliis vallari & muniri ait, virginitatis florem denotat. Quartum priuilegium, non solum quod omne maledictum effugit, quod simul mater & virgo; sed longè magis, quod eum peperit, qui omnem maledictionem sustulit, omnemq; benedictionem dedit: illum, inquam, peperit, in quo benedicendæ erant omnes gentes. O benedictum agrum, qui hoc frumentum protulit: ô benedictum thesaurum, qui eam gemmam cõseruauit: ô benedictum campum, ex quo flos iste prodiiit: ô beatam ouem, quæ hunc agnum genuit. Verè igitur benedicta. Benedicta æterno patri, cuius genu-

genuit filium : benedicta filio, cuius mater est : benedicta spiritui sancto, ex quo concepit : benedicta vniuersæ sanctæ Trinitati, cuius instrumentum facta est : benedicta Archangelis, quam tam sanctè & magnificè salutant : benedicta Patriarchis, cuius partum desiderauerunt omnes : benedicta Prophetis, cuius generationem prædixerunt : benedicta Apostolis, cuius natum illustrârunt : benedicta martyribus, qui eius partus causa vitam cū sanguine profuderunt : benedicta virginibus, cuius castitatem sequutæ sunt : benedicta viduis, quam in Helizabeth omnes beatam appellârunt : benedicta cunctis gentibus, à qua salutem accipiunt : solis euangelicis minus benedicta, qui se ab illius fructu ventris sponte separârunt. *Illam enim est, inquit S. Ephrem, spes patrum, gloria prophetarum, Apostolorum præconium, & honor martyrum, sanctorum lætitia, & lumen studiosorum, Abraam, Isaac, & Iacob; decus Aaron, Moyses, & Gedeon vellus, Hierarcharum cœtus, & omnium sanctorum ac virginum corona ob fulgorē inaccessa, acerna aurea, lucerna micantissima, vna cæli manna gestans, tabula scriptam legem ferens mortalibus, arca vera, charta diuinissima, omnium princeps circumspecta et lucifera virgo, consolatio sanctissima, & omnium dux sacratissima virgo; & ided sublimior cælicolis, purior solis radiis, & splendoribus;*

In oratione
de laud. be-
atæ virginis.

*honoratior Cherubin, & Polyommatis, id est, multo-
culis spiritibus; sanctior Seraphin, & nulla compari-
tione cæteris omnibus superis exercitibus gloriosior.*
Age verò, mulieris propria est laus, liberos pare-
re; maxima post virginitatem dignitas, summum me-
ritū ac benedictio. Vnde Ambrosius, coniugij præ-
mium, & gratiam nuptiarum, partum esse foemina-
rum docet. Declaravit hoc aliquando Cornelia Sci-
pionis soror, Grachorum mater: ad quam cū vi-
cina sua venisset, ac sua ornamenta apud illam iac-
taret, expectasse dicitur, dum filii sui è schola re-
dissent; qui ubi aduenissent, dixisse fertur: Atqui,
ista sunt mea ornamenta. De qua illud etiam scri-
bitur, dum, ob orbitatem mœstā, quidam solaretur,
eam respondisse, se infelicem esse non posse, quæ
Gracchos generauerit. Quod idē longè ante quan-
dam fecisse Lacænam legimus, apud quā cū mul-
lier quædam Ionica, quadam textura gloriaretur,
quòd esset sumptuosa; Lacæna quatuor ei filios
præclara indole præditos ostendit: Talia, inquit,
oportet esse bonæ probæq; mulieris opera, & in his
extolli atque gloriari. Quod similiter D. Paulus do-
cet: Ornamentum & meritum mulierū liberos esse.
Quæ igitur nobilissimū ex omnibus partum in mun-
dū edidit; eam inter omnes maximè benedictā esse
oportet. Partus autē Mariæ quis & qualis? ipsa sola
filij

filij eius mater est, quod nulli vnquam foeminarum
 contigit, cuius solus Deus pater est: Hocque illud
 maximū creaturæ priuilegiū est, inquit Bernardus,
 vt filium suum eundem cum Deo patre habeat com-
 munem, mater redemptoris & iudicis simul. Perue-
 niste Ecclesia, Genuisti, inquit, natura mirante tu-
 um sanctū genitorem. Cui enim vnquam Angelorū
 aut beatarum mentiū, illud verè licuit vsurpare: *Fi-
 lius meus es tu, ego genui te.* & illud: *Fili, quid fecisti
 nobis sic ego et pater dolentes quærebatamus te.* & illud:
Fili vinum non habent. sufficit angelis illud occine-
 re: *Sanctus, Sanctus, Sanctus Dñs Deus Sabaoth.*
 Matris hæc est prærogatiua propria, matris decus.
 Benedicta item in mulieribus, ex illo priuilegio,
 quòd ipsa super omnes mortales Deo familiarissi-
 ma fuit. Nam, quòd nunquam vlli concessum est,
 nec concedetur vnquam, ipsa Deum nouem men-
 sibus in vtero portauit: ipsa Deum vbere de cælo
 pleno lactauit: ipsa Deum multis annis suauiter e-
 ducauit: ipsa Deum sibi subditum habuit: ipsa Deū
 in amplexibus & osculis familiarissimè cōtrectauit.
 Vnde Augustinus: *Nec mirum Maria, vt dignetur
 tibi congaudere Deus regnans in cælis, quem paruulū
 ex te hominem natum, toties osculata es in terris.* Præ-
 clarè igitur concludit Andreas Ierosolymitanus: Ac
 verè quidē benedicta; nam benedixit te sibi ipsi De-

In Deiparæ
 salutationem

us in tabernaculum : quoniam paterna gloria superabundantem hominem Christum Iesum, eundem quoque Deum perfectissimum, iis naturis, ex quibus & in quibus constitit, ineffabili quodam modo in utero tuo gessisti. Benedicta tu in mulieribus, quæ caelestem thesaurum, in quo alii omnes sapientiæ, & cognitionis thesauri sunt reconditi, in tuto virginitatis tuæ velut promptuario liberrimè complexa es. Verè tu benedicta, cuius venter acervus quidam aræ : quoniam fructum benedictionis, spicam immortalitatis, Christum inquam, sine seminantis ac coloni opera, perfectissimè produxisti ; messem copiosam, infinita millia congratulantium sibi de salutis nostræ operario adduxisti. Tu verè benedicta, quæ sola præ matribus omnibus digna es habita, quæ esses mater conditoris tui. ac ita quidem, ut quæ matribus contingunt ignorares ; quippè quod ex te per partum prodiit, virginitatem tuam haud corrumpit ; nam qui formavit, idem quoque communiuit castitatis tuæ signacula. Reuera benedicta tu, quæ sola sine viro concepisti, & in utero eum gessisti, qui cælos expandit, ac virginitatis tuæ terram caelestem reddidit. Benedicta tu in mulieribus, quæ sola benedictionem es sortita, quam Deus gentibus per Abraham promiserat. Verè tu benedicta, ut, quæ benedicti pueri Iesu Christi servatoris nostri mater es. nua-

es nuncupata, propter quā gentes acclamant: Benedi-
 ctus qui venit in nomine Dñi, & benedictū nomē
 gloriæ eius sempiternum; & implebitur gloria eius
 vniuersa terra, fiat, fiat. Benedicta tu inter fœmi-
 nas, quam beatam omnes generationes prædicant:
 reges glorificant: potentatus adorant: cuius in cō-
 spectu ditissimi ex populo dona litant: quam & à
 tergo sequentes & præeuntes virgines in regis tem-
 plum comitantur. Pensa si potes, inquit Richardus, Lib. 2. Eman-
cap. 25.
 quæ & quanta sit ista mirificentia; virginem concipi-
 pere, virginem parere, & post partum virginem per-
 manere? Æstima si vales, quæ & qualis ista mirifi-
 centia; partum virginis, ab hora conceptionis suæ o-
 mnem plenitudinem accipere, & in humanitatis ve-
 ritate, plenitudinem diuinitatis obtinere? Singula-
 ris gloria, specialis est gratia beatæ virginis Mariæ;
 quæ cum virginitatis honore genuit & peperit fili-
 um, nec qualem cunq;, sed Deum. Meritò igitur di-
 ctum, meritò dicendum: *Benedicta tu in mulieri-
 bus, & benedictus fructus ventris tui.* Verè benedi-
 cta, inquit Chrysologus, quæ & virginitatis possi-
 det decus, matris & pertulit dignitatem. Verè be-
 nedicta, quæ & diuini germinis suscepit gloriam,
 & regina torius extitit castitatis. Verè benedicta,
 quæ fuit maior cælo, fortior terra, orbe latior. Nam
 Deum, quem mundus non cepit, sola cepit: porta-

Sermone 143;

De excellētia
virginis Ma-
riæ. cap. 3.

Idem cap. 4.

uit eum, qui portat orbem : genuit genitorem suū :
nutriuit omnium viuentium nutritorem. Quæ om-
nia euangelico fundamento nituntur : quoniā san-
ctæ mulieris Elizabethæ tum verbis tum exemplo
consonant : quæ non humano, sed prophetico spi-
ritu permota, imò & spiritu sancto repleta; non mo-
dò matrē domini reuerenter excepit ; sed illud etiā
ingenuè proclamauit : *Benedicta tu in mulieribus ,*
& benedictus fructus ventris tui. Et Anselmus : V-
num filium sibi consubstantialē, coætēnum, om-
nipotentem, ex sua natura sine initio Deus pater ge-
nuit ; & per eum, omnes creaturas, visibiles & inui-
sibiles ex nihilo fecit. Hunc igitur sibi tam vnicū;
quā dilectissimū, & in omnibus omninò æqua-
lem, non passus est remanere solummodo suū; sed
eundem ipsum voluit in rei veritate, esse beatæ Ma-
riæ vnicū & dilectissimū, & naturalem filium.
nec ita vt duo essent; vnus videlicet filius Dei, alius
filius sanctæ virginis Mariæ : sed vnus idē ipse, qui
filius Dei, in vna persona esset filius sanctæ virginis
Mariæ ; & qui filius sanctæ Mariæ, vnus & idem ip-
se esset in vna persona filius Dei. Cū autem amo-
rem, quem pater & mater singuli debent filio suo ;
debet hæc felicissima matrū sola filio suo : amorem
etiam, quem debet quilibet filius simul suo patri &
matri; debet hic dilectissimus filius solus matri suæ.
Nam

Nam sicut alii filii nascuntur ex patre & matre; ita filius eius, natus est ex ea sola matre. Excedit itaque omnes amores parentum in filios, aut filiorum in parentes, amor istius matris in filium suum; & istius filii in matrem suam. Quam verò retributionem sui amoris sit adepta, tota christianitas nouit; quæ illam super omnes cælos exaltatam, & angelicis choris prælatam certissimè credit. Benedicta igitur inter mulieres; quia *benedictus fructus ventris tui est*: non quia tu benedicta, idè benedictus fructus ventris tui; sed quia ille te præuenit in benedictionibus dulcedinis, idè tu benedicta. Verè etenim benedictus fructus ventris tui, in quo benedictæ sunt omnes gentes; de cuius plenitudine tu quoque accepisti cum cæteris, etsi differentius à cæteris: ac propterea quidem tu benedicta, sed in mulieribus; ille verò benedictus, non in hominibus tantum, non inter angelos; sed super omnia Deus benedictus in secula. Fructus, de quo comedens Adam protoplastus, euomuit veterem illam deuotionem, qua deceptionis escam sumpserat. Atque hæc est illa summæ Trinitatis salutatio; hæc est virgini nulli communicata gloria, hoc primum totius euangelii procemium: à quo meritò illi, qui verbo præsent, in Catholica Ecclesia suas ordiuntur doctrinas. & hæc eius interpretatio longè dispar ab illa à spiritu hæretico.

And. Ierosolymitanus.

retico profecta, apud Brentium atque Caluinum, in qua nihil cæleste, nihil diuinum resonat; sed proiecta omnia, atque humi repentia: & quæ aut Aspæfiæ aut Corneliæ, ne quid durius dicam, rectè possent attribui: *Aue gratiosa*, inquit isti, *cuius conuictum & consuetudinem pleriq; omnes ambiunt; Benedicta seu prædicata præ omnibus mulieribus, ut de qua omnes omnia bona dicant, & quam laudent vehementer.* Deprimere hoc potius quàm laudare est. Et multi quidem multa in laudem matris Dei, ita uti dignissima est, in medium adferunt; nihil tamen aut maius aut sublimius illi dari potest, quàm ut sit plena gratia, plena Deo, plena benedictione. Ac proinde ipsa ecclesia, nihil magis frequentat, nullis sæpius eam virginem compellat titulis, nihilq; frequentius in ore suorum resonare vult, quàm eam ipsam tàm raram, tàm inusitatam, tàm honorificam salutationem. Hinc illæ coronæ, illi pinaces, & alia. Videt hoc Diabolus, videt & inuidet: ac ex aduerso, à nulla re suos magis arcet, nullam ex illorum manibus excutere magis conatur, variisq; artibus eleuare quàm eam ipsam salutationem. Torquent enim, vruntq; inuidissimū veteratorem tàm sublimia verba, tàm illustres tituli: hic naturæ humanæ honos: tanta matris Dei, quam ille summè odit, sublimitas: videt consilia sua consultori fuisse pessima: videt fraudes

fraudes suas deductas esse. At quibus argumentis hoc efficere conetur, audiamus. *Quod si* (inquit Calvinus alter post foedum illum Copronymum beatæ virginis impugnator) *Mariæ felicitas, iustitia, & vita ex gratuito Dei amore fluunt; eius virtutes totaque excellentia, mem est Dei liberalitas: plusquam præposterè faciunt, qui ab ea petendum docent, quod aliunde nobiscum habet.* Ter hoc loco cōtra id, quod verum est, loquitur Calvinus: Primùm virginē sanctam nihil suum ad tantam attulisse gratiā; Contrarium enim dicit Helizabet: *Beata, quæ credidisti.* sed & ipsa: *Quia respexit humilitatem ancillæ suæ.* Luc. 1. Secundò, illud falsum est, nos gratiam Dei ab illa petere. Quibus enim Ecclesiæ precibus id demonstrare potest? Tertiò dicit, præposterū esse, ab aliquo petere, quod aliunde nobiscū habet. Hac igitur ratione præposterè Paulus, se suosq; labores ecclesiis cōmendaret: hac ratione frustra fieret pro Petro in carcere constituto oratio ab ecclesia: hac ratione tota communio sanctorum tam cælestis, quàm ecclesiasticæ Hierarchiæ præpostera esset, mutuæque purgationes, illustrationes, perfectiones beatarum mentium: hac ratione tota extingueretur charitas, quia præposterum est ab alio petere, quod aliunde nobiscum habet. Nec discipulus igitur aliquid à magistro petet, nec mendicus ab eo qui aliquid

In. expositi-
one liturgiæ
cap. 52.

habet. *Nimis verò crassa inscitia*, (fundit sapientia verba Caluinus) *Papistæ salutationem hanc, quasi magico exorcismo, in preculam verterunt.* Bis hoc loco sciens hallucinatur Caluinus: primò, quia non soli Papistæ, sed vniuersus tam oriens, quam occidens orbis, Græci, Armeni, Æthyopes, imò omnes, præter Iudæos, id faciunt: deinde, quòd ea tanquam precula, ac non potius vt salutatione atq; gratulatione vtamur, indeq; salutationem Angelicam communiter appellamus: longè enim plura argumenta laudis, quàm orationis, teste magno Cabbilla, per eam virginem, eiusq; partum consecuti sumus, plura accepimus, quàm amplius impetrare possumus. *Atque eo prorupit yefania, vt concionatoribus fas non sit, inquit ille, spiritus gratiam pro suggestu petere, nisi per suum Ave Maria.* Hoc omninò falsum est, non licere alio modo concionatoribus sermones suos ordiri: more tamen receptum est, vt hoc idem principium doctrinæ suæ conuenientissimè nostri faciant, quod totius Euangelij initium fuit; vt ad quam salutationem, verbum æternum summi patris in utero virginis incarnatum est, ad eandem in mentibus fidelium, verbum prædicationis concipiatur. Deinde addit: *Atqui præterquã, quod sola gratulatio hîc habetur, temerè sibi alienum officium usurpant, quod Deus non nisi Angelo iniunxit.*

Teme-

Temerè igitur fecit Elizabeth, dum in eadem verba prorupit: *Benedicta tu in mulieribus, & benedictus fructus ventris tui.* temerè ipsa virgo prædixit: *Ecce beatam me dicent omnes generationes.* Ergo ne Daudidis quidem, aliorumque prophetarum erit v-tendum verbis, quibus ipse Christus plerunque v-titur, ne nobis temerè alienum officium assumamus. Quòd si hæc ita sunt, vt dicit; probet ergo ad solos Angelos pertinere illud dictum: *Euangelizo vobis gaudium magnum, quod erit omni populo.* ita vt nullus Euangelij doctor, etiam in Christi natalicio die, verba eadem pro concione sibi sumere, & iis populum loco Angeli excitare possit. Probet canticum Angelorum: *Gloria in excelsis Deo.* & quod apud Isaiam extat: *Sanctus, Sanctus, Sanctus,* ita cælestium spirituum esse proprium; vt nobis & ecclesiæ non liceat, nec deceat eadem verba vsurpare. Probet demùm, quod Raphaël Thobiæ dixit: *Gaudium tibi sit semper. Pax tibi.* id à nobis ad loquendi consuetudinem nullo modo transferri posse: quemadmodum hoc loco asserit Gabrieli duntaxat has voces: *Aue gratia plena,* seruari & relinqui oportere. Concludit demùm totā causam duplici errore: *Bis stulta,* inquit, *emulatio, quod absentē salutant.* Bis stulta Caluini reprehensio. Nam ipse Calvinus ab eo qui abest docetur, Luca, inquam, quem interpreta-

tur. Quos item vnquam Paulus salutauit nisi absentes? per literas dicet: Et nos. mediante Deo, qui sanctis suis reuelat omnia; & Angelis eius, qui orationes nostras deportant, inseruientibus, virginem salutamus. Tabellarionē tu plus Caluine credis tuamunera deportanti; an angelo preces poenitentiasque nostras deferenti? Sed hæc est vestra vefania. Absentē tu putas: at non ita censuit Germanus Patriarcha Constantinopolitanus, cuius illa sunt verba: *Spiritus tuus, o Maria, viuit in æternum, & caro tua in sepulchro corruptionem non sustinuit. Omnia obseruas. ac contueris, & inspectio tua ad omnes se porrigit. Quamuis autem oculi nostri, impediti detineantur, ne te videre queant: tu tamen sanctissima virgo dignis te ipsam patefacis, ac tacite manifestando insinuas; caro enim tua, spiritus tui virtutem & efficacitatem nihil quicquam remouetur. Imitatione dices virginem esse colendam potius, quàm salutatione. Illud quidem oportet facere, vt verbis Saluatoris respondeā: sed hoc non prætermittere iuxta illas conceptas Ecclesiæ Dei formulas: Ut quos veneramur obsequio, corūpium iugiter experiamur auxilium: vt quorum natalicia colimus, per eorū ad te exempla gradiamur: vt quorum gaudemus meritis, accendāmur exemplis. Præsta nobis ex eorum imitatione proficere, et oratione fulciri. Per Iesum Christum Dominum nostrum, &c. Bis stultam.*

Serm. 11. de
virginis assumptione.

tam vocat æmulationem homo tumidus. At non idem ante multa secula sensit Sibylla, quæ iisdem penè verbis Angelicis eadem virginem compellat:

*Gesti læta puella: tibi nam gaudia semper
Duratura dedit cæli terræq; creator,
In te habitaturus, tibi lux æterna manebit.*

Non idē vetustissimi patres. In quibus est D. Atha De sanctiss.
Deipara.
nasilus Dux Christianæ professionis primarius, qui in hunc modum iisdem verbis, virginem à cunctis; non mortalibus tantum, sed à cælitibus etiam salutari docet: *Ecce iam nunc, & in exordio diei, ut primitias laudis tibi hoc encomium Archangelus contexit dicens: Ave gratia plena, Dominus tecum, beatam te prædicant omnes Angelorū et terrestriū hierarchia, et hierarchicas manus attolentes benedicunt tibi, quæ & in cælis benediceris, et in terris beata prædicaris: Benedicta tu inter mulieres, benedictus fructus ventris tui. Istiusmodi enim benedictionib⁹ te celebrat prima acies, quæ ex thronis Cherubinis et Seraphinis cōstat, qui aut flammei, aut magni regis Dei cognitores appellantur: Beata tu in mulieribus, & beatus uterus tuus Dei gestator, & vbera, quæ ille adhuc infantulus suxit. Secundā verò hierarchia, quæ in se dominationes, virtutes, potestatesq; cōplectitur, ad te respectans clamat, ut potè quæ hæc didicerit à sublimiori hierarchia, priusq; initiata sit: Benedicta tu in mulieribus, & benedictus ven-*

terruis, qui Deum concepit, & mamillæ quæ Deum
 educauerunt puerum factum. Iam tertia ex principi-
 bus, angelis & archangelis acies, quibus permissum
 & mandatum fuit, à Deo emittente, ut per unum Ga-
 brielem archangelum ederet splendidissimum & capa-
 cissimum hymnum in hæc verba: Ave gratia plena,
 Dominus tecum. Ab istis deinde nos hierarchiæ terre-
 stres, exaltationes Dei in gutture ferentes, siue quod
 didicimus, siue quod mutuo hæc verba sumpserimus,
 exaltamus te magna & canoni voce dicentes: Ave gra-
 tiosa, Dominus tecum; intercede hem, & domina, &
 regina, & mater Dei pro nobis. Quoniam ex nobis tu
 oriunda es, & is qui editus est ex te carnigerus, Deus
 noster est, quem decet gloria, & magnificentia, omnisq;
 honor & adoratio, & gratiarum actio, cum patre ini-
 tij experte, & cum sancto bono viuifico spiritu, & nunc
 & semper, in secula seculorum. Et Athanasius quidem
 sic. Gregorius verò Nazianzenus in suo Christo-
 patiente hunc in modum:

Ave parens, & virgo, plena gratia,
 Pulcherrima & summa inter omnes virgines:
 Chorisq; cunctis celsior cælestibus,
 Regina cæli, delitiæ mortalium,
 Semper tuere vultu propitio tuos:
 Mibi salusq; sis ubique maxima. D. Ephrem:
 Ave Dei splendidissimum & luculentissimum vas.

ave

De sanctiss.
 Dei matris
 laudibus.

Salutē.

79

aue domina Maria, gratiæ plena: aue in mulieribus
 virgo beatissima: aue stella fulgentissima, ex qua Chri-
 stus prodiit: aue illustrissima lux, mater et virgo: aue,
 quæ mirificè regem omnium peperisti: aue, per quam
 sol nobis præclarissimus illuxit: aue domina cunctis su-
 blimior: aue canticum Cherubin, & hymnus angelo-
 rum: aue pax, gaudium, & salus mundi: aue generis
 humani letitia: aue patrum præconium, & propheta-
 rum decus: aue martyrum pulchritudo, & corona san-
 ctorum: aue piorum gloria, & in solitudine degentium
 hymnus: aue præclarissimum hierarcharum cælesti-
 um ornamentum: aue hymnographorum omnium ora-
 tio: aue præstantissimum orbis terræ miraculum: aue
 terrigenarum omnium delectatio: aue paradysæ delici-
 arum, & immortalitatis: aue lignum vitæ, gaudium
 & voluptas: aue vallum fidelium, & mundi salus: a-
 ue tranquille portus, & à fluctibus agitatorum libera-
 trix: aue nostra periclitantium auxiliatrix: aue pro-
 genitoris illius Adam resurrectio: aue iucunda liber-
 tas: aue omnium parens: aue flos gratiæ & consolati-
 onis: aue refugium peccatorum & hospitium: aue pro-
 pitatorium laborantium: aue refugium in Ierosoly-
 mis: aue throne mei creatoris gloriosissime: aue cui
 splendor illustrissime, & micantissime: aue spes omni-
 um proborū aduersis casibus afflictorum: aue conuer-
 sorum refugium: aue virorum iuxta mulierumq; regi-
 na. &

*na & tutela: aue mundi mediatrix gloriosissima: aue
 vniuersi orbis terrarum conciliatrix: aue domina, sce-
 ptrum fidelibus tuis imperans: aue gloria & letitia o-
 mnium sacerdotum: aue virgo solatium solitariorum:
 aue porta cælorum, ascensus omnium: aue resenamen-
 tum portarū paradysi: aue quæ mærores sedasti, ador-
 natrix omniū: aue eadem, quæ leniisti oppressorū mole-
 stiam: aue clauis cælorum, & regni Christi: aue portus
 optime huius vitæ nautarum: aue animæ meæ spes bo-
 na & fida: aue Christianorum omnium firma salus:
 aue lumen præfulgens, quo mundus illustratur: aue
 mater Christi filij Dei viui: aue nostra genitorum pro-
 tectio luculenta & gloria: aue, quæ nullo spatio com-
 prehensum in sinibus comprehendisti: aue, quæ Chri-
 stum vitæ datorem educasti, Christum omniū pietissi-
 mum creatore, Deum, dulcem Iesum meum. Damasce-
 nus itē similiter: Quod tibi condignum canticum hæc-
 cine nostræ proferet imbecillitas nisi gaudij primū, quod
 que nos edocuit sacerdos Gabriël: Aue genitrix virgo,
 et mater innupta. Et veteres quidē in hunc modū: nec
 frustra: Ipsa enim virgo, hoc idem ita futurum esse,
 id est, hac eadem salutatione benedicendam se iri
 in cunctis generationibus prædixit: Ecce enim, in-
 quit, ex hoc beatam me dicēt omnes generationes. Quia
 fecit mihi magna, qui potens est, & sanctum nomen
 eius. Et Ecclesiasticus: In multitudine electorū habebit*

Luc. 1.

Eccle. 24.

hæc laudem, & inter benedictas benedictionem. Quod qui nō faciunt, illi facilè se probant non esse de illo grege, de illis generationibus, de illa ecclesia; cui dictum est: Benedicti vos à Domino, qui fecit cælum & terram. Hocq; ipsum non mediocre esse veræ ecclesiæ Dei indicium, alicubi diximus: eam veram ecclesiam esse, vbi mater Dei iuxta eiusdem vaticiniū benedicta prædicatur: vt eam, quæ id obscurat, vel aufert, sathanæ synagogam censeretur. Dum in præsentī vita esset, eam salutationē virginī competuisse, nō autem in gloriam translatae musitabunt alii. At nos sic profiteamur, & sic virginē salutamus certo persuasi, quicquid gratiæ in Maria primū laudauit Gabriel; id non solum post conceptionem verbi in matris vtero; sed etiam post virginis in cælos assumptionem, ingentes accepisse profectus, & longè perfectiorem habere sensum; & in illam à quocunq; demū salutetur pulcherrimè quadrare. Quando enim illa sic in terris vnquam plena fuit gratia, sicut hoc tempore, quo post peractum diuinæ dispensationis mysterium, & gratiæ & gloriæ bonis in cælo sempiternis affluit? Quando magis cum illa Dominus, quàm eo loco, vbi sine impedimenti, quæ mortales à vita cælesti remorantur, diuini vultus gloria perfruitur, & cum regnante filio coniunctissimè viuit? Quando autem rectius ac plenius

Canisus de
verbi Dei
corruptelis.
Tom. 2. lib.
3. cap. 10.

nus inter mulieres benedicta, quàm cum perfecta & exhibita sunt illi, quæ matri suæ filius, & munera & præmia præparauit, donauit, impendit. Iudit quidem vsque ad hanc diem, Ioachim sacerdotis verbis, quibus illi redeunti, & defectum tyranni caput apportanti, gratulatus est, salutat vniuersa gens Iudaica: *Tu gloria Ierusalem: tu lætitia Isræl: tu honorificentia populi nostri, quia fecisti viriliter; & confortatum est cor tuum, eò quòd castitatem amaueris; & post virum tuum alterum nescieris: & ideò manus dñi confortauit te, & eris ideò benedicta in æternum.* Nos matrem Dei summæ Trinitatis salutatione nō salutabimus? Sed non alia de causa arcet veterator ille suos, ab eo, ne dicant, Benedicta tu in mulieribus; quàm ne cogatur illa, quæ sequuntur, & quod istius causa est, vt ostendimus, fateri: *Et benedictus fructus ventris tui.* Quod quidem planè ita cōsecutum esse videmus. Qui enim paulò antè matrē Dei benedictam compellare erubescabant; isti nūc benedictum fructum ventris eius dicere erubescūt. Quinimò hoc agit, ne summa Trinitas laudetur: ne summi beneficii memoria colatur. Honoratur enim hac salutatione pater æternus, cū grati agnoscamus; quòd ipse pro summa potentia sua, vt mundum perditum renouaret, foemineum sinum tanti muneris, atque boni capacem, reddiderit. Honora-

tur.

tur filius Dei, cum immēſæ illius erga nos charitati gratias agimus; quòd in vterum virginis de sinu patris vltro descenderit; quodque mortalem carnem assumptam, vnà cum anima, naturæ suæ diuinæ vniuerit, ac vnitā supra omnia exaltauerit. Honoratur & spiritus sanctus, cum eius bonitati acceptum ferimus; quod in Maria virgine, tanquam venerando sacrario ad communem mundi salutem, mirabiliter conceptum ac formatum fuit, vt illic sacrosanctum diuinæ incarnationis mysterium celebraretur; ac initio à Maria facto toti mūdo manifestaretur. Non ergo bonus quis, aut cordatus, de eo dubitauit, aut dubitabit vnquam; num hæc talis virgo hac ipsa Angelica salutatione sit compellanda. *Iure enim,* inquit Hesychius, *proculdubio omnis grati animi lingua salutat virginē et deiparam, ac pro viribus Gabrielis Angelorum principem imitatur,* qui hac causa de cælo descendit, qui ad hoc ipsum missus est ad virginem, vt eam nouo & inusitato ornaret & exhiberet præconio. Illud potius inquirendum est, quis hæc diuina cælestaq; sanctissimæ Trinitatis verba usurpare possit: cū ad eam ipsam rem, angelica vita & castimonia, virginisque matris quiete opus sit. Præclare enim inquit Anselmus: *Supereminentem omni, quod post hominem Deum creatum est, excellentiam beatæ matris Dei, quomodocunq; & saltem lip-*

pienti oculo cordis contemplari anhelans; & contem-
 plando, quod mihi inde capere conceditur, ad commu-
 nem notitiam proferre desiderans: horreo peccatorum,
 quibus premor, enormitatem; & valde timeo, ne mihi
 tanta alta petenti obiiciatur mox hoc sacræ scripturæ
 dictum: Tollatur impius ne videat gloriā Dei. Emun-
 demus igitur nosmetipsos: ac tum demum vitam
 angelicam induti, vocem cum Angelo identidem
 efferamus: *Aue Maria gratia plena, Dominus te-
 cum.* Nec vnquam erubescamus, quod omnis anti-
 quitas non erubuit, quod ipsa malignantium eccle-
 sia erubescit: Domino enim benedicente, benedicta
 erit in perpetuum: *Benedixit Dominus terram su-
 am, auertit captiuitatem Iacob: benedixit benedicen-
 tibus eam, maledixit maledicentibus eam.* Quotquot
 igitur hîc adsumus fideles, cum Gabriele (Fremat
 licet ac rumpatur infernus, & angeli eius) acclame-
 mus virgini: *Aue Maria gratia plena: & millice
 Aue: Dominus tecum: benedicta tu in mu-
 lieribus, & benedictus fructus
 ventris tui IESUS.*

Amen..

EVANGELII SALVTIS

Siue de incarnatione,

SERMO TERTIVS.

*Quæ cum audisset, turbata est in sermone eius,
& cogitabat qualis esset ista salutatio, & ait
Angelus ei: Ne timeas Maria, inuenisti e-
nim gratiam apud Deum, ecce concipies in
utero, & paries filium, & vocabis nomen
eius Iesus: hic erit magnus, & filius altissimi
vocabitur.*

IN ortu Samsonis, quem ad infringendam vim
Philistinorum, rector ille Israël Deus excitatu- Iudic. 3.
rus erat, natiuitas eius in hunc modum matri cæli-
tus denunciatur: *Sterilis es, & absque liberis; sed
concupies & paries filium, erit Nazareus Dei ab in-
fancia sua, & ex matris utero; & ipse incipiet libera-
re Israël, ex manu Philistinorum.* Umbra hæc fu-
it huius diuinæ ac cælestis, quam nunc interpreta-
mur legationis. Sterilis ibi conceptura denuncia-
tur, quod difficile; hæc virgo, quod impossibile est.
Nazareum illa paritura dicitur; hæc filium altissi-
mi, & sanctum sanctorum: liberatorem vnus gen-
tis illa; hæc totius mundi saluatorem: temporale

gaudium illa; hæc æternum, & immortale: vnius populi illa; hæc gentium omnium. Cuius quidem legationis cum primam iam partem explicauerimus, Salutationem, inquam, donorumq; oblatione: gaudij, gratiæ, præsentia diuinæ, ac ipsius benedictionis. Nunc reliqua quæ sequuntur videamus.

Quæ cum audisset turbata est in sermone eius. Turbata est; sed non perturbata. Turbata est: non risit sicut Sara, quæ ideò accusata: non desperauit sicut Zacharias, qui factus ideò mutus: non temerè acquieuit sicut Eua, quæ dum efferretur cecidit. Cuius turbationis modum, iam olim Sibylla concinnè graphicèque descripserat:

Nuntius: hinc tali affatur sermone puellam.

Accipe virgo Deum gremio, intemerata pudico.

Sic ait: ast illam cælestis gratia molli

Leniit afflatu, cum virginitatis amatrix

Perpetuæ, magno subito correpta stupore

Atque metu, trepida pressit formidine mentem:

Ignotis verbis commoto corde tremiscens.

Turbatur virgo suum paritura parentem, non ob personam Angeli ignotam; sed ob salutatione eius inusitatam. Non enim Angelum, (quæ cælestibus Angelorum visionibus assueta erat) sed verba & salutationem Angeli mirabatur; cui nunquam simile virgo sapientissima audierat, utpotè quæ illi soli, ut inquit

inquit Origenes, seruabatur. Exquirebat cogitatione, quis, & vnde ingressus, qui tale nuntium portet. *Trepidare virginum est*, inquit Ambrosius, & *ad omnes viri ingressus extimescere*. In vasis enim fictilibus pretiosum ferunt thesaurum. Voluebat animo prudentissima virgo, primorum lapsum parentum, deceptionis Eux casum: benedictionis notam formulam mirabatur. Audiebat se beatam dici in mulieribus; quæ in virginibus semper benedici voluit. Audiebat se, quæ nuper serua & ancilla matris Dei esse optabat, illam ipsam esse gratia plenam: Dominum habere præsentem: benedictam in mulieribus. Repetebat præteritam suam humilitatem, & examinabat præsentis salutationis sublimitatem. Quantò enim humilior erat cunctis mortalibus, (ex qua causa sublimior facta est omni re creata) tantò eam magis tam inusitato honore ac inauditis titulis cõmoueri oportebat. Abraam profectò, ipsum patrem omnium credentium, Isaäc itẽ, & Iacob, tali nuntio perturbandos fuisse credo. Moyses quidem, ad aspectum rubi ardentis, vbi Deus erat, obstupuit: hæc ipsa hic rubus incombustus facta est. Dauid certè ad minora stupefcit: *Quid est*, inquit, *homo, quòd memores eius, aut filius hominis, quia visitas eum?* Zacharias & senex & sacerdos, ad aspectum & affatum Angeli, non tantum

tùm turbatus est, sed timor irruit super eum, inquit diuina scriptura; at nihil horum virgo. Turbatur quidem illa, vt dixi, sed non perturbatur. *Turbatur igitur*, inquit Gregorius, *cum verecundia, quia pauebit cum prudentia*. Vtinam prima mater nostra Eua, tum, cum à serpente insidiosè Dea salutabatur, ac fraudulentis pollicitationibus decipiebatur, sic turbata fuisset; nunquam profectò, in eam calamitatem & nos, & seipsam coniecisset. Vtinam & nos ad ea, quæ speciosa, quæ magnifica, quæ iucunda mundus & Diabolus obiicit, turbaremur, ac cogitaremus, qualis esset ista saluatio. Offert iuueni mundus formæ alicuius excellentem dignitatem, diceret: qualis est ista saluatio? offertur ambitioso, aliquis insignis honor, venit hic & ille, porrigit quærendi honoris conditionem, diceret: qualis ista saluatio? offertur avaro, præsentis spes lucri, diceret similiter: qualis ista saluatio? Vtinam Germania & Polonia, duæ gentes pietate quondam insignes, tum, cum Lutheranismus & Calvinismus exoriebatur, ac supra omnē potestatem efferebatur, ac cum illis cælum, sine omni virtutis studio, promittebatur; cum non ieiunandi, non orandi, non obediendi potestas larga commendabatur, paulò conturbatæ fuissent, ac cogitassent, qualis esset ista saluatio: non fuissent pro-

profectò nunc vsq. adeò perturbatæ. Scit enim Diabolus se transformare in Angelû lucis : scit fingere : scit multa polliceri. Rectè enim monet Ioannes A-^{1.} Ioan. 4. postolus, non omni spiritui esse credendum, sed probandum, num sit ex Deo. Probatio autem spirituum hæc est : Angelus lucis terrorem primùm incutit ; vnde pastores viso angelo timuerunt timore magno : & super Zachariam timor irruit : & Daniel ad aspectum angeli concidit, ac exanimatus est. *In eam enim miseriam*, inquit S. Damascenus, *incidimus, quòd etiam bonos angelos formidamus.* Mox tamen idem suauem consolationē adfert, quod nunc fieri videmus. Turbatur virgo primùm, mox confirmatur. at Angelus tenebrarum exhilarauit primò Euam, mox conturbauit & perdidit. Angelus lucis nihil terrenum, nihil prophanum adfert, nihil cum luxu, nihil cum ambitione, nihil cum auaritia coniunctum ; Angelus tenebrarum, nihil spirituale, cæleste nihil : ventri assentatur, carnem commendat, ambitione inflat : *Eritis*, inquit, *tanquam dij, scientes bona & mala.* pollicetur quæ ipse non habet : *Hæc omnia dabo tibi, si procidens adoraueris me.* Angelus lucis honorem Dei tuetur, veritatem eius astruit, curiositatem omnem excludit : *Spiritus*, inquit, *sanctus superueniet in te, & virtus altissimi obumbrabit tibi.* *Ecce Elizabeth cognata tua.*

M

Non

Non erit impossibile apud Deum omne verbum.
 At veterator quid? Deum mendacem atque fallacem, ipse mendacissimus & fallacissimus, probare vult: *Nequaquam* inquit *moriemini.* Angelus lucis, Dei bonitatem, liberalitatem, munificentiam, honorificentissimè celebrat: *Dabit*, inquit *illi dominus Deus sedem David patris eius, &c.* At Angelus tenebrarum, Deum invidum & malignum esse, ipse maximè invidus, calumniatur: *Scit enim Deus,* quod *in quacunque die comederitis ex eo, aperientur oculi vestri.* Angelus lucis, vestigia sua post se relinquit, humilitatem, charitatem, obedientiam: *Eccè,* inquit, *ancilla Domini, fiat mihi secundum verbum tuum;* quod humilitatis & obedientiæ est: Et, *Conspiciens abiit in montana,* quod charitatis. Angeli tenebrarum vestigia contraria sunt, fastus, odium, impietas, &, qui hæc sequitur omnia, interitus. Quæ omnia Eux primæ matri nostræ euenisse videmus. Et probatio quidem, ac discretio spirituum paucis explicata, hæc est. Turbatur igitur virgo, quod prudentiæ est; sed à recta ratione non deiicitur: turbatur; sed non excidit; cogitabat enim qualis esset ista salutatio, cui similem nusquam nec legit, nec audiuit vnquam. Cogitare de sapientiæ sensu, consummata sapientia est. Cogitabat ea, quæ legerat: dictis scripta comparabat: Eux la-
 psus

lapsum in mentem reuocabat : modum responsio-
nis meditabatur. Cogitabat illud , solané ego inter
mulieres benedicta ? sola gratia plena ? tantúmne
mecum Dominus ? solané ego nouum naturæ mo-
dum inducam ? solané res prolapsas restituam ? mi-
hiné soli tot prophetarum & patriarcharum voces
seruiant ? solané ego digna mater Dei iudicabor ,
virgo pauper , vili fabro desponsata ? Verè tu es De-
us , qui facis mirabilia magna solus. Cogitat , tacet ,
morum decore pro sermone vtitur. Tum Angelus :
Ne , inquit , *timeas Maria* , gaudeas potius quàm
timeas , *inuenisti enim gratiam apud Deum* , tantam ,
quantam nemo ante vnquam alius inuenit : neque
te , aut tuam istam humilitatem respicias , sed grati-
am : gratia totum est , quod est , quod tecum geri-
tur : quibuscunque nominibus atque laudibus ce-
lebraris , gratia est : inuenisti gratiam quam quæsi-
uisti : qui enim quærit inuenit. Addit Albertus ma-
gnus : Inuenisti gratiam , non creasti , vt Deus : non
semper habuisti , vt filius : non rapuisti , vt angelus :
non perdidisti , vt Adam : non emisisti , vt Simon Ma-
gus : non abscondisti , vt infidelis doctor. Remouet
ergo Angelus priùs timorem , antequam rem & cau-
sam totam explicet. Omnes enim illos qui de re-
bus magnis statuere debent , eniti oportet , vt ab
omni amoris , cupiditatis , iræ , & odij , metus item

affectu sint remotissimi. Hæcque illa causa est, senatores, cur publicam salutem mouemus, & promouemus nihil: quòd praua cupiditate præpediti in consilium venimus: quòd præiudicatas opiniones nobiscum adferimus. Quòd si turpè est, adolescentem motu animi perturbari vel abripi; quantò turpius, senem odio, inuidia, metu, cupiditate, priuatæ vindictæ studio obsessum, de illa repub. sententiam dicere; in qua & ipse viuit, & post se dulcia pignora, liberos, inquam, coniugem, nepotesque relicturus est? & in qua, & cum qua, tanquam cõmuni naue in naufragio, aut seruandus, aut submergendus sit, iamq. alios naufragantes videat? Si inter seruos animo cõspici nimis perturbato turpè est; in repub. certè turpissimũ. Liber sit igitur ab omni mētis perturbatione oculus, qui verum cernere debet. Hoc igitur agit Angelus: virginẽ solatur: pellit timorem: indicat gratiam: partum vaticinatur: futuræ prolis nomen exponit: virginem proprio nomine, tanquam domesticam & contubernalem, compellat. *Nec*, inquit, *timeas Maria*: non impostor serpens tibi iterum loquitur: non terrenus nuntius adsum: vitam, non mortem fero: inuenisti gratiam, qualem ante te inuenit nemo. Inuenisti autẽ gratiam, non apud Augustum Cæsarem, neque apud Herodem Regem, sed apud Deum, per quem, & à quo,

& à quo, Augustus, & Herodes ipse regnat. Et de Gedeone quidem dictum fuit, Dominum cum illo fuisse: & Iudith hunc in modū alloquitur Oſias princeps populi Iſraël: *Benedicta tu filia à Domino excelfo, præ omnibus mulieribus ſuper terram.* Qui autem gratia plenus ante Mariam dictus fuerit, non legimus. Hoc igitur quod illius erat proprium, & quod nunc primū exauditur, gratia plenam eſſe, repetit Angelus: *Inueniſti gratiam apud Deum: tua te humilitas, ô præclara virgo, terret, at gratia ſubleuet; neué putes rem meriti tantum eſſe, quantum gratiæ.* Inueniſti gratiam, non tamen ſine merito. Quod ita eſſe, præclare docet Iuſtinus martyr: *Quia non quamlibet è vulgo fœminam Deus delegit, quæ genitrix Chriſti fieret, ſed quæ mulieres omnes virtute anteiret: non abs re cuiusmodi virtutis nomine matrē ſuam beatam de prædicari voluit, per quam virtutem honore eo digna habita eſt, ut virgo mater fieret.* Et D. Anſelmus: *Nempè decens erat, ut ea puritate, qua maior ſub Deo nequit intelligi, virgo illa niteret; cui Deus pater vnicum filium, quem de corde ſuo æqualem ſibi genitum, tanquam ſeipſum diligebat, ita dare disponebat; ut naturaliter eſſet vnus, idemq; communis Dei patris & virginis filius, & quam ipſe filius ſubſtantialiter facere ſibi matrem eligebat, & de qua ſpiritus ſanctus volebat, & operaturus erat ut con-*

In lib. quæſt.
ad reſponſio-
nē quæſt. 136

De concepti-
one B virgi-
nis cap. 18.

In parte 3.
quæsti. 2.
ar. 11.

*ciperetur & nasceretur ille, de quo procedebat. Et D. Thomas, Beatam virginem dicit meruisse portare Dominum omnium: non quia meruit ipsum incarnari; sed quia meruit ex gratia sibi data, illum puritatis & sanctitatis gradum, ut congruè posset esse mater dei. Inuenisti gratiam, quam & Eua & omne mortale genus perdiderat. Inuenisti autem eam, quam non Sara, quamvis Abrahæ vxor, Isaaci mater: non Rachel, quamvis tot patriarcharum parens: non Betsabee, quamvis & marito & filio rege superba: non Ester, quamvis Assueri summi Monarchæ coniunx: non Iudith, quamvis benedicta præ omnibus sui seculi mulieribus, inuenit. Inuenisti gratiã, qualem ab æterno inuenit nemo. Causa igitur nulla est, cur non læteris potius, & animo exultes, quàm timere aut pauere debeas: exaltaberis supra cedros Libani, hoc est, supra etiam summos ordines nostros. Paueat prima Eua; iubilet secunda. Eris & pauper, & diues simul, quod nulli ante te contingit. Depulso metu, animoque virginis confirmato, id cuius causa missus fuerat, & quod summam tantæ legationis continebat, exponit: concepturam scilicet & parituram filium: ac quis iste, & qualis, ex ea nasciturus sit filius, explicat. Quomodo similiter vtrunque hoc matri Samsonis prædictum fuisse diximus. Zachariæ item: *Ne timeas Zacharia,**

ria, exaudita est deprecatio tua: Uxor tua pariet tibi
filium, & vocabis nomen eius Ioannem: & erit ma-
gnus coram domino: siceram & vinum non bibet. Nec
tamen suis verbis, sed ipsius Dei, per os Isaia prolata-
tis, ac virgini bene cognitis (ne res noua ac ex tem-
pore conficta, sed potius à multis seculis promissa,
præordinata, prædicata, totq; votis expetita esse vi-
deatur) summam totius causæ explicat: *Ecce, in-*
quit, concipies in vtero, & paries filium. Demonstnan-
tis, vel potius mirantis particula vtitur, in re nun-
quam antea audita. Decreuit pater cælestis nouo
modo rursus sibi ex te filium gignere, in tuoque v-
tero tanquam officina cælesti sacri toetus opificium
peragere. Paries filium à seculo electum: ab altis-
simo præcognitum, ac sibi præparatum: à patribus
præfiguratum: à prophetis promissum: nunc tibi,
inquit, reuelo mysterium, quale nulla ante secula
audierunt; imò verò, quale ne ipsa quidem lex
natura nouit, virginitatem simul cum partu, nu-
ptias cum integritate; vt non diffidas infantem
esse Deum. Quem mente & animo iamdudum con-
ceptum geris, & qui semper tecum est; eum nunc
nouo & nunquam vsitato modo in vtero conci-
pies: neq; erit vlla, aut naturæ, aut communis cur-
sus pariendi, aut potestatum tenebrarum vis tanta,
quæ eum partum impedire ac perturbare possit. Et
quem.

quemadmodum integro pudore & castimonia concipies; ita eodem modo sine dolore, sine grauedine, cum summa etiam spiritali voluptate paries. Virgo ante partum, & virgo post partum: & purior (si ita dicere licet) post partum, quàm ante partum. Splendor inaccessibilis visceribus tuis sese infundet. Paries autem, non tantum sine opere viri, sed etiam clauso signaculo vteri tui; ut sis virgo à viro, & virgo à partu. qua integritate concipies, eadem paries. Illi quidem aperta erunt omnia, non tibi, cui cæli aperti sunt ipsi. Ita enim transibit per vias clausas, ac si essent apertæ, ut post, sigillis non reſeratis, monumentum superabit: ianuis clausis coenaculum ingredietur: cælis conclusis in dextera patris confidebit: viæ tuæ regi aperientur; tibi autem clausæ iugiter manebunt. Paries autem filium, Dei imprimis, deinde tuum, ut sit idem filius hominis, qui est filius Dei; ut hi qui erant filij hominis, efficiantur filij Dei: *Quotquot enim receperunt eum, dedit eis potestatem filios Dei fieri.* Idemque erit partus vteri tui, qui & cordis est paterni, iuxta illud: *Erexit cor meum verbum bonum.* Ideo Dominus erit tecum, plus quàm tecum: Dominus tecum; sed non sicut tecum: tecum utique, tecum, non tantum sicut creator cum creatura, sed etiam sicut partus cum paritura: propter quem benedicta eris ante par-

ante partum, benedicta in partu, benedicta post ipsum partum; totaque maledictio Eua, in tuam mutabitur benedictionem. Eua audiuit, Cum dolore paries, multiplicabuntur æumnæ tuæ: Tu, aue & gaude, paries cum gaudio tuo, omniumque gentium salute. Ideò magnum & summum miraculum efficiaris ipsa: Stupendum enim est miraculum in cælis, mulier amicta sole: stupendum miraculum est in cælis, mulier gestans lucem in vlnis: stupendum miraculum in cælis, alter thronus cherubicus: stupendum miraculum in cælis, mulieris filius, qui & ipsius, & seculorum est pater: stupendum miraculum in cælis, thalamus virginis habēs filium Dei, Deum sponsum Christum. *Et vocabis, inquit, nomen eius Iesum; hic erit magnus, & filius altissimi vocabitur.* Et Abraam quidem iubetur, imponere nomen filio suo Isaac: eodem modo Zacharias pater, *Vocabis, inquit, nomen eius Ioannes.* Nunc vice versa, misso patre Iosepho, totum negotium committitur Mariæ: non aliam ob causam, nisi quòd illi quidem veri parentes filiorum suorum fuerunt; Ioseph non parens, sed custos & minister tantum, ut hac ratione honoretur virgo, ac, ut vera mater, ipsa suo imponat nomen vero filio. Confirmant hoc ipsi Hebræi, qui locum Isaïæ legunt ita: *Ecce virgo concipiet, & pariet filium, & vocabit ipsa nomen eius Emanuel:* eiusque rei eam

N adfe.

Matth. 1.

adferunt rationē, vel quòd Mefsias nō fit habiturus in terra patrem, qui ei nomen imposeret; vel quòd sola mater certò scire debebat Mefsiā Emmanuelē futurum, quod Deum & hominē designat. Quod & D. Lucas confirmat; *Maria inquit conseruabat omnia verba hæc, conferens in corde suo.* Quamuis & de Ioseph hoc ipsum apud Matthæum dictum esse legimus, non tamen primò & principaliter, sed vt puto partim fidei eius confirmandæ, partim ipsius nominis interpretandi causa, quod adhuc interpretatum non erat. Cæterū hoc loco illud nobis perquirendum est, quæ causa fuerit, quòd cū ab Isaia aliud nomen Mefsiæ impositum fuisset, Emmanuel nempè, quod nobiscum Deus significat: nunc aliud loco illius, Iesus nempè, quod saluatorem designat, imponatur: cū præsertim verbis Isaia, ita, vt diximus, Angelus vtatur. Abutebantur hoc loco contra Christum Dominum veteres Iudæi atque gentiles, tanquam verus Mefsias non esset, quòd scilicet non eo fuerit nomine appellatus, quod sibi per prophetas diuinitus impositum erat. Quibus in hunc modum, ex IVstino Martyre respondent docti, hæc scilicet eadem virtute nomina esse, ac nomine Iesu, nomen Emmanuelis contineri; & nomine Emmanuelis, nomen Iesu. Nam cū Iesus saluatorem designat, Emmanuel autem vt Euangelista

lista interpretatur, nobiscum Deus significet: profecto neq; verus omnium saluator esse poterat, nisi is, qui Deus & homo sit; & is, qui esset Deus & homo verus, debebat esse saluator. Verba Iustini hæc sunt:

Si in euangelicis narrationibus continetur euentus diuinarum de Christo prædictionum: nobisq; tradidit beatus Matthæus cum esse quem diuina prædictione statutum fuerit vocatum iri nomine Emmanuelis; nonne vocatur nomine Emmanuelis? Non intermisit autem sancta Dei ecclesia, ex doctrina sancti euangelij, Emmanuelē nominare Dominum. Habemus autem in nomine Christi, omnia alia Christi nomina comprehensa, etiamsi non omnibus semper utamur. Nec enim quia vocatur Emmanuel est; sed quia est, vocatur. Non dissimile quid Tertulianus, in libro contra Iudæos adfert: Porro, inquiunt, iste qui venit, neque sub cuiusmodi nomine est dictus, neq; re bellica functus. At nos è contrario admonendos eos existimauimus, uti coherentia quoque huius capituli recognoscant: subiuncta est enim & interpretatio Emmanuel, Nobiscum Deus, uti non solum sonum nominis expectes, sed & sensum. Sonus enim hebraicus, quod est Emmanuel, sua gentis est. Sensus autem eius, quod est Deus nobiscum, ex interpretatione, communis est. Quare ergo anista vox, nobiscum Deus, quod est Emmanuel, exinde quo inluxit Christus, agitur in Christo; & puto

Quæstione
135. ad ortho-
doxos.

ex toto non negabis. Nam qui ex Iudaismo credunt Christo, ex quo in eum credunt, Emmanuel cum vo-
lent dicere nobiscum Deum esse significant. Atque ita
constat iam venisse illū qui predicabatur Emmanuel,
quia quod significat Emmanuel venit, id est nobiscum
Deus. Idem lib. 3. contra Marcionem, iisdem ferè
verbis repetit: Hebræi autem nomen Emmanuel,
nomen naturæ esse dicunt, vtriusq; naturæ vnionē,
quæ in vtero virginis fieri debebat, designans: Iesus
verò nomen impositionis, quod saluator, vel salus
siue saluatio interpretatur. Et preclarè quidem hæc
isti, nobis tamen nescio quo pacto ea causa, quam
refert Clemens Alexan. in Pædagogo suo, magis
arridet. Messiam, propter eius excellentiam ac mul-
tiplicem functionem, pluribus nominibus vocari
debuisse: quorum magnam partem recenset Isaïas:
Vocabitur, inquit, Deus fortis, princeps pacis, &c.
Quæ omnia nomina eius, cum longè antè, quam
nasceretur, vt suis coloribus depictus melius cogno-
sceretur, debebant prædicta fuisse: vnum solum ta-
men par fuit tale nomen relinqui, quod à nullo an-
tea, præter ipsum solum vnum & verum Deum vsur-
patum illique impositum esset, iuxta illud Isaïæ: *Vo-*
cabitur tibi nomen nouum, quod os Domini nomina-
uit. Cum igitur nomen Emmanuelis iam olim per
Isaiam prædictum fuisset, nouo quodam nomine, &
à nul.

Isaïæ 62.

à nullo vnquam in Messia vsurpato, quod per os Dei prolatum, & cælitus per Angelum allatum fuisset, vocandus erat. Cuius imponendi priuilegium ipsi soli Deo patri ac sanctissimæ eius matri relinqueretur. Tale autem est nomen Iesus, nomen magnum, nomen mirificum, nomen nouum, nomen supra omne nomen, quod sapientissimus Salomon miratur: *Quod est, inquit, nomen eius, & nomen filij eius?* Isaias similiter: *Vocabitur tibi nomen nouum.* In cælum fert Paulus: *Dedit ei Deus nomen, quod est super omne nomen.* Qua autem ratione & modo sit hoc tantum & tale nomen supra omne nomen, paucis videamus. Nominis cuiusque dignitatem & magnitudinem ex his sex capitibus colligit Plato: ab eo scilicet qui imponit nomen, & cui imponitur, significatione ea ex qua imponitur, ab ipsius nominis pulchritudine & venustate, virtute, efficientia, & dignitate. Ex omnibus capitibus his, nomen hoc, supra omne nomen est. Et primum ab authore, inquam, qui illud imposuit: quem Deum ipsum esse, docet Isaias: Et vocabitur illi nomen, quod os Domini locutum est. Et Paulus similiter: *Dedit illi Deus nomen.* &c. Quod si illi magni, quorum nomen tantum Deus cognoscit, aut quos ex nomine vocat, vt, inquit scriptura; quanto maior iste, cui ipse Deus nomen imponit? Magnum

igitur nomen hoc est ex parte imponentis. Sed & magnum ex parte eius, cui impositum est; neque enim aut soli homini impositum est istud nomen, aut soli Deo, sed verò Emmanueli, Deo & homini simul: quāvis inprimis eius diuinitati conueniat, deinde per Deū in hominē defluat, iuxta illud:

Isaie 43.

Ego sum Dñus & nō est absque me saluator. Et, *Ecce*

Isaie 35.

Deus noster, Deus ipse veniet & saluabit nos. Cū

igitur ipse Christus, cui hoc impositum est nomē, sit supra omnia; & nomen eius supra omne nomen sit oportet. Sed & significatio nominis magnū & excellens quiddam designat: Iesus enim saluatorem Hebræis significat. Quamvis autem nomen hoc salutem repræsentet; tamen, vt docet Epiphanius, eā maximē, quæ per curationem vitæque restaurationem fit. Vt igitur vita & salus superat omnia bona; ita & nomen, eam salutem & curationem ferens, inter omnia nomina principatum teneat oportet. Hanc autem & non aliam significationem eius nominis esse, contra omnes Hebræorum calu-

Matth. 1.

mnias docuit Angelus: Ipse enim, inquit, saluum faciet populum suum à peccatis eorum. Quemadmodum igitur salutis & redemptionis opus, vincit ac excelsit omnia Dei opera; ita & hoc nomen superat omnia Christi nomina, Cōmendatur item nomen hoc,

Cantic. 1.

à suauitate & venustate: Oleum, inquit sponsa, effusum

fatum nomen tuum, ideo adolescentulæ dilexerunt te :
 dulce nomen, suaue nomen, iucundum nomen, no-
 men salutis. Sed multo maiorem habet comendati-
 onem ab efficacia. Hoc enim nomine nullum no-
 men est potentius, nullum magis efficax: in hoc no-
 mine omnes animi & corporis morbi curantur: in Acto. 3.
 hoc nomine dixit Petrus claudio: *In nomine Iesu*
Christi nazareni surge & ambula, & surrexit: in hoc
 nomine omnes principatus & potestates aduersæ
 superantur: in hoc nomine iusti efficimur: in hoc Prouer. 18.
 baptizamur: in hoc perficimur. *Turris fortissima no-*
men Domini, inquit Salomon: In hoc nomine om- Ioan. 16.
 nia à Deo impetrantur: *Quicquid petieritis,* (inquit
 Christus) *Patrem, in nomine meo, dabit vobis.* In hoc
 eodem peccata, vniuersæq. sordes nostræ abluun- 1. Cor. 6.
 tur: *Abluti estis,* inquit Paulus, *sanctificati estis, iusti-*
ficati estis, in nomine Dñi nostri Iesu Christi, & quod
 caput est, in hoc solo nomine saluamur omnes: *Non* Acto. 4.
est aliud nomen sub sole datum hominibus, inquit Pe-
 trus, *in quo oporteat nos saluos fieri.* Magna certè ef-
 ficacia est huius nominis, magna vis. Ad hoc igitur
 nomen in omnibus, tam aduersis, quàm secundis
 rebus nostris confugiamus, & non confundemur.
 Et quemadmodum efficacia huius nominis est ma-
 xima, ita & dignitas summa, quam explicat Paulus: Philip. 2.
Propter quod, inquit, *exaltauit eum Deus, & dona-*

uit illi nomen, quod est super omne nomen; ut in nomine IESU omne genu flectatur, cælestium, terrestrium, & inferorum. Hoc nomen Prophetæ & Patriarchæ à longè salutarunt: huius nominis causa Apostoli sanctique Martyres sanguinem profuderunt, & ibant gaudentes à conspectu concilii quòd digni haberentur pro nomine Iesu contumeliam pati. In hoc nomine virgines & iuvenes, omnes ætus humanos, omnesq. stimulos carnis superauerunt. Hoc nomen sancti confessores Doctoresque prædicauerunt. Det item nobis Dominus pro nomine isto pati aliquid ac perferre. Verè igitur nouum nomen: verè nomen supra omne nomen. Et multū quidem Cabalistę laborârunt, in nouitate nominis istius austruenda, distinguentes illud ab illis nominibus, quibus antè alii sunt insigniti, vtpotè Iesus naue, Iesus Syrach, Iesus Iosedech, & si qui sunt alij: quorum primus vir fortissimus populum Dei in terram promissionis induxit: alter vir sapientissimus suis temporibus sapientiam reuocauit: tertius sacerdos sanctissimus templum Domini restaurauit. mihi tamen simplicissimus sensus ille Augustini videtur, Non sonum literarum ac syllabarum; sed quod ipse sonus significat, & quod eo sono rectè ac veraciter intelligitur, hîc accipiendum esse. Itaque multos quidem hoc nomine alios vocatos fuisse; omnes tamen istos

istos figuram potius, & syllabas, quàm rem & sen-
 sum, nominis huius, tenuisse: acceperunt illi sa-
 lutem; non dederunt: prædixerunt venturam;
 non præstiterunt præsentem. Hoc autem nomen
 non in syllabis, sed in sensu positum esse, docet Pau- 1. Cor. 12.
 lus, cum dicit: *Nemo potest dicere Dominus Iesus,*
nisi in spiritu sancto. quod certe non de syllabis, quas
 & Psitacus pronunciare potest, sed de sensu ac re
 ipsa est intelligendum. Nomen item nouum, ea ra-
 tione, appellatum puto, quod ut dixi, à nullo vn-
 quam antea hoc nomine sit Messias appellatus, nisi *Isaia 62.*
 ab ipso primum Deo, iuxta *Isaiam*: *Vocabitur, in-*
quit, illi nomen nouum, quod os Domini locutum est.
 Verè igitur nouum nomen: verè supra omne no-
 men. omnia siquidem alia diuina nomina ea, quæ
 virtutem & operationem aliquam designant, in hoc
 nomen tanquam in mare quoddam influunt: om-
 nia in hoc perficiuntur: omnia ad illud tanquam
 rami ad radicem referuntur: *Neque enim aut creari,*
aut gubernari, aut iustificari, aut doceri profuisset, ni-
si saluari prodesset, inquit Augustinus. Nam de inef-
 fabili Dei nomine, nihil est quod hoc loco dica-
 mus: hoc enim essentia diuinæ, non operationis a-
 licuius est, quale hoc est, de quo nunc dicimus, &
 qualia nomina inter se nunc comparamus. Verum
 de hoc nomine aliàs fusius. Nuncio conceptio-
 nis

In Lucam
Hom. 6.

nis explicato Angelus, eius qui nasciturus erat adiuncta profert. Ne putes, inquit, virgo, aliquē vulgarem, ac humi repentem hunc futurum esse partum: *Hic enim erit magnus, & filius altissimi vocabitur.* Magnus ex parte diuinitatis suæ, potentia: magnus prouidentia, & rerum omnium regimine: magnus vt homo, in opere, & doctrina, coram Deo & omni populo: In omnem terram exhibit sonus illius: & in fines orbis terræ verba illius. Erit magnus, & faciet tibi magna, qui potens est, & sanctū nomen eius. *Dominus noster Iesus*, inquit Origenes, *quia virtus est Dei, in omnem diffusus est orbem & in presentiarum nobiscum est, iuxta illud quod in Apostolo legitur: Congregatis vobis & spiritu meo, cum virtute Domini nostri Iesu Christi. Virtus Domini saluatoris, & cum his est, qui ab orbe nostro in Brittania diuiduntur: & cum his, qui in Mauritania: & cum vniuersis, qui sub sole in nomine eius crediderunt. Vide ergo magnitudinem saluatoris, quomodo in toto orbe diffusa sit, & certè necdum eius veram magnitudinem exposui. Ascende in cælos, & vide eū, quomodo cælestia repleuerit; apparuit enim angelis: descende cogitatione in abyssos, & videbis eum etiam illuc descendisse; qui enim descendit, ipse est & qui ascendit, vt impleret omnia: vt in nomine Iesu omne genu flectatur, cælestium, terrestrium, & inferorum.*

Con-

Considera virtutem Domini, quod impleuerit mun-
dum, id est cœlestia, terrestria, & infernalìa: quomo-
do & cœlum ipsum penetrauerit & in superna ascen-
derit. Legimus enim, quod pertransierit cœlos filius
Dei: si hæc videris, pariter intueberis non transito-
riè dictum; Magnus erit, sed verbum opere completū.
Magnus est Dominus noster Iesus, & præsens, & ab-
sens: tribuitq; consortium fortitudinis suæ, huic cœtui
nostro atq; conuentui. Erit igitur magnus, cuius ma-
gnitudinis nulla alia est mensura, nullus alius mo-
duſ, nullus finis, quàm ipse pater: Ego in patre, & Ioan. 14.
pater in me est: & nemo nouit filium, nisi pater, neq; Matth. 11.
patrem quis nouit, nisi filius. Si igitur nosti mensurā
patris, nosti mensuram filij: si modum patris, & mo-
dum filij: si magnitudinem patris, & magnitudinē
filij. Quod si hæc nullo sensu, nullaq; ratione hu-
mana comprehendì, aut coërceri, ac mensurari pos-
sunt; ne filij quidem modum, aut mensuram, aut
magnitudinem quæramus. Minor est, inquit Aria-
na impietas, patre. Quomodo igitur, si minor, pater
in eo, aut ipse in patre erit? quomodo finito infini-
tus continebitur? aut quomodo finitus par infinito
erit? aut, quis te tandem in ea immensitate ac ma-
gnitudine finium regundorum arbitrum, inter pa-
trẽ & filium constituit? In hoc condita, inquit Am-
broſius, sunt omnia, quæ in cælo & in terris, visibilia

Et inuisibilia: Et ipse est ante omnia, Et omnia in ipso consistunt. Quomodo non magnus, cuius magnitudinis non est finis? tam magnus, ut ipse altissimus, quia & ipse altissimus, ne sit alius virginis, alius altissimi filius; ubi non personarum, sed naturarum denotatur varietas: Bonum est igitur psallere nomini tuo altissime. Idem, inquit isti, de Ioanne alio loco dictum est: Et erit magnus coram Domino, idem de aliis. Idem planè, sed non eodem modo. Magnus Ioannes futurus esse dicitur, sed non ut Dominus, sed coram Domino, hoc est, ob præstantes suas ac diuinas virtutes, ac planè Angelicam vitam, quæ statim explicatur: Vinum & siceram non bibit: Et spiritu sancto replebitur adhuc ex utero matris suæ: Et multos filiorum Israël conuertet ad Dominum. Deum ipsorum: Et ipse præcedet ante illum, in spiritu & virtute Eliæ: ut conuertat corda patrum in filios; Et incredulos ad prudentiam iustorum, parare Domino plebem perfectam. Magnus ille, sed ut vox coram verbo: præcursor coram principe: seruus coram Domino: Non erat enim ille lux, sed ut testimonium perhiberet de lumine. Erat lux vera, quæ illuminat omnem hominem venientem in hunc mundum. Ille quasi homo magnus, inquit Ambrosius, hic quasi Deus magnus: Magno illo in cælo, maior est, hoc autem nemo. Ioannis magnitudo habet principium & finem:

Luc. i.

Ioan. vi.

nem : Dominus Iesus ipse principium & finis. Magnus igitur Ioannes non simpliciter, sed coram Domino. Magnus Samson, sed fortitudine : magnus Absalon, sed pulchritudine : magnus Salomon, sed sapientia. Quis autem magnus simpliciter? *Magnus Dominus, & magna virtus eius, & magnitudinis eius non est numerus. Quis Deus magnus, sicut Deus noster?* Vt rectè ex hoc loco contra Arianos concludamus in hunc modum : Nemo absolute magnus, nisi Deus : sed Iesus Christus absolute est magnus ; Deus magnus, & rex magnus, super omnes deos : *Hic erit magnus, & filius altissimi vocabitur* : verus igitur Deus. Cæterum fortè ultra pertinacia Ariana mussitabit : Cur igitur non dicit, est magnus, quod propriè de Deo dicitur ; sed erit magnus? Quia hoc ad mox futuram eius incarnationem refertur hoc sensu : Ille, inquam, qui ab omni æternitate, in patre & est & fuit magnus, hic etiam vbi tuus filius in tempore esse cœperit, non desinet esse magnus : neq; quicquam hæc tua tuæq; naturæ humilitas, de eius magnitudine ac maiestate diminuet aut detrahet ; sed potius illius diuinæ & cælestis naturæ maiestas, hanc naturæ tuæ paruitatē ac deiectionem vsque ad eò subleuabit, vt hæc ipsa, tua natura vilis, quam de tuis sumit sanguinibus, humana, propter hypostaticam cum Deo humanę na-

turę coniunctionē ita eleuetur; vt idem, qui in omni
 æternitate magnus est & fuit, propter suam diuini-
 tatem, in tempore etiam magnus iuxta humanita-
 tem, de te sumptam, esse incipiat. Quanquam & tu
 illa ipsa es ab initio possessa, & ante secula ordinata:
 petra illa, cuius dilectione & amore, lapidisq; ex te
 excidendi desiderio, mundum conditum esse, ac
 conformatum, magistri gentis tuę tradiderunt:
 planta ipsius Dei manu plantata: prima creatura-
 rum: tu es illa, cuius omnes fideles filij sunt: illa
 petra prima, cuius amore Deus elegit sibi Israēl, e-
 legit eum in possessionem sibi, vt esset illi popu-
 lus peculiaris ex cunctis populis: illud decus do-
 mus Iuda, virga de radice Iesse, in cuius manu su-
 scitaturus est Deus salutem Israēlis maximam: il-
 la petra primaria, ex qua procedit Messias, cuius
 nomen est æternum, & ponet gratiam gratiæ tibi,
 iuxta prædictionem Zachariæ: illa ab Isaia præ-
 dicta prophetissa, quæ conceptura & paritura es
 filium; imò domina & magistra prophetarum: tu
 es illud solium gloriæ altitudinis, ab Ieremia ce-
 lebratum à principio, locus sanctificationis nostræ.
 Magna igitur simul & humilis es, & ideò magnum
 similiter & humilem paries; & magnum, cuius ma-
 gnitudinis non erit finis. Dabit enim illi Deus no-
 men, etiam vt homini, etiā vt filio tuo, quod est su-
 pra-

Hæc omnia
 sumpta sunt
 ex libro Lu-
 dæ Hakados
 qui Revela-
 tor arcanorū
 inscribitur,
 & quem Do-
 ctres ob su-
 mam autho-
 ritatem, ma-
 gistrum no-
 strum sanctū
 appellare so-
 lent,

pra omne nomē : vt in eius nomine flectatur omne
 genu cæleſtiū, terreſtriū, & infernorū. Erit enim hic
 lapis, de petra tua abſciſſus abſq; manibus : paruus
 primū, ſed tēporis ſucceſſu in excellſum montē ita
 excreſcet ; vt cooperiat omnem terram, omniaq;ue
 omnium ſeculorum imperia conterat ac comminu-
 at : tuq; non amplius mater hominis, ſed mater Dei
 appellaberis. *Erit igitur magnus, & filius altiffimi*
vocabitur : quod primum & ſummum argumentum
 regis Meſſiæ eſſe debuit, iuxta illud : *Paruulus na-* Iſaiæ 91
tus eſt nobis, & filius datus eſt nobis : & factus eſt prin-
cipatus ſuper humerum eius : & vocabitur nomen eius
admirabilis, conſiliarius, Deus, fortis, pater futuri ſe-
culi, princeps pacis : multiplicabitur eius imperium, &
pacis non erit finis : ſuper ſolium Dauid, & ſuper re-
gnum eius ſedebit, vt confirmet illud, & corroboret in
iudicio, à modò & vſque in ſempiternum. Filium au-
 tem antè ſecula eſſe vocatum, probant illa Dauidis
 verba : *Filius meus es tu, ego hodie genui te.* Apud De-
 um enim, non eſt cras, neq; hodie. Quoniam igitur
 Deus pater, ſemper fuit, ac dictus eſt pater; inde eſt
 & filium ſemper fuiſſe, & ſemper vocatum eſſe fi-
 lium, ex quo, & per quem ipſa filiatio ad homines
 promanet : eatenus enim filij Dei & nos vocamur,
 quatenus vnigeniti filij membra ſumus, & nunc in-
 trepidè clamamus, Abba pater. Omnem autem im-
 poſſi-

rei difficultate remouet, cùm dicit filium altissimi futurum, cui omnia patent, omnia sunt possible. quemadmodum omnem aufert turpitudinē, cùm patrem eius Dauidem paulò post denunciat: Sublimis est, inquit, humana natura, sed longè sublimior angelica, diuina maximè sublimis: & ideò, inquit, filius altissimi vocabitur, quod postea clarius exponit: *Quod, inquit, nascetur ex te sanctū, vocabitur filius Dei.* Non quidē vulgari more, quo iusti purgati à peccatis, ac per gratiā Dei iustificati, per adoptionem dicuntur filij Dei; sed singulari ratione vocabitur filius Dei, ex quo & cuius virtute verè bis natus sit, semel absq; initio, ex æterno æternus; nunc in tēpore ex matre mortali mortalis, homo ex homine. Sicut autē in hoc congressu diuina natura cū humana conglutinabitur; ita partus vtriusq; parentis naturam referet. Vocabitur tantū, mulsitat in aliquo angulo hæreticus, & non erit. Miras verò diaboli fraudes, miram versutiam: dictum est, *hic erit magnus*: offenditur verbo, *erit*; aliud desiderat; vbi aliud positum est, *vocabitur* nempè, iterum illud, *erit*, repetit. Atqui ad obstruendum os illius impudens, hoc vtrunque positum est, & supra erit, & nunc vocabitur. De Christo enim Domino in vtero matris concipiendo, erit, superius ex ea causa, quam attuli, dictum est: at nunc de filio Dei, qui antè

ante secula genitus est, *vocabitur* vsurpat Angelus. Si *erit* dixisset, tum illud impiū olim Ario vsurpatū sophisma veterator inferret, ergo erat tēpus, quando non erat; quod ne faceret, *vocabitur* potius, quā *erit* dixit Angelus. filius enim Dei cū in omni æternitate esset, & ante omnia secula, per quē facta sunt & secula; vocari tamen, id est, mundo innotescere in tempore debuit, posteaquam in terris visus est, & cum hominibus conuersatus est. Tunc demū passim ab omnibus filius Dei appellari cœpit, omnibus conspicuus in omnium oculis miracula edens. Ratiocinabatur ex hoc loco impius Seruetus, non fuisse eum Dei filium, antè quā carne indutus appareret, quia dictum est ab Angelo, *vocabitur*. Sed huic præclarè respondit iam olim Andreas Ierosolymitanus: *Vocabitur*, inquit, non quòd verbum existendi principium de carne sortitum sit; erat enim in principio verbum, & Deus erat verbum, & verbum erat apud Deum; & ipse conditor seculorum, patri coæternus, & vniuersalis creator: sed iuxta subsistentiam sibimet uniens humanam naturam, etiam tum, vt homo, filius Dei vocari cœpit; eamq; ob causam mater eius, mater Dei appellata est. Vocatus est autem primū à patre ipso, qui in eius baptismo illud inclamauit: *Hic est filius meus dilectus, in quo mihi bene complacui, ipsum audite*. Deinde à spiritu san-

Matth. 3.
Luc. 9.

- Matth. 16. Cito, per os Petri loquente: *Tu es Christus filius Dei*
- Matth. 8. *viui*. Vocatus à Diabolo: *Iesu fili Dei, ante tempus*
venisti hic, torquere nos? Vocatus & à crucifigen-
- Matth. 27. tibus eum, toties illud repetentibus: *Verè filius Dei*
erat iste: vocatur à fidelibus omnibus. Si igitur fili-
- Ioan. 1. us, ergo & hæres; ergo Deus benedictus in secula. Fremit amplius improbitas Ariana, adoptiuus fu-
- Rom. 8. it filius. Atqui hoc modo omnes vocamur filij Dei, & sumus, qui adoptamur in spem æternæ hæredita-
1. Ioan. 5. tis: atq; ita nihil magnū, nihil nouū, nihil singulare de illo protulisset Angelus: *Quotquot enim receperūt eum, dedit eis potestatem filios Dei fieri.* quæ quidem nostra filiatio, ymbra tantū & imago est veræ illius & naturalis, & coæternæ filiationis: quod sic explicauit Paulus: *Nam quos, inquit, præsciuit, & prædestinauit, conformes fieri imagini filij sui; ut sit ipse primo genitus in multis fratribus.* Et Ioannes: *Ut simus in vero filio eius, qui est verus Deus & vita æterna.* Quæri autem hoc loco idq; à doctis solet: Cur filius Dei potius factus sit homo, & non pater, aut spiritus sanctus? Cuius rei multæ adferri possunt rationes. An quòd, per quem facta sunt, per eum reficienda erant omnia. Nam & artifex, per quā artis formam rem condidit; per eandem, collapsam illā restaurare solet. Omnia autem in sapientia facta sunt, siue quæ in cælis sunt, siue quæ in terris; omnia.

nia igitur per eandem sanari debebant. An quòd lapsus naturæ nostræ, qui per affectationem scientiæ & sapientiæ accidit: (Eua enim scire mala & bona voluit) per eandem sapientiam erigi debuit. Porro sapientia patris filius est; per eum igitur recuperari hominem oportuit, iuxta illud: *Scio ego quoniam* Ionæ 2.
propter me tempestas hæc grandis super vos. An quòd non nisi per brachium & virtutem Dei dexteramq; excelsi, quæ filius Dei est, hic tantus casus emendari restaurariq; potuit. An quòd Lucifer in primis & maximè filio Dei inuidit, & aduersatus est: ab eodemq; vinci & superari debuit. An quòd, vt
 putat Anselmus, qui erat incarnandus, oraturus erat pro humano genere; & satis conuenientius suscepit mens humana, filium patri, quàm alium aliis supplicare. quamvis hæc supplicatio non fiat à diuinitate, sed ab humanitate ad diuinitatem. Quam idcirco filius Dei facit; quia homo per vnitatē personæ, filius Dei est. An quòd ambo, Diabolus, scilicet & homo, per rapinam se voluerunt facere similes Deo; cùm propria sunt vñ voluntate. Nulla igitur trium personarum, Dei congruentius semetipsam exinaniuit formam serui accipiens ad debellandum Diabolum, & intercedendum pro homine; qui per rapinam similitudinem Dei falsam præsumperant, quàm filius, qui splendor lucis æternæ, & vera

Cur Deus homo lib. 2. c. 9
 Et de incarnatione verbi cap. 4.

patris imago, nō rapinam arbitratus est, esse æqualem Deo, verum per veram æqualitatem & similitudinem dixit: Ego & pater vnum sumus. Et, Qui videt me, videt & patrem. Nullus namq; iustius expugnat reum, vel punit, aut illi misericordius parcit, vel pro eo intercedit; quàm cui specialius iniuria fieri probatur: nec aliquid conuenientius opponitur falsitati ad expugnandum, aut apponitur ad saluandum, quàm veritas. In illum enim falsam Dei præsumentes similitudinem specialius primi parentes peccasse videntur, qui vera Dei patris similitudo creditur. An quòd, si quælibet alia persona incarnaretur, essent duo filij in trinitate; filius scilicet Dei, qui & ante incarnationem filius est, & ille qui per incarnationem filius esset virginis: & esset in personis, quæ semper æquales esse debent, in æqualitas secundùm dignitatem natiuitatum. Digniore namq; natiuitatem haberet natus ex Deo, quàm natus ex virgine. An quòd pater in creatione, spiritus sanctus in gubernatione, filius in incarnatione ac redẽptione, innotescere debuit. An propter eas omnes causas, an propter alias, quas ipsum verbum melius nouit. Quod etiã propterea in scripturis sæpius germen dici, veteres annotarunt Rabini; quia, conuenientius fuit filium, quàm patrem, aut spiritum sanctum, incarnari: non tamen alium Deum à patre.

patre & spiritu sancto : vt hoc ipsum venustissima
 similitudine illustrat Anselmus : *Si riuus*, inquit, *per* De incarna-
tione verbi
cap. 7.
fistulam curuat, à fonte vsque ad lacum : nonne solus
riuus, quamuis non alius Nilus, quàm fons & lacus,
infistulatus est, vt ita dicam : Sic solus filius incarna-
tus est ; licet non alius Deus, quàm pater & spiritus
sanctus. Qualis autem hic futurus sit filius, mox ex
 ipsa hæreditate, regniq; ipsius amplitudine ac maie-
 state demonstrat; ac cum quantus in se sit docuisset;
 nunc quantus ab extra futurus erat docet : eū scili-
 cet solum verum Messiam, à prophetis prædictū, &
 tot seculis expectatum ac desideratum, futurum;
 qui neque fraude, neque aliqua externa vi regnum
 suum sit consecuturus : sed ab ipso Domino Deo il-
 lud accepturus, & ideo regnum eius sempiternum
 futurum. Si igitur pater illi dabit, minor est pater ?
 Nequaquam : hoc enim non aliquam inæqualita-
 tem, sed rationem tantum fontis & originis desi-
 gnat : quomodo & naturam & essentiam, & omnia
 alia dicitur filius à patre accepisse; solus enim pater
 à nullo est; filius à solo patre & est, & omnia sua ha-
 bet. Quanquam hæc omnia ad futurā conceptionē
 & generationem eius hoc loco referantur. Dicitur
 autem regnum Messia, sedes Dauid, & ipse Messi-
 as nomine Dauidis, vt apud Ieremiam : *Seruient* Ierem. 30.
Domino Deo suo & Dauid regi suo. Apud Ezechie-
 lem.

Ezechiel 24. Iem item : *David seruus meus regnabit princeps super illos.* Apud Oseam : *Requirent Dominum & David regem suum.* Et apud Amos : *Suscitabo tabernaculum David.* multis de causis: vel quòd regi Dauidi præcipuè antè alios promissum fuerit: *De fructu ventris tui, ponam super sedem tuam.* vel quòd ex eius stirpe & progenie sit ortum : *Orietur virga de radice Iesse, & flos de illa ascendet.* vel quòd in ipso Davidis regno fuerit in primis figuratum. Quemadmodum enim David regno suo nulla vi, nullo humano consilio, nullis mortalium opibus ac præstidiis potitus est; sed quasi de manu Dei in manum illud gubernandum accepit: sic Christi regnū nullis humanis consiliis, nulla ope externa, nulla vi aut potentia stetit; sed sola sempiterna Dei voluntate & ordinatione, fundatum est. Et quemadmodum rex David, etsi quidem in regem vinctus erat, non tamen statim regno potitus est, illudque adiit; sed prius cum Goliath congressus est: prius multis aduersis & calamitatibus iactatus: multa vndique, tam à domesticis, illisque quos beneficiis aliquando affecerat, quàm ab alienis perpeffus. Ob quam suam perseuerantiam ac patientiam, victor demùm gloriosus potentissimusque rex factus; ac in solio regni summa pace & quiete, primùm super domum Iuda, deinde supra vniuersum Israël, ne quicquam inimi-

cis

eis eius obsistentibus, ac nihil non contra illum tū
 molientibus, confedit. Ita Christus Dominus,
 primū quidem in suo baptismo à spiritu sancto
 vnctus est; non statim tamen in suo confedit solio:
 sed prius multos & varios labores exhausit, ac ex-
 antlauit: omneque genus calumniarum ac tribula-
 tionum pertulit: in acerbam crucem ad extremum
 actus; demū sempiterni patris voluntate à morte
 tertia die excitatus, illam vocem audiuit: *Sede à de-*
xtris meis, donec ponam inimicos tuos scabellum pedum
tuorum. Et quemadmodum Dauid rex, non simul
 toti regno imperauit; sed primū super tribum Iu-
 da solam constitutus, deinde multo pōst tempore
 vniuerso regno Israëlitico potitus est. Sic rex Messi-
 as, non simul itidem toto regno suo auctus est, sed
 bis similiter quodammodo in sede Dauid confedit:
 primò quidem, tunc cū ascendens super vniuer-
 sos cælos, in dextera confedit patris, vnde factus est
 caput super vniuersam ecclesiam; datæque sunt illi
 gentes in hæreditatem, & in possessionem termini
 terræ: secundò autem, in extremo iudicio firmam
 ac fixam accipiet sedem, suiq; imperij potestatem;
 vbi subiectis inimicis sub pedibus suis regnabit in
 domo Iacob in æternum: *Dominabitur cum sole &*
ante lunam, & luna in cælo testis erit fidelis: *& re-*
gni eius non erit finis, vt inquit Gabriël. Minor erat
 interr

inter fratres suos Daud , pecus pascebat , vilis & abiectus: sic & Christus Dominus formam serui gerens, fabri filius, vel à fratribus ipsis spretus: *Nam et fratres eius*, inquit scriptura, *nō credebant in eū*. veluti vorax & vini potor, dæmoniūq; habens, reputatus fuit. Dum proderat Daud , & quibus proderat , ab illis vexabatur: sic alter Daud ab iis, inter quos miracula gessit, toties calumniā passus , toties lapidibus petitus est. Cedendo malis vicit Daud regnoq; potitus est: mortem obeundo Christus dñs in throno suo cōsedit. *Et regnabit in domo Iacob*, inquit Angelus: domo, inquit, peregrinante, seruiente, fugiente. Regnabit autem miseros & afflictos subleuando: malos extirpando: bonos exaltando: omnibus imperando: hostes subiugando: iura promulgando. Regnabit per gratiam , & gloriam: regnabit per charitatem: regnabit per hypostaticam vnionem. Huic enim domui salus peculiariter fuit promissa: huius Christus, teste Paulo, minister fuit; in hanc aliæ gentes & populi noua adoptione insertæ sunt. Inde orbis totus leges & iura petere debuit, nisi sua defectione tanto se abdicasset honore. Non tamen qui filij carnis, filij Abraham, filij Iacob; sed qui filij sunt spiritus. Potens est tamen Deus & illos inferere. Noli igitur altum sapere, sed time. Mitissimum fuit regnum Daud , ipseq; patientissimus rex:

rex: mitissimum & Christi Domini. Auxit cultum
 diuinum Dauid: erexit Christus Dominus. Chari-
 tate & patientia excelluit Dauid: superauit omnes
 Christus Dominus. Vltimò Dauid rex, vniuersum
 cursum regni sui; non sine cruce multisque calami-
 tatibus transegit: ita hic ipse rex noster, positus est
 in signum cui contradicitur: in lapidem offensio-
 nis: in petram scandali multis de domo Israël: in
 quem vniuersæ portæ inferorum omnia tela ignita
 sua direxerunt. Vicit tamen hæc omnia vterque
 Dauid; & completum est illud de vtroque: *Sedit*
rex in domo sua, & Dominus dedit ei requiem vnde ^{2. Reg. 7.}
que ab vniuersis inimicis suis. Senex plenus die-
 rum, aut potius æternitatis. Et hæc quidem
 hæctenus. Quæ autem & qualis, & quo
 loco hæc sedes esse debeat,
 sequens docebit
 sermo.

Q

NVN

NUNTII SALVTIS,

Siue de incarnatione,

SERMO QVARTVS.

Et dabit illi Dominus Deus sedem David patris eius: & regnabit in domo Iacob in æternum: & regni eius non erit finis.

Isaïa 41.

Multa equidem & præclara sunt apud prophetas regis Messiaë, cuius nunc gloriosam incarnationem explicamus, insignia atq; ornamenta; inter quæ illud inter cætera nō obscurum est Isaïæ: *Non, inquit, clamabit, neque accipiet personam, nec audietur vox eius foris. Calamum quassatum non conteret: & linum fumigans non extinguet. Non erit tristis neque turbulentus, donec ponat in terminum iudicium: & legem eius insule expectabunt. Non tristem, non violentum, non rapacem futurum pollicetur Propheta. Hoc idem nunc Angelus virgini annuntiat. Docet enim, hunc ipsum recens nasciturum, & concipiendum regem, non vi, nec armis, nec vlla seculi potentia aut violentia, regno suo potiturum; sed de manu omnipotentis Dei illud accepturum: Dabit, inquit, illi Dominus Deus sedem David patris eius*

eius: & regnabit in domo Iacob in æternum: & regni eius non erit finis. Quod quàm planè completum fuerit, vel ex illis ipsis, qui ad hoc occupandum regnum missi fuerant, ducibus, piscatoribus, inquam, duodecim Apostolis, videre licet, qui nulla sapientia, nulla eloquentia instructi, nullis mundi præfidiis muniti, nullis ornamentis commendati, nudi, egentes, angustiat, orbem terrarum pedibus sui regis subiecerunt. Quod autem hoc regnum, & quale sit, & ubi consistat, posteaquam de rege diximus, nunc paucis explicemus. Quod etsi semper maximas difficultates habuit, fuitque inuentu perdifficile; hoc tamen tempore maximè, ubi de hoc regno eiusque regni sede, tantæ & tales contentiones sunt exortæ, est difficillimum, inprimis autem necessarium:

Christus igitur Iesus Saluator noster, cùm sit verus Deus & homo, illud ab æterno, hoc in tempore: habet quædam, quæ sibi ab æterno natura sua sunt; cum patre, & spiritu sancto communia, vtpotè naturam & essentiam, vitam, gloriam, imperium, vim creantem & gubernantem, tenentemque omnia: habet alia, quæ vt homo, in tempore à patre accepit; eaque obedientia, qua patri obediens fuit, *vsq;* ad mortem, mortem autem crucis, sibi vt homo quæsiuit. Talia autem sunt, nominis supra omne nomen:

Q. i.

exal.

De orthodo.
fide 3. cap. 8.

Sermo 58. de
verb. Dñi.

exaltatio, & patriæ cultus. Quod ita explicat Dama-
scenus: *Non timeo carbonem tangere propter ligno co-
pulatum ignem: Adoro Christi Dei mei simul utramq;
naturam propter carni unitam deitatem.* Et Augusti-
nus: *Ego dominicam carnem inò perfectam in Chri-
sto humanitatem ideò adoro, quod à diuinitate suscepta,
& deitati vnita est; vt non alium, & alium, sed vnum
eundemq; Deum & hominē filium Dei esse confitear.*
Vt enim vestis, & trabea regis magni, vnà cum re-
ge, vno cultu quodammodo honoratur, quæ sine
rege eiulq; ratione nullum mereretur honorem:
ita, & multò magis, caro Christi, propter eam
quam habet arctissimam, id est, hypostaticam, in
vna persona cum diuinitate coniunctionem, eodem
cultu, quo ipse Deus colitur; quæ eadem à diuinita-
te seiuncta (quod tamen neque fuit, neque erit
vnquam; quod enim semel assumpsit, dimittet nū-
quam) amplius eodem cultu non coleretur. Quan-
tisper autem cum diuinitate coniuncta, vnā effi-
cit Christi personam, ita colitur; vt in nomine eius
omne genu flectatur, cælestium, terrestrium, & in-
fernorum: nisi fortè quis infectus Iudaica, aut A-
riana, vel Sacramentaria labe, id facere recuset, ac
contra Deum suum tergum vertat. Sic eodem mo-
do hic ipse Christus Dominus, omnem iudiciariam
accepit potestatem, vt ipse sit iudex viuorū & mor-
tuorum

tuorum, iuxta illud: *Causa tua iudicata est, veluti* Iob 36.
impij: causam & iudicium recipies. Et illud: *Pater* Ioan. 5.
non iudicat quenquam: sed omne iudicium dedit filio,
vt omnes honorificent filium, sicut honorificant patrem.
 Consecutus est item & illud, vt sit caput super omnē
 ecclesiam; in quam ille vniuersum motū, sensum, vi-
 tam, omnem vbertatem gratiæ largissimè confert,
 atq; illi subministrat. Illud similiter, vt sit rex regū,
 Dominus dominantium; ac deniq; vt habeat sedem
 Dauid patris sui, & regnet in domo Iacob in æter-
 num. Hoc igitur nunc agit Angelus: huic ipsi ab æ-
 terno excelso præ omnibus regibus terrę secundum
 suam diuinitatem, pollicetur similiter; etiam iuxta
 illius humanitatem, daturum Deum sedem Dauid
 patris eius: & regnaturum eum in domo Iacob, re-
 gniq; eius finem nullum futurū. De qua sede & do-
 mo Iacob, quæ & qualis futura esset, magna est &
 fuit semper controuersia: hæcque sola res Iudæos
 in transuersum egit, atque in ipso portu, quasi nau-
 fragium perpeti fecit. Legebant siquidem apud o-
 mnes ferè prophetas, Messiam regem futurum soli-
 umque Dauid occupaturum. Nam & apud Isaiam Isaïæ 9.
 illud legitur: *Paruulus natus est nobis, & filius da-*
tus est nobis: super solium Dauid, & super regnum e-
ius sedebit, vt confirmet illud, & corroboret in iudicio,
& iustitia, à modo vsque in sempiternum. Et apud

- Ierem. 30. Ieremiam : *Ecce dies venient, & suscitabo David germen iustum; & regnabit rex, & sapiens erit, & faciet iudicium & iustitiam in terra.* Et apud Ezechielem :
 Ezech. 34. *Et David seruus meus princeps in medio eorum, ego Dñs locutus sum: & percutiam illis fœdus pacis, pactū sempiternū erit eis.* Et apud Amos: *In die illa suscitabo tabernaculum David quod cecidit, et reædificabo aper-
 turas murorum eius, & ea quæ corruerunt instauro.*
 Amos 9. Fuit igitur hic sensus, hæc expectatio omnium, ven-
 turum Messiam, visibilem sedem & thronum Dau-
 dis statim occupaturum; ac inde vniuersas gentes
 regno & imperio suo subiecturum, omnibusq; gen-
 tibus ac linguis imperaturum. Vnde illa hebraicæ
 gentis puerorum acclamatio: *Hosanna filio David:*
 Matth. 29. *Benedictus qui venit in nomine Domini rex Israël;*
 Marci 11. *benedictum, quod venit, regnum patris nostri David:*
 Luc. 19. *pax in cælo & gloria in excelsis.* Peruenerat hæc o-
 pinio ad Apostolos vsque ipsos. Vnde illa frequens
 A. 1. percontatio: *Domine num in tempore hoc restitues*
regnum Israël? Vnde illa matris filiorum Zebedæi
 Matth. 20. *prensatio: Dic vt sedcant hi duo filij mei, alter ad de-*
xteram, alter ad sinistram tuam, in regno tuo. Vnde illa
 Luc. 22. *ambitiosa Apostolorum contentio, quis eorum vide-*
retur esse maior: Omnia enim ad sensibile & tempo-
 rale quoddā regnum Christi referebant. Hæc autē
 proueniebant inde, quòd & Iudæi & Apostoli igno-
 rabant,

rābant, quod & quale regnum ipsius Dauīd fuerit, & postea Christi Domini futurum esset: nempē hominibus sensui deditis, nihil aliud, nisi quod sensum moueret, intelligentibus atque desiderantibus. Potissimum verō hęc inde, vnde itidem & nunc omnes errores atque hęreses exoriuntur, promanabāt, quod partem tātūm quandam scripturę de eo regno viderent, alias autem negligenter. Quemadmodum autem pulchrę statuę aut imaginis, non pars vna tantūm est videnda, sed totum corpus diligentius considerandum: sic cuiusque scripti totus scopus, tota videnda est simul analogia, tota rerum series atque connexio. Quod in sacris scripturis maximē elucet, quas qui totas non nouit, nihil nouit; quę non tam verbis, quā re & sensu ipso loquuntur. Hinc quidam ea, quę maximē scripturę aduersantur, scripturę consentanea esse putant; & contrā quę scripturam ipsam spirant, ab ea alienissima esse iudicant. A Dauidis igitur regno, quod typus regni Christi fuit, exordiamur: quod neque penitus terrenum & seculare, neque item penitus cęleste aut spiritale; sed partim terrenū & ciuile, partim item spiritale fuit. Hoc vbi totam simul scripturam inspexeris, omnesque partes eius simul contuleris, planē perspicies. Terrenum, ciuile ac politicum, qua parte regnū Dauid fuerit, nihil attinet dicere:

In ma-

Psal. 99.

In matutino, inquit, interficiebā omnes peccatores terræ, vt disperderem de ciuitate dñi omnes operantes iniquitatem. Spirituale autem fuit, non solū ea parte, quod vmbra & figura quædam esset, vt dictum est, regni Christi; nam vtrunq; ex paruis initiis ortum; vtrunque nec vi, nec dolo partum, sed ab ipsa dextera excelsi porrectum; vtrumq; multis tribulationibus, persecutionibus, molestiis, antecedentibus & consequentibus vexatum est: sed longè magis ex illa ratione, quod cælestis patriæ promissiones acceperit, illique populo præfuerit, qui promissionem & signaculum fidei, circumcisionem, inquam, atq; æternæ patriæ spem habuit, atque multa alia futuræ vitæ pignora acceperit. tum quod totum illud Dauidis regimen, non hoc solū spectabat, vt tantū in præsentī vita felix & incolume regnum suum esset; sed longè magis, vt ad cælestem illam & æternam patriam aspiraret, eoq; perueniret. Cuius regiminis, præstans illud & diuinum commentarium est, Psalterium, inquam, in quo abundè & prolixè cælestis patriæ omnis decor, splendor, dignitas continetur; omnesq; illius consequendæ artes, & modi ita explicantur, vt à nullo neque solidius, neque religiosius, neque venustius explicari possint: ita vt in tertia parte vniuersæ sacre doctrinæ saluator ipse illud reposuerit, vbi inquit, *In lege prophetis &*

Psal.

psalmis. Cuius quidem patriæ seipsum ipse rex ita cupidum esse demonstrat, vt quemadmodum ceruus in summa siti, ad fontes aquarum incitato cursu fertur; sic ille lachrymas suas sibi fuisse panes die ac nocte, dum recordatur cælestis Sion, magnificè canit. Itaque illi, qui eius parebant regimini, Dei filij & erant, & vocabantur, æternæ hæreditatis participes aliquando efficiendi: quemadmodum ex aduerso, qui illius doctrinæ ac imperio parere nolebant, illudque aspernabantur, isti filij Belial, hoc est, filij sine iugo, filij gehennæ vocari solent; à vita non solum temporali hac, sed æterna etiam excludendi. Et de Dauidis quidem regno, hæc pauca ex multis. Quemadmodum igitur Dauidis regnum, non terrenum tantum & certi temporis, sed spiritale etiam & cæleste, ob eas causas, quas diximus, erat; ita & Christi domini regnum, cuius illud vmbra & typus fuit, non ipsum temporale regnum solum, aut huius seculi, de hocque mundo esse debuit, sed æternum etiam & spiritale. Spiritualis regis est, sacramenta instituere, doctrinam de Deo tradere, & confirmare, ac vbi res postulat abrogare; quasdam humanas leges, vt diuinæ substituantur, vel auferre penitus, vel interpretari: salutem & iustitiam largiri: cælum donare. Quæ omnia fecit Christus dominus, qui patre vngente spiritus sancti vñctione vn-

R.

ctus.

Atus fuit, iuxta Irenæum, qui demùm temporali regno post mortem suam in suis successoribus defunctus est, iuxta illud : *Stabiliui thronum eius in sempiternum*. Ea tamen differentia regni illius & Dauidici fuit, vt in huius quidem regno, id quod temporale fuit & terrenum, magis appareret, ac quasi emereret, familiamque duceret: illud autem, quod spiritale, pertenuē ac perobscurum esset. In Iesu Christi autem imperio contrā; illud quod terrenum & seculare est, nec ita statim, nec ita manifestē apparere; quod autem cæleste & spiritale est, id subito & longē illustrius in eo dominari ac elucere debuit. Quantum autem anima corpori præstat, tantum imperium Christi imperiis omnibus præstare debuit: & ideò spiritu potius quàm carne regi; eamque ob causam ab eo, quòd primum in hoc regno tenet, & Theophylactus & alij S. patres planè spirituale & cæleste regnum hoc dixerunt: ita tamen, vt hoc aliud visibile, quod in hoc mundo versatur, ac militare, ordinemque suum hierarchicum tueri debet, non excludant. Quod ita esse, vetustissimus doctor Athanasius testatur: *Accipit autem in his verbis thronum Davidis corporaliter, ex ratione prosapiæ, qua pater illi David fuit. Et regnabit in domo Iacob in æternum: & regni eius non erit finis, etc. Ergo capiens Christus thronū Davidis,*
trans-

De sanctis.
Deipara.

transtulit illum, & dedit sanctis Christianorum regibus, ut conuerteret eos ad domum Iacob, qua tradita in opprobrium & direptionem regnabit in Christianis in æternum, & regni eius non erit finis. Non enim populo ulli alij residui sunt prophetæ, secundum visiones Danielis: sed hunc solum Messiam esse prædicant, & regem agnoscunt, perseuerantem usque ad secundum suum ipsius aduentum; quo tempore quum venerit, manebit rex in seculum, & regni eius non erit finis. Si quidem genitus ex virgine, & consumatis omnibus, quæ ad negotium mortis & crucis pertinebant, post resurrectionem ad suos aiebat: Data est mihi omnis potestas in cælo & in terra. Ecce iam inde regnare incepit, & prædicatur Christianorum rex: quemadmodum in exordio precum suarum, se inuicem adhortantes, atque in cætum conuocantes clamare solent: Venite adoremus, & procidamus coram Christo rege nostro. Et illud itidem, is qui venturus est in magno suo & illustri aduentu, permancbit regnans in æternum, & regni eius non erit finis. Et regnum quidem Dauid terrenum & visibile desinere, finemque habere: regnum autem eius spirituale perpetuo duraturum fuisse: ad eosque potius qui fidem Iacob, & Dauidis secuti sunt, quam genus carnale pertinere, abunde docent prophetæ. Quod tamen neque Iudæi, neque Apostoli illis temporibus rectè intellexerunt; tem-

pus verò ipsum & res postea clariùs edocuit. In
 Pfal. 31. quibus princeps ipse Dauid: *Iuravi*, inquit, *Domini-
 nus Dauid veritatem, & non frustrabitur eum: de fru-
 ctu ventris tui, ponam super sedem tuam. Si custodie-
 rint filij tui testamentum meum, & testimonia mea,
 hæc quæ docebo eos, & filij eorum usque in seculum
 Pfal. 88. sedebunt super sedem tuam. Et in alio psalmo: In æ-
 ternum illi seruabo misericordiam meam, & testamen-
 tum meum fidele ipsi: & ponam in seculum seculi semen
 eius, & thronum eius sicut dies cæli. Si autem dereli-
 querint filij eius legem meam, & in iudiciis meis non
 ambulauerint, si iustitias meas profanauerint, & man-
 data mea non custodierint, visitabo in virga iniquita-
 tes eorum, & in verberibus peccata eorum: Misericor-
 diam autem meam, non dispergam ab eo, neque noc-
 bo in veritate mea, neque profanabo testamentum me-
 um, & quæ procedunt de labijs meis non faciam irri-
 ta. Semel iuravi in sancto meo, si Dauid mentiar, se-
 men eius in æternum manebit, & thronus eius sicut
 sol in conspectu meo, & sicut luna perfecta in æternum
 & testis in cælo fidelis. Quæ de regno visibili Da-
 uidis, quod in Roboam nepote eius scissum fuit,
 nequaquam intelligi possunt. Et hæc quidem
 ipse Dauid magnificè. At longè distinctius Iere-
 mias, cuius prophetæ sensus ille est: Iosias iustus,
 & Deo gratus, quatuor habebat filios, Ioachazum,
 inquam*

inquam, & Ioachim, Sedechiam, & Selumum;
 ex quibus Ioachim, cum omni genere vitiorum
 scelerumque vitam suam contaminasset: populum
 Dei oppressisset: viduæ aduenæ & pupilli causam
 non iudicasset: Deum ad iram prouocauit: & non
 tantum ipse, verum etiam filius eius Ieconias; quem
 non minus scelerum, quam regni successorem re-
 liquit. Latere hoc noluit seruum suum Ieremiam
 Dominus, & ea verba in commentarios prophe-
 tiæ suæ de ultimo, quantum ad carnem, regni Da-
 uid occasu, referre iussit: *Hæc dicit dominus: Scri-* 22. cap.
be virum istum sterilem, virum qui in diebus suis
non prosperabitur; nec enim erit de semine eius vir,
qui sedeat super solium Dauid, & potestatem habeat
ultimam in Iuda. Quo loco ubi virum sterilem scribe-
 bere iubet; non tam eam sterilitatem, quæ carnis
 est, quam ipsam imperij & regni ablationem, de-
 nuntiat Deus. Nam etsi de Ieonia natus est Salati-
 el, cæteri que septem filii, & de Salatiel natus est
 Zorobabel; & per ordinem ventum est ad Christum:
 tamen ut D. Hieronymus inquit, in diebus Ioachin,
 id est Ieoniæ, non successit ei rex filius, sicut ipse
 patri successerat; sed fuit in captiuitate & Salatiel,
 & Zorobabel, & usque ad Christum nullus obtinu-
 it regiam potestatem. Vnde & Iosephus refert de
 sacerdotali genere, ac tribu Leui fuisse principes,

quibus successerit Herodes Antipatri filius Prose-
lythus. Quod autem de non auferendo sceptro
de Iuda scriptum est; id non tam ad domum Dauid
referendū est, quàm ad tribum totam; quæ semper
inter alias tribus primas partes obtinuit: à qua &
gens tota, & regio, vt Eusebius de Euangelica de-
monstratione docet, Iudæa denominata est. Quæ
sceptrum illud à spiritu sancto per Iacob domui Iu-
dæ datum, primū in regibus, deinde in iudicibus
ordinariis Sanhedrin, hoc est, septuaginta senio-
rum, qui etiam ablato regno in Gazith causas po-
puli iudicabant, conseruauit. Penes hoc collegi-
um septuaginta seniorum, summa pacis ac belli fu-
it: his authoribus, bella suscipiebantur ac depone-
bantur: hi de maximis rebus cognoscebant: hi o-
mnes legis ac fidei difficultates decidebant. *Non
erant iudicantes tribum, tradunt Rabini, vel sce-
ptrum, neque pseudopphetam, neque sacerdotem
magnum, nisi domus iudicij septuaginta iudicum: nec
erant egredientes ad licitum bellum, nisi secundum
os domus iudicii septuaginta iudicum: nec adde-
bant ciuitati, nec salariis templi, nisi per os domus
iudicii septuaginta iudicum: nec conuentus iudi-
cum inferiorum tribubus poterat ordinari, nisi per
domum iudicii septuaginta iudicum; quod per ma-
nuum impositionem fiebat. Retinebantque hi au-
thori,*

thoritatem suam vsque ad tempora Herodis Ascalonitæ; qui non modò alienigena, patre Idumæo, matre Araba; verùm seruus quoq; Machabæorum fuit: ex eoq; consilio plurimos occidit, reliquis autem suam authoritatem ademittit. Vnde illa eius ordinis querela: *Nobis non licet occidere quenquam.* Et in libro Sanhedrin Ierosolymitano: *Ue nobis, quia recessit sceptrum de Iuda, & nondum uenit filius Dauid, id est, Messias.* Quod ipsa prophetia pulchrè distinguit: *Non recedet sceptrum de Iuda, & iudex, seu scriba, de fœmore eius, donec ueniat Silo.* Quibus verbis planè indicatur: etsi sceptrum, seu regnum, de Iuda ablatum fuerit; iudicem tamen & scribam auferendum non fuisse, donec ueniret Silo, id est, filius virginis Messias, cuius est regnum. Quanquam non in iudicibus tantùm, qui scribæ dicebantur; sed etiam in principibus continuatio hæc sceptri seu principatus demonstrari possit. Nam & Zorobabel, qui populi in reditu è captiuitate princeps extitit, de tribu Iuda fuit: & alii omnes penes quos vsque ad Machabæos administratio fuit, de tribu Iuda fuerunt, ut ipsi etiam Talmudistæ tradunt. Machabæi quoque, qui postea vsque ad Herodem Ascalonitã Iudæorum principatum obtinuerunt, de tribu Iuda censebantur: quia tribus regia & tribus Iuda com-

mixtæ

Jerem. 23.

Osee 3.

mixtæ erant, vt patet 4. Reg. II. Vnde & ipsi Machabæi secundùm genus maternũ ex tribu Iuda processerunt. Verum nos, vnde digressi sumus, reuertamur. Cùm igitur, ita vt paulò antè diximus, de vltimo occasu regni seminis Ieconix per Ieremiam prædictum fuisset, statim sequenti capite illud sequitur: *Ecce dies venient, dicit Dominus, & suscitabo Dauid germen iustum; & regnabit rex, & sapiens erit, & faciet iudicium & iustitiam in terra. Et capite 30. Non dominabuntur eis amplius alieni; sed seruient Domino Deo suo, & Dauid regi suo, quem suscitabo eis.* Et apud Oseam: *Dies multos sedebunt filios Israhel sine rege, & sine principe, & sine sacrificio, & sine altari, & sine ephod, & sine theophimis; & post hæc reuertentur filij Israhel, & quærent Dominum Deum suum, & Dauid regem suum; & pauebunt ad Dominum, & ad bonum eius nouissimo dierum.* Magistri quidem Hebræorum diuinantes, & quasi circa ianuam ambulantes, dixerunt: *Iste rex Messias, si de viuis est, Dauid est nomen eius; si de mortuis, Dauid est nomen eius.* Verùm hæc ita cõmodissimè explicantur: si illa prima ad temporale Dauidis regnũ, quod plerunque ob peccata principum de gente in gentem, de familia in familiã transferri, ac nonnunquam penitus extinguì, ac occumbere solet: hæc verò ad spirituale dominium, æternis duraturum

rum temporibus, referantur. Equidem ipse Ieremias, quale hoc sit regnum, de quo posterius dixit, & quod denuò exoriturum prædixit, in sequentibus exponit: *In diebus, inquit, illis, saluabitur Iuda, & Ierem. 23. Israhel habitabit confidenter; & hoc est nomen, quod vocabunt eum: Dominus iustus noster. Et non dicent ultra: Viuit Dominus, qui eduxit Israhel de terra Ægypti; sed viuit Dominus, qui eduxit semen Israhelis de terra Aquilonis, & de cunctis terris, ad quas eieceram illos.* Sed & primus Dauid, regni sui perpetuitatem; ac secundi Dauid suscitationem, diuinitus exponit, eumque vt Deum verum celebrat: *Dispo-* Psal 88.
sui testamentum electis meis, iuravi Dauid seruo meo; usque in æternum præparabo semen tuum, & ædificabo in generatione & generationem sedem tuam. Confitebuntur cæli mirabilia tua Deus, etenim veritatem tuam in ecclesia sanctorum. Quoniam quis in nubibus æquabitur Domino, similis erit Deo in filiis Dei? Deus qui glorificatur in concilio sanctorum, magnus & terribilis super omnes, qui in circuitu eius sunt. Domine Deus virtutum, quis similis tibi? quæ ad spirituale regnum referri, nemo est qui non videat. Quod cum coeca Iudæa nec videt, nec distinguit, errat usque adhuc, & alios in errorem inducit. Ideò verum regem Dauidem repudiat, alium Messiam expectat, Antichristi pompam & splendorem præstolatur.

latur. Illud, inquam, non videt, regnum quidem Davidis ciuile illud & seculare desitutum fuisse; regnum autem eius spirituale sempiternis temporibus, in rege Messia mansurum esse: & hoc est, quod nunc pollicetur Angelus: *Dabit, inquit, illi Dominus sedem David patris eius: & regnabit in domo Iacob in æternum: & regni eius non erit finis.* Dabit, inquit, illi Dominus Deus, sedem David; non illam angustam, & terrenam, non mortalem, & caducam tantum; sed æternam quoque, & cuius finis non sit futurus, quæ in omnes gentes diffundenda foret: *Et dominabitur à mari vsq; ad mare, & à flumine vsq; ad terminos orbis terrarum.* Hæcque causa est, cur Christus dominus, cum eum turba regem creare voluerat, id omninò refugerit: hæc causa, ob quã apud Pilatum dixerit: *Regnum meum non est ex hoc mundo, etc.* Quod idem confirmat D. Paulus: *Non omnes, inquit, qui ex circumcisione sunt Israël, hi sunt Israëlitæ; neque qui semen sunt Abraham, omnes filij Abraham: id est, Non qui filij carnis, hi filii Dei; sed qui filii sunt promissionis, æstimantur in semine.* Promissionis enim verbum hoc est &c. iis quos vocauit, nõ solum ex Iudeis, sed etiam ex gentibus: sicut in Osee dicit: *Vocabo non plebem meam, plebem meam, & non dilectam, dilectam.* Quemadmodum autem Davidis regnum, vti diximus, etsi primò & præcipuè terre-

Psal. 71.

Rom. 9.

terrenum & seculare fuit; secundariò tamen & ex
 consequenti, etiam spirituale modo suo, ita vti di-
 ximus, erat; ita & Iesu Christi regnum, quantumvis
 illud primò & principaliter cæleste & spirituale sit,
 idem tamen ipsum & terrenum esse debuit: non
 quidem in Iudæa tantum, sed in vniuersis præterea
 gentibus, ac vniuerso orbe, iuxta illud: *Postula à* Psal. 2.
me, & dabo tibi gentes hæreditatem tuam, & possessionem
tuam terminos terræ. Et sedes quidem Dauid,
 domusque Iacob, quæ & qualis sit hæctenus dixi-
 mus: nunc vbi tandem hoc tempore sit, semperque
 fuerit, & inter quos versetur; ac quis in ea sede nunc
 eius loco, posteaquàm ad dexteram patris ipse se-
 dit, confederit, paucis videamus. Constituerat
 quidem rector Israël Deus caput regni sui Iudæ-
 am, ac domum Iacob futuram gentem electam, po-
 pulum acquisitionis, regale sacerdotium, hæredi-
 tatem Israël: *Quorum adoptio est filiorum, et gloria, et* Rom. 9.
testamentum, & legislatio, & obsequium, & promissa:
quorum patres, ex quibus est Christus secundum carnem.
 Nam vt Psaltes diuinus inquit: *Repulit tabernacu-* Psal. 77.
lum Ioseph, & tribum Ephraim non elegit: sed elegit
tribum Iuda, montem Sion quem dilexit. Sedes autem
 ac thronus regni eius Ierosolyma, ciuitas sancta, ci-
 uitas Dauid, ciuitas iustitiæ, ciuitas decoris per-
 fecti, gaudium vniuersæ terræ esse debuit: vnde

omnibus gentibus ac populis iura daret: unde leges, sacra, cæremonias, cunctæ nationes acciperent: quò omnes supplices ac subactæ venirent.

- Ierem. 17.** Docet hoc clarè Ieremias: *Si, inquit, audieritis me, ingredientur per portas ciuitatis huius, reges & principes, sedentes super solium David, & ascendentes in curribus & equis, ipsi & principes eorum, viri Iuda & habitatores Ierusalem: & habitabitur ciuitas hæc in sempiternum. Si autem, inquit, non audieritis me, succendam ignem in portis eius, & deuorabit domos Ierusalem, & non exstinguetur.* Docet hoc & ipse
- Matth. 15.** Christus dominus, cùm inquit: *Non sum missus, nisi ad oues quæ perierunt domus Israël. Non est bonum sumere panem filiorum, & mittere canibus.* Hoc idem planctu illo suo acerbo, supra Ierusalem significat:
- Luc. 14.** *Ierusalem, inquit, Ierusalë, quæ occidis prophetas. Si cognouisses & tu, & quidem in hac die, quæ ad pacem tibi: nunc autem abscondita sunt ab oculis tuis.* Docet
- Acto. 13.** idem Paulus & Barnabas: *Vobis oportebat primum loqui verbum Dei: sed quoniam repellitis illud, & indignos vos iudicatis æternæ vitæ, ecce conuertimur ad gentes.* At postquàm gens illa, vrbsque simul recessit à viis domini: neglexit mandata eius: ingratam se tanti beneficii præstitit: nec cognouit tempus visitationis suæ; tum illud Domini consecutum est:
- Matth. 8.** *Dico autem vobis, quòd multi ab oriente & occiden-*

*cidente venient, & recumbent cum Abraham, & Isaac, & Iacob, in regno cælorum: filii autem regni cici-
 cientur in tenebras exteriores. Et, Relinquetur vobis* Matth. 21.
domus vestra deserta. Et, Auferetur à vobis regnum Matth. 23.
*Dei, & dabitur genti facienti fructus eius. Quæ om-
 nia non aliud docent, quàm illud, Iudæam, si in viis
 Domini ambulasset: si præcepta eius custodiuiisset:
 siq; beneficiorum illius memor fuisset: si diem visi-
 tationis suæ cognouisset; caput regni Messiaæ futu-
 ram fuisse, sedem autem Ierosolymam: cæteras au-
 tem gentes & nationes hinc, tanquam ex arce sum-
 ma, salutem, omniaque alia petituras fuisse. Si au-
 tem reliquerit Dominum: si à viis eius recesserit:
 si tantis beneficiis se ingratam præstiterit; tum am-
 plius non in caput, sed in caudam futuram; tum
 amplius illis ipsis gentibus, quibus præesse debuit,
 seruituram, & ad extremum perituram. Quo qui-
 dem loco animaduertendum est, quanta vis sit in-
 gratitudinis, à cuius etiam nomine abhorrent La-
 tini, cuius causa firmissima etiam Dei promissa re-
 texantur, iuxta illud Ieremiæ: *Repente loquar ad-* Jerem. 18.
*uersus gentem, & aduersus regnum, ut emicem &
 destruam & disperdam illud. Si pœnitentiam egerit
 gens illa, à malo suo, quod locutus sum aduersus eam;
 agam & ego pœnitentiam super malo, quod cogitavi ut
 facerem ei: & subito loquar de gente & regno, ut*
S iij ædifi-*

Rom. 9,

Osee. 2.

*ædificem & plantem. Si fecerit malum in oculis meis, ut non audiat vocem meam; pœnitentiam agam super bono, quod locutus sum ut facerem ei. Nemo igitur sibi dum peccat blandiatur: nemo promissiones alleget; sed cesset potius ac pœnitentiam agat, & sic demum speret meliora. Translato igitur ita uti dictum est, à Iudæis ad gentes Messia regno, regiae quoque translatio fieri debuit; ita ut ex principe Iudææ vrbe, ad principem & caput gentium urbem sedes Daudis translata sit, Romam, inquam: *Et erit in loco ubi dictum est eis: Non plebs mea vos, ibi vocabuntur filii Dei viui. Vocabo non plebem meam, plebem meam: & non dilectam, dilectam: & non misericordiam consecutam, misericordiam consecutam. Dicam non populo meo, populus meus es tu; & ipse dicet, Deus meus es tu: ut sint plures filij sterilibus, quàm eius quæ habebat filios. Quemadmodum enim corpore toto gentis hebrææ reprobato, aliud corpus assumptum est; ita capite illius neglecto, caput aliud quæsitum est. Quis hæc docet? aut unde hæc probas? primùm ex re ipsa: sic enim per mille trecentos & amplius annos fieri videmus, Romæ primam sedem esse: inde fidem & cæremonias à cunctis gentibus peti: illuc obedientiam regum ac regnorum sponte, sine omni vi aut coactione, deferri. Deinde ex promissione Christi, quam de-**

dit

dit primo sedis illius antistiti Petro: *Tibi dabo cla-* Matth. 16.
ues regni cælorum: at clauēs summam potestatem,
 summum imperium, designare docet scriptura, iu-
 xta illud Isaia: *Dabo clauem domus Dauid, super* Isaia 22.
humerum eius: & aperiet, & non erit qui claudat; &
claudet, & non erit qui aperiat. Quod paulò antè
 idem Isaias interpretatus est, loquens ad Sobnam
 præpositum templi, cui clauēs istæ auferendæ erāt,
 & dandæ Eliacim filio Helciæ, ministro regis Eze-
 chia, de quo dictus locus ad literam intelligitur:
Et erit: inquit, in die illa, vocabo seruum meum Eli-
acim filium Helciæ, & induam illum tunica tua, &
cingulo tuo confortabo eum, & potestatem tuam dabo
in manu eius; & erit quasi pater habitantibus Ierusa-
lem, & domui Iuda. vbi clauēs summam & præcipu-
 am potestatem interpretatur Isaias, vnde in dediti-
 onibus vrbium illi clauēs traduntur, qui summa re-
 rum potitur; & cui illæ traduntur, ei tota regendæ
 ciuitatis potestas committitur. At quas clauēs Pe-
 tro Christus promittit? non alias certè, quàm eas,
 quas ipse à patre accepit, de quibus illud: *Ego sum* Apocal. 1.
primus & nouissimus, & viuus, & fui mortuus; &
ecce sum viuens in secula seculorum, & habeo clauēs
mortis & inferni. Vnde sedes Dauid sempiterna, nō
 tàm Dauidi & filio eius Salomoni, qui quadraginta
 solos ipsos annos regnauit, quàm semini eius bene-
 dicto

dicto Christo Domino, in perpetua secula promittitur. Tuum, hoc est, dices iudicium? tuus priuatus sensus? Nequaquam: semper enim fugio, ne aliquid meum videri possit. Idem sentiunt veteres, non tantum Latini, sed & Græci patres. Epiphanius primus ante mille annos, sic locum interpretatus est istum:

Lib. 1. tom:
2. cap. 29.

*Thronus, inquit, Dauid, & regia sedes, est sacerdotium in sancta ecclesia, quam dignitatem regiam simulque Pontificum coniunctam largitus est dominus sanctæ ecclesiæ suæ, translato in ipsam throno Dauid, nõ deficiente in alio. Et à domo quidem carnali Iudææ & Isràel, regia dignitas translata est: firmiter autem sedet thronus in sancta Dei ecclesia in æternum, ex duplici origine dignitatem habens, regia et sacerdotali: cum & Christus ipse sit princeps, & Pontificum præfectus, & rex regum, & dominus dominantium. Hæc Epiphanius. Quibus verbis docet, thronum Christi visibilem, non in seculari imperio tantum, sed & multo magis in sacerdotali dignitate consistere, ut eadem sit pontificia & regia dignitas. Quibus non dissimile aliquid docet D. Petrus. Nam cum in Exodo dictum fuisset: *Et vos eritis mihi in regnum sacerdotale, & gens sancta*: Petrus mutat ordinem: *Vos autem genus electum, regale sacerdotium, gens sancta*: ac regale sacerdotium vocat; illic enim regnũ, hinc sacerdotium primas obtinet partes. Ideoq;*

ibi

Exod. 19.

1. Petri 2.

ibi regnum sacerdotale, at hîc regale sacerdotium dicitur. Quod non nisi penes primum & summum Christi successorem esse videmus. Epiphanium sequuntur cæteri ferè omnes, sed & prior Epiphanius Irenæus: *Ad hanc, inquit, ecclesiam propter potentiorē principalitatem, necesse est omnem conuenire ecclesiam, hoc est, eos, qui sunt vndique fideles; in qua semper ab his qui sunt vndique, conseruata est ea, quæ est ab Apostolis, traditio.* Cyprianus similiter: *Deus vnus est, & Christus vnus, & vna ecclesia, & cathedræ vna, super Petrum Domini voce fundata. Aliud altare constitui, aut sacerdotium nouū fieri, præter vnum altare, & vnum sacerdotiū, nō potest. Quisquis alibi collegerit, spargit.* Athanasius, & vnā cum eo totius Ægypti Episcopi, Marcum sanctæ Romanæ Apostolicæ sedis, atque vniuersalis ecclesiæ Papam nominant; sanctamque eius sedem matrem, & caput omnium ecclesiarum agnoscunt; cui cum omnibus sibi commissis perpetuò se futuros obediētes pollicentur. Et ad Felicem Papam similiter: *Scimus in Nicæna magna synodo, trecentorum decem & octo episcoporum, ab omnibus concorditer esse roboratum, non debere absque Romani Pontificis sententia concilia celebrari, nec episcopos damnari.* Et paulò post: *Tu prophanarum hæresium, & impetitorum, atque omnium infestantium depositor, & princeps, & doctor,*

Lib. 3. aduersus hæreses, cap. 3.

Lib. 1. epistola 8.

In epistola ad Marcum Papam.

De iudicio
dei, & de pec-
cato, orat, 3.

Epistola 52.

Epistola 57.

doctor, caputq; omnium orthodoxæ doctrinæ & im-
maculatæ existis. Et paucis interiectis: O sanctissime
pater patrum, abscinde blasphemias, etc. Basilii illa
sunt: Beatus Petrus, qui omnibus discipulis iudi-
cio ipsius Christi prælatus est, qui solus maius cæ-
teris testimonium & beatitudinem obtinuit, & cui
regni cælorum clauces creditæ sunt. Idem ad Athana-
sium: Visum est autem nobis conueniens, ut ad epi-
scopum Romanum de cognoscendis rebus iis, quæ hîc
geruntur, ac de sententia ferenda, mittamus litteras;
præsertim cum ex communi & synodico decreto, ali-
quos illinc mitti esset difficile, ut ipse de hoc negotio,
pro auctoritate sua, statuatur. Chrysostomus similiter:
Illi ecclesiæ, quæ tot tantisq; fluctibus impetu irrum-
pentibus immobilis manet, pastor & caput, piscator ho-
mo est. Hieronymus eodem modo ad Damasum Pa-
pam: Quoniam vetusto oriens inter se populorum fu-
rore collisus, indiscissam Domini tunicam & desuper
textam minutatim per frustra discerpit; & Christi vi-
neam exterminant vulpes, ut inter lacus contritos, qui
aquam non habent, difficile, ubi fons signatus, & hor-
tus ille conclusus sit, possit intelligi: ideo mihi cathe-
dram Petri, & fidem Apostolico ore laudatam censui
consulendam; inde nunc meæ animæ postulans cibum;
vnde olim Christi vestimenta suscepi. Neque verò tan-
ta vastitas elementi liquentis, & interiacēs longitudo
termi-

ternerum, me à pretiosa margaritæ potuit inquisitione prohibere. Ubique fuerit corpus, illuc congregantur aquilæ. Profligato à sobole mala patrimonio, apud vos solos incorrupta patrum conseruatur hæreditas. Ibi cessite terra fecundo, Dominici seminis puritatem centeno fructu refert: hinc obruta sulcis frumenta, in lolium auenasq; degenerant. Nunc in occidente sol iustitiæ oritur; in oriente autem lucifer ille, qui ceciderat, supra sydera posuit thronum suum. Vos estis lux mundi, vos sal terræ, vos aurea vasa, & argentea: hinc testacea vasa, vel lignea, virgam ferream, vel æternum operiuntur incendium. Quanquam igitur tui me terreat magnitudo, inuitat tamen humanitas, à sacerdote victimam salutis, à pastore præsidium ouis flagito. Faceat inuidia: Romani culminis recedat ambitio; cum successore piscatoris, & discipulo crucis loquor. Ego nullum primum, nisi Christum sequens, beatitudinis tuæ, id est cathedræ Petri communionem socior: super illam petram ædificatam ecclesiam scio. Quicumq; extra hanc domum agnum comederit, prophanus est. Si quis in arca Noë non fuerit, peribit regnante diluuiio. Et hæc quidem vetustissimi, tam orientis, quàm occidentis patres, de hac sede ac throno. Neque verò dissimilis est, aut ortus aut progressus, & incrementa vtriusque huius sedis. Vtraq; per labores, pressuras, persecutiones, latibula, fugas,

stetit, & confirmata est. De sede Dauidis iam antea dictum est. Romanæ sedis laborum testes sunt, illæ cauernæ, illi cuniculi, illæ cryptæ, quas etiam nunc orbis miratur, vbi eius sedis principes delitescere, vbi christianum populum docere solebant; testantur superbæ thermæ, theatra, quas manibus suis coacti erigebant: testatur ille tuus Sora-
 ætes, ô beate Syluester, in quo instar vulpeculæ delituiſti: vnde sacrum illud baptisma Constantino primo christiano protulisti: vnde cæteri, tanquam pecora morti destinata, educebantur. Ad trigessimum & amplius, Pontificem loci illius vix aliquis morte spontanea interiit, omnes ferè cæsi sunt, omnes martyres dicebantur: & quantò profundius hic thronus, hæc sedes fundabatur: tantò magis in cælum totum ædificium surgebat; vt dissipato & euerso capitolio Vaticanus, eiecto Romulo, Petrus substituëretur. Nunquam sine persecutione fuit sedes Dauid, nunquam sine persecutore; nunquam ecclesia Romana sine illis, qui eam infestarent, hæreticis. Persequebâtur sedem Dauid, filij, & amici, homines pacis; idem patitur Petri sedes. *Amici mei, & proximi mei, aduersum me appropinquauerunt & steterunt. Ex nobis prodierunt, sed non erant ex nobis; nam si fuissent ex nobis, permanissent utique nobiscum.* Crescebat persecutionibus domus Dauid: crescit

Psal. 38.

1. Ioan. 2.

crescit & illustratur similiter Romana sedes. Mite
 fuit & mansuetum regnum Dauid : mitis itidem &
 mansueta sedes Petri, fuit & esse debet. Verè igitur
 est sedes Dauid, & domus Iacob. De hac sede, &
 throno magnificè scriptura : *Et suscitabo mihi sacer-* 1. Reg. 2.
dotè fidelem, qui iuxta cor meum & animā meam faci-
et; & ædificabo ei domum fidelem, & ambulabit coram
Christo meo cunctis diebus. Isaias similiter: *Vos autem* Isaiæ 61.
sacerdotes Dei vocabimini; ministri Dei nostri, dice-
tur vobis. Fortitudinem gentium comedetis, & in glo-
ria earum superbietis. Pro confusione vestra duplici
& rubore, laudabunt partem eorum, propter hoc in
terra sua duplicia possidebunt, lætitia sempiterna erit
eis. Omnes qui viderint eos, cognoscent illos, quia isti
sunt semen cui benedixit dominus. Et iterum: *Hæc* Isaiæ 49.
dicit Dominus Deus: Ecce leuabo ad gentes manum
meam, & ad populos exaltabo signum meum, & adfe-
rent filios tuos in vlnis, & filias tuas super humeros
portabunt. Et erunt reges nutritij tui, & reginæ nu-
trices tuæ: vultu in terram demisso adomabunt te, &
puluerem pedum tuorum lingent, & scies quia ego Do-
minus; super quo non confundentur, qui expectant e-
um. Et erit in nouissimis diebus præparatus mons do- Isaiæ 2.
mus Domini in vertice montium, & eleuabitur super
colles, & fluent ad eum omnes gentes, & ibunt ad eum
populi multi. Quod idem Daniel prædicit: In diebus Daniel. 2.

Daniel 7.

Isaïæ 60.

regnorum illorum, suscitabit Deus regnum cæli, quod in æternum non dissipabitur, & regnum eius alteri populo non tradetur. Et paulò post: Regnum autem & potestas & magnitudo regni, quæ est subter omne cælum, datur populo sanctorum altissimi, cuius regnum, regnum sempiternum est; & omnes reges seruiant ei, & obediunt. Et ædificabunt, inquit Isaïas, filij peregrinorum muros tuos, & reges eorum ministrabunt tibi. In indignatione enim mea percussi te, & in reconciliatione mea misertus sum tui. Et aperientur portæ tuæ iugiter, die ac nocte non cludentur, ut afferatur ad te fortitudo gentium, & reges earum adducantur. Gens enim & regnum quod non seruiert tibi, peribit, & gentes solitudine vastabuntur. Gloria Libani ad te veniet: abies, & buxus, & pinus, simul ad ornandum locum sanctificationis meæ; & locum pedum meorum glorificabo. Et venient ad te curui filij eorum, qui humiliauerunt te, & adorabunt vestigia pedum tuorum, omnes qui detrahebant tibi: & vocabunt te ciuitatem Domini Sion sancti Israël. Pro eo quòd fuisti derelicta, & odio habita, & non erat qui per te transfret, ponam te in superbiam seculorum, gaudium in generationem & generationem: & suges lac gentium, & mamilla regum lactaberis, & scies quia dominus ego saluans te, & redemptor tuus fortis Iacob. De Ierossolyma hæc dici iussitabit nouus aliquis Iudæus. At-

qui

qui Ierosolymam amplius caput non subleuaturam
 iidem prædixerunt prophetæ, prædixit & Christus
 Dominus. Neque tamen hoc dico, non posse eam
 sedem aut regnum aliò, ob peccata hominum mul-
 tasque alias causas, transferri: ita tamen vt nunquã
 ab eius successione & semine auferatur, cui dictum
 est: *Pasce oues meas, pasce agnos meos.* Neque enim Ioan. 21.
 aut certæ alicui personæ, aut certo loco, sed vniuer-
 so ordini atque successioni principis Apostolorum
 promissio facta est. Quæ igitur sit hæc ipsa sedes
 Daud, quæ domus Iacob, in quo loco sedē fixerit,
 paucis quasi in typo dictum est. Nemo igitur dicat,
 nemo se vanè efferat, ecclesiam Dei extinctam ali-
 quando fuisse, atque diminutam, aut aliquo tempo-
 re, donec sponsus eius aduenerit, commoueri aut
 conuelli posse: *Correxerit enim semel orbem terrarum,* Psal. 95.
& in æternum non commouebitur. Nemo Petri sedi
 minetur: *Portæ enim inferi non præualebunt aduer-* Matthæi 16.
sus eam. Gens & regnum, quod non seruiert illi peri-
bit. Experta est hoc ipsum Asia, experta Ægyptus,
 experitur nunc misera Græcia, atque Hungaria:
 quod utinam nos experiamur nunquam. Sed si tam
 clara, tam euidentia, tam illustria huius ipsius no-
 bilissimæ sedis signa & indicia sunt: si hæc ipsa ciui-
 tas in tam alto monte posita est: si hæc luna, hæc
 stella, hæc cynosura, hic sol, lux denique ipsa tam
 clara

clara est, cur à tot millibus hominum videri non potest? Cur in gloria positum iustum Ioseph, inhumani fratres non agnoscunt? Cur vbera illa quibus alii & educati sunt, refugiunt? Cur matrem pulchræ dilectionis & magnæ spei non amplectuntur? Non aliam certè ob causam, quàm quòd sedes ista humilis esse debet, nos ambitiosi: sedes ista pacifica, nos turbulenti: sedes ista sub cruce, nos voluptatibus diffluimus: sedes ista laboriosa, nos in perpetuò otio: sedes ista cælestis ac spiritualis, nos mundo ipso magis, vt ita dicam, mundani sumus. Quid enim vult mundus, quod non nos magis velimus: Quis œconomus quandoque magis prouidus? Sacerdos. Quis pecuniæ collector auarior? Sacerdos. Quis scriba exactior? Sacerdos. Quis pragmaticus acrior? Sacerdos. Quis voluptatum minister mollior? Sacerdos. Quis mensarum apparator proluxior? Sacerdos. Quis venator sagacior? Sacerdos. Quis computator, quis rationum exactor diligentior? Sacerdos. Quis dux belli imperator, miles nonnunquam acrior? Sacerdos. Quis ad extremum cocus, potior, scurra? Sacerdos. Cùm igitur sedes Dauid talis, qualem diximus, esse debeat; talem autem propter improbos mores nostros isti non vident, eam agnoscere nolunt. Scitis enim quid crimentur, quid tertio quoque verbo
appel-

appellent, mōres, inquam, & vitam corruptissimā
 nostram. Auferatur modò velamen istud à facie e-
 ius decora, & exorietur tanquam luna, aut sol in
 meridie: & confluent ad eam omnes gentes, & ibunt Isaie 2.
 populi multi, & dicent: Venite & ascendamus ad
 montem Domini, & ad domum Dei Iacob, & doce-
 bit nos vias suas, & ambulabimus in semitis eius: & Psal. 21.
 reminiscetur, & conuertentur ad Dominum Deum
 suum, & adorabunt eum. Huic ergo adhæreamus,
 hanc sequamur, in hac simus, in huius sinu & gre-
 mio moriamur; ab hac nos diuelli non patiamur,
 si de domo David esse volumus, & non filii Belial
 appellari: si contubernales sanctorum, & domestici
 Dei, membra summi capitis, hæredes Dei, cohære-
 des Christi: si in vita futura æterno patri tradi
 cupimus, vt sit ipse omnia in omnibus. Sed
 de Christi regno satis diximus. Nunc
 conceptionis Regis tanti
 modum videa-
 mus.

NUNTII SALVTIS,

Siue de incarnatione,

SERMO QVINTVS.

Quomodo fiet istud quoniam virum non cognosco? Et respondens Angelus dixit ei, spiritus sanctus superueniet in te, & virtus altissimi obumbrabit tibi: ideoq; & quod nascetur ex te sanctum, vocabitur filius Dei, &c.

Ezech, 44.

Isaie .14.

Chrysostom.
homil. 49. in
Genes.

INter reliqua diuina & admiranda arcana, quæ Ezechieli cælitus fuerunt reuelata, illud vnum, ac nescio an non summum est: *Et conuertit me, inquit, ad viam portæ sanctuarii exterioris, quæ respiciebat ad orientem, & erat clausa: & dixit Dominus ad me: Porta hæc clausa erit non aperietur, & vir non transiet per eam, quoniam Dominus Deus Israël ingressus est per eam, eritq; clausa principi, princeps ipse sedebit in ea, ut comedat panem coram Domino: per viam portæ vestibuli ingreditur, & per viam eius egreditur. Et Isaïas: Transibit in pace, semita in pedibus eius non apparebit. Porta hæc clausa, virgo est, & qui ingreditur per eam, contra omnem Ariam impietatem, Deus ipse est. Oportebat enim eum,*

eū, inquit Chrysostomus, partim natiuitatem communem cum nostra natiuitate habere, & partim alienum esse ab ea: atque ea quæ hominis sunt supra hominem operari. Vtrunq; ergò hoc in eo conspicitur arcanum. Nam de vtero prodire, commune habebat nobiscum: absque nuptiali autem congressu nasci, supra nostram est natiuitatem. Eius igitur tam admirandi secreti, ab Ezechiele primum visi, nunc autem virgini ab Angelo expositi, quærit rationem & modum virgo. *Quomodo*, inquit, *fiet istud, quoniam virum non cognosco?* ac si diceret, quomodo per portam istam ingreditur & egreditur princeps, si porta ista sempiterno voto & instituto meo clausa est, & erit semper? si nemo per illam vnquam ingreditur, vterusque meus soli suo custodietur conditori? Pandit Angelus portæ ostiarium: pandit modum aperiendæ portæ: demonstrat clauem: *Spiritus*, inquit, *sanctus superueniet in te, & virtus altissimi obumbrabit tibi.* Porta tamen hæc clausa erit, clausa ante partum, clausa in partu, clausa post partum; vt ter non frustra repetiit propheta. Quod totum quale sit, etiamsi angelicum superet caput, duce Deo, consequenter explicemus.

Dictum est, missum fuisse Angelum ad virginem desponsatam: virginem, inquam, vita, virginem

moribus, virginem professione, virginem denique mente & corpore sanctam, ut inquit Apostolus. Audit nuntium voto & instituto suo repugnans. Nunquam enim auditum est, aliquam simul virginem & matrem fuisse. Et toto quidem hoc tempore interna cogitatione contenta fuit, quo tacuit; at ubi virginitatem, quam charissimam habuit, in periculum adduci videt, loquitur, ex admiratione potius & cogitatione, quam diffidentia. Ante, inquit, agricultum, spica non producit; terra non plantata non germinat: nullum in toto orbe eius rei habeo exemplum, in nulla creatura, unde argumentum fidei & solatiū capiam video, verbis tuis credo, & persuasum de his habeo, nec me latet id ab Isaia prædictū esse: modū igitur quæro: *Neq; enim de effectu*, inquit Ambrosius, *dubitavit, sed qualitatem quærit effectus*. scit enim lubricum esse bonum pudoris. Modum tamen ubiq; seruat: medio tutissima incedit. Zacharias enim & senex & sacerdos, hic, quorum multa habuit exempla, in Sara, inquam, Rebecca, Rachele, & quæ ipse expetiit, nuncianti Angelo non credit, turbatur, à seipso excidit, ideò mutus & surdus efficitur. Eva ambitiosa ex aduersò gaudet, effertur, serpenti temerè assentitur. Maria verò modum rei, cuius nullum extabat exemplum, inquit Euthymius, quærit. Nulla enim virgo, ad id usque tempus, sine viro

viro conceperat aut pepererat: institutoq; ac virginitati suæ cauet: nec enim facile quis potest earum rerum obliuisci, quas semel ex animo adamauit. De re ipsa nihil dubitat; neque enim illud audiret, si dubitaret: *Beata, quæ credidisti.* Itaque iniquissimam illam Caluinus comparisonem facit: videri posse, ab eadem malignitate virginis interrogationem proficisci, à qua Zachariæ profecta fuit. Nihil profecto simile. Zacharias siquidem signū quærit: *Unde, inquit, hoc cognoscam?* Virgo modū: *Quomodo fiet istud?* Zacharias rei raræ quidem, vilitatæ tamen, vt dixi, non credit; multæ enim steriles pepererant. Virgo rei impossibilis, & quæ antea nunquam facta est, rationem quærit. Zacharias postulata sua non acceptat, sic enim inquit Angelus: *Exaudita est oratio tua.* Virgo rem subitanæ miratur, de qua nihil vnquam cogitauit: *Quid enim* In Lucam, *tum inauditum,* inquit Ambrosius, *quàm virgo prægnans? contra legem, contra consuetudinem, contra pudorem, cuius carior cura est virgini. Zacharias autē, non de impari conditione, sed de senili ætate non credidit; nam conditio congruebat. Ex viro & femina solennis est partus. Nec incredibile debet videri, ubi natura concordat. Cum enim ætas naturæ sit, non naturæ ætatis, sit plerunq; vt ætas impediatur naturam; nō est tamen irrationabile, vt minor cedat causæ maiori;*

V iij

& po-

Et potior prærogatiua naturæ, vsum inferioris excludat ætatis. Huc accedit, quod Abraham, & Sara filium in senectute susceperant: & Ioseph filius senectutis est. Quod si, quia risit Sara, reprehenditur; iustius condemnatur, qui nec oraculo credidit, nec exemplo.

Libr. 16. de
ciuita. Dei
cap. 24.

hæc Ambrosius. Præclarè igitur Augustinus inter Zachariam (quod fidei rationem attinet) distinxit: Zacharias quando ait: unde hoc sciam, vel per quid hoc cognoscam, qui sum adeò cum uxore senex? desperando dixit, non inquirendo. Maria verò, cum interrogat: Quomodo fiet istud, quia virum non cognosco? inquirendo dixit non desperando. Propterea illi dicitur: Tacebis, quia non credis: huic verò causa exponitur; quia dum interrogaret, de promissione non dubitauit. Sed & Ambrosius, Domini matrem defendit, ac fidei imbecillitatem in solo Zacharia ponit: Maria, inquit, iam de negotio tractat: Zacharias adhuc de nuntio dubitat. Negat ille se credere, qui negat se scire, & quasi fidei adhuc quærit alium authorem: ista se facere profitetur, nec dubitat esse faciendum, quodq; fieri possit inquirat, quomodo. Quærit igitur virgo, propter rei difficilis maiorem illustrationem: propter prauorum errorum, omnisq; dubitationis in futurum exclusionem, nostramque ædificationem. Vide autem virginis humilitatem, virginitatisque studium: oblata sunt illi regna, sceptra

In Lucam.

ptrā

pra patris Dauid ; non quærit quæ & qualia hæc
 futura sint ; sed ipsi soli virginitati suæ cauet ; de re-
 gnis, sceptris nullam curam habet. Vbi illud inpri-
 mis adnotandum est, verbum hoc, *Quomodo*, ne-
 que semper dignum esse reprehensione, neque
 semper laudabile : malum & reprehensibile est,
 quoties verbo Dei non assentitur, quoties omni-
 potentia eius detrahit, quoties non id totum eum
 posse, quod vult, existimat ; quoties ex curiositate
 & infidelitate prouenit, quale illud Capharnaita-
 rum fuit : *Quomodo potest hic dare nobis carnem suam
 ad manducandum ?* Et illud Nicodemi : *Quomodo
 potest homo nasci, cum sit senex ?* Et quale itidem il-
 lud nouorum Capharnaitarum : *Quomodo panis iste
 caro, vinum hoc sanguis Christi esse potest ?* Exitio-
 sum hoc est *Quomodo*. Capharnaitarum hoc tale
Quomodo vocat Cyrillus. At bonum & salutiferum
 illud est, quod spiritus probat, quod temeritati &
 leuitati obsistit, quod institutis suis bonis cauet,
 quod discere cupit; quale hoc est virginis: *Quomodo
 fiet istud, quoniam virum non cognosco ?* Ex qua ple-
 na prudentia & sapientia virginis percontatione
 plura discuntur, quàm ex aliorum subita & temera-
 ria assensione. Quid enim magis dignum erat aut
 perturbatione, aut inquisitione ; quàm Dei videre
 descensionem ad vterum vsque mulieris, Dei in-
 tra

Lib. de virgi-
nitate cap 5.

tra viscera virginis conclusionem, cuius calu thro-
nus est, & terra scabellum pedum eius; tum etiam
vniuersam videre naturam, cum plaste suo coniu-
ctam? Primum autem illud in hoc virginis sermone
obseruandum est, beatissimam virginem Mariam,
non solum mente & corpore, sed etiam voto & pro-
fessione, quicquid Heluidius, & qui ab ipso non
multum absunt, sentiant, virginem fuisse. *Profecto*,
inquit Augustinus, *non diceret virum non cognosco*,
nisi virginem se ante vouisset. Hæc igitur Mariæ ver-
ba indicium sunt eorum, quæ tractabat in arcano.
Nam si causa copulæ conjugalis Ioseph desponsari
voluisset; cur admiratione ducta est, dum sibi nar-
ratur conceptio? cum nimirum illa præstolaretur ad
tempus mater effici, iuxta legis naturâ. Verum quia
oblatu corpus Deo, quasi quoddam ex sacris, inuiol-
labile seruari decebat, ideò miratur; Idem dicit Greg.
Nyssenus sermone de Christi natiuitate: *Hæc*, in-
quit, *vox Mariæ demonstrat esse veram, quæ per occultâ*
illam historiam traduntur. Nam si nuptiarum causa
assumpta erat à Iosepho: quomodo Angelum de partu
predicentem, quasi re noua atq, insolita obstupefactæ,
auerfata esset; quum prorsus speraret, se quoque ipsam
aliquando, iuxta legem naturæ, matrem esse futurum?
Sed quoniam Deo dicatam, & consecratam carnem,
intactam seruari oportebat, propterea etiam si angelus
sis, in-

sis, inquit, ac de cælo veneris, etiamsi supra hominem sit id, quod apportas, attamen vt virum cognoscam, fieri non potest. Hæc Nyssenus. Nullam igitur, ita vt dicere coepi, cum ratione coniunctam causam, hæc ipsa haberet virginis interrogatio, nisi fixa & rata suæ castitatis vota antecessissent. Facile enim illud virgini prudentissimæ in mentem venire posset, eam, quantumvis tunc virgo fuerit, tamen cum & iuuenis esset, & viro desponsata, nihil impedire posse, quin completis nuptiis conciperet. Verùm cum virgo voti sui sibi conscia fuisset; ea causa, tanquam de re, quæ nullo modo saluis legibus naturæ & virginitatis esse possit, quærit, *quomodo fiet istud*, quæ & animo & voto constitui nunquam me virum cognituram, vt aut concipere aut parere possim? Neque tamen id solùm, hoc loco obseruandum est, virginem scilicet voto sempiternæ virginitatis se obstrinxisse; sed illud etiam, quod longè maius est, idem votum à Domino confirmatum & approbatum fuisse: idque ipsi virgini aliquo modo diuinitus significatum ac reuelatum fuisse. Nisi enim hoc esset, poterat rectè Angelus illud inferre: Tu quidem voto, vt dicis, te obligasti; sed hoc votum tuum irritum, neque à Deo acceptum fuit; & proinde tibi nubendum est, liberi fuscipiendi, cum homo non sit in manu sua. Quapropter virgo, tanquam de re pa-

X

cta &

Eta & conuenta, loquitur : *Quomodo*, inquit, *fiet i-*
stud? quomodo decretum cum voto pariter conue-
 niet? qua ratione ero mater, quæ sponfa non sum :
 cùm & ego votum sempiternæ virginitatis fecerim,
 & Deus excelsus, qui non mutatur, illud ita ro-
 borauerit; vt neque fide mea salua, neque diuina
 constantia fixa, aut concipere aut parere possim?
 Ideò autem puto, Deo ita volente, virginem votum
 virginitatis prius fecisse, quàm illud sciret, se ali-
 quando matrem filij altissimi futuram : ne exi-
 stimaretur, eam non virginitatis, aut continentiae
 captam amore, castitatem complexam fuisse; sed
 quia mater Dei futura non fuisset, nisi virgo extitis-
 set: atque ne deinceps foeminæ reliquæ inde, quasi
 excusationem quærent, virginitatem scilicet non
 passim ad omnes, sed ad eam solam, quæ mater Dei
 futura fuisset, pertinuisse, alias autem omninò non
 attingere. Voluit igitur summus ille castitatis, & in-
 tegrîtatis amator Deus, hoc facto illud docere, nò
 ideò matrem filij sui virginitatem amplexam esse,
 quia mater Dei futura erat; quandoquidem pri-
 usquàm hoc sciret, voto sempiterno se obligauit:
 sed ideò, quia virgo fuit, qualem tum nullam fe-
 rè similem illi in Iudæa fuisse credibile est, digna
 tanto, vt mater Dei fieret, habita honore; vt in
 posterum omne tempus, amplissimum spontaneæ
 virgi-

virginitatis Mariæ matris Iesu trophæum erigatur, & aliis exemplum eiusdem virtutis amplectendæ detur, ipsiusque dignitas & amplitudo commendetur. Demùm illud item hoc loco discimus, eam votorum constantiam & firmitatem esse debere, vt quicumque aliquid Deo semel vouerit, id omni eum ratione tueri debere, etiamsi omnia alia commoda prætermittenda, vel incommoda subeunda sint. Docet hoc exemplo suo constantissima virgo, quæ mater etiam Dei esse recusat, si sibi voti constantia sit frâgenda, si data fides fallenda: eligitque potius abiecta esse virgo, quàm fœdifraga Dei mater. Nulla igitur res est tanta, nulla occasio, nullum commodum, nullum periculum, cuius causa susceptum votum violandum sit: nullaque vis humana, nulla potestas est tam potens, quæ ab illo temerè possit absolueret. Neq; enim aut maius quid, aut salubrius potuit offerri, quàm matrē esse Dei; neq; verò maior, aut potentior dispensator esse, quàm Deus ipse; votum tamen sanctè & integrè potius virgo sibi seruandum existimauit, quàm vt mater Dei esset. Nullam igitur tantam causam, tam vrgentem habuit Lutherus, nullam Bulingerus, nullam alii, cur & ipsi votum castitatis rumperent, claustraq; monasteriorum desererent, & aliis paris sacrilegij authores fierent. Glorientur sanè isti, quantum volent, ducibus

& authoribus sectarum suarum: ego certè mihi persuadere nullo modo possum, spiritum illum Dei sanctum & veracem in hominibus perfidis ac periuris permanere potuisse, aut aliquid magnum per illos molitum fuisse: cum præsertim non modò eius tanti flagitij eos non pænituert, sed etiam aliis idem faciendi nefariè authores fuerint. Idem sentiunt me cum veteres penè omnes. Cyprianus in primis: *Christus, inquit, dominus & iudex noster, cum virginem suam sibi dicatam iacere cum altero cernit, quàm indignatur & irascitur, & quas pœnas, incestus eiusmodi coniunctionibus, comminatur?* Basiliius eodem modo: *Horrendo, inquit, sacrilegio, Christi sponsæ adulter efficitur.* Chrysostomus etiam: *Honorabiles, inquit, nuptiæ, sed te iam servare non convenit privilegia nuptiarum: quamvis frequenter hoc ipsum nuptias voces, ego tamen adulterio illud peius existimo, etc.*

Lib. 1. epist. 11

De virginitate. Epist. 6. ad Theodorum

In psal. 99.

Augustinus pariter: *Dum non perseveraverit, inquit, implere quod vouit, fit desertor tam sancti propositi, & reus voti non redditi.* Hæc illi. Itaque etsi cætera omnia salua haberent, hæc tamen nunquam effugient, periuros & votifragos, duces se secutos esse. Atqui irrita facientes primam fidem (de eadem viduarum, voto instituta castitate agens, inquit Paulus) damnationem habent. A damnatis igitur orti, ipsi damnati sint oportet: ac de illorum ordine, qui deos

deos aureos, argenteos, ligneos, & lapideos colunt, de quibus ita præclare sentiunt: vt, *si quis illis vo-* Baruch 6.
tum vouet, & non reddiderit, neque hoc requirant.
 Hæc vera sunt, euidentia sunt, demonstratiua sunt: ita tamen Euangelicos se esse, & vocari volunt. De quibus illud dicimus, quod præclare aliquando Lactantius de veteris seculi sapientibus dixit: *Postquã sublatâ sapientia est, tum demùm sibi homines nomen sapientum vendicare cœperunt; tum autem nemo sibi nomen sapientis usurpauit, cùm omnes erant.* Idem enim istis accidit: postquam sublatum Euangelium est ab ipsis, tum demùm sibi nomen Euangelij vendicare cœperunt: tum autem nemo sibi nomẽ Euangelij vendicauit, cùm omnes erant. Sed hæc quidẽ hæcenus. Diues igitur hæc virginis percontatio: diues interrogatio; longè ditior, quàm aliorum subita assensio aut credulitas. Fallitur ergo hæretica fex Sarcerij, Culmani, qui virginẽ aliquid animale sensisse, aut per ignorantiam peccasse, aut Dei verbo se pertinaciter opposuisse, aut humanæ sapientiæ argutiis innixam fuisse, plusq; sensui quàm Deo credidisse, blasphemè calumniantur. Nunquam enim virgo illud pulcherrimum Elizabethæ testimonium retulisset: *Beata quæ credidisti*: nunquam ab Angelo etiam, & ante & post tam sanctè compellata fuisset: nunquam gratia plena: nunquam

benedicta in mulieribus censeretur, si illi foedæ infidelitatis aliqua nota adhæsisset; præsertim tanta salutatione erectæ & confirmatæ. Nam si Abraham pater omnium credentium, infidelitatis crimen non incurrit, illudque Pauli testimonium retulit, illum credidisse Deo, & reputatum esse illi ad iustitiam; etiam si illud similiter de terra promissionis quæfierit: *Domine Deus vnde scire possum, quod eam terram impossibilem possessorus?* quantò minus virgo, ab omni infidelitatis labe est alienissima, quæ non contradicit, sed interrogat tantum? Quærit igitur beatissima virgo: *Quomodo fiet istud, quoniam virum non cognosco?* Vir enim meus Deus, quod vel tuipse nomine tuo præfers. Cui tam graui, tamque necessarij quæsitj, respondet Angelus, modumque explicat: Ne timeas virgo, tua tibi integra permanebunt; hanc domum sanctus sanctorum ingrediens, non spolia feret, sed magis egrediens integritate donabit: non matrem virginitas deseret: nouit ille seruare, non violare integra: clausa ingressus, clausa relinquet: nec syderi radius suam diminuit claritatem; nec virgini filius tuam auferet virginitatem: illustrat radius solis crystallum penetrans, non inficit. Nec suspectam habeas prudens virgo foecunditatem, quia non auferet virginitatē: grauida eris, sed non grauata: crescet potius tanto
partu

partu integritas corporis tui, quàm decreſcet: virginitasque tua augebitur potius, quàm minuetur. Qui enim diſrupta corporis mēbra in aliis poterat integrare tangendo; quantò magis in ſua matre quod inuenit integrum, non violabit naſcendo? Anguſtus tuus vterus ſuſtinebit, quod continent cæli: coniunctio hæc ſine ſordibus erit; vbi maritus ſermo erit, & vxor auricula. Lumen, quod intra te habebis, tenebras nullas, pondus nullum habebit: feres virum ſimul & filium: illius eris mater, cuius Deus eſt pater: filius paternæ charitatis, erit corona tuæ virginitatis: ſapientia paterni cordis, erit fructus vteri virginalis: virginitatem ſimul & fœcunditatem conſeruabis: paries, & vterum non aperies: concipies, & integra remanebis: educes infantem, & vterum ſignatum relinques: lac ſupeditabis, vbera tamen intacta conſeruabis: portabis puerū, pueri tamen patrem non agnoſces: mater efficiſis, quæ ſponſa non eris: nutries filium, & eius non inuenietur pater: ager fructum edet, & fructus carebit cultore: meſſis reddet, quæ ſemen non acceperat: curret fluuius, & fons, quacunque ex parte clauſus erit; vt perſpectum fiat te matrem factam eſſe, & tamen non eſſe paſſam ea, quæ mulieribus accidunt. Non enim ex viri voluntate, aut ex voluntate carnis, ſed ex Deo, quod concipies, naſcetur.

Arſit

Arfit quondam rubus, in quo Deus Moyſi apparuit; & viriditatem ſuam non amiſit: concipies & tu virgo, & virginitatem tuam non amittes. Gedeonis quando maduit vellus, tota area ſicca fuit: madente tota area, illud ſolum ſiccum erat. Quemadmodum enim oſtrea rorem recipiēs in interioribus ſuis, margaritam gemmam pretioſiſſimā generat: ita tu glorioſa virgo, Spiritu ſancto ſuperueniente filium Dei concipiens, Meſſiam pretioſam margaritam generabis. Omnes corruptæ pariunt: tu virgo; quin imò hac prole firmabitur, conſecrabitur, nobilitabitur, ditabitur, conſignabitur, tua ſancta virginitas: ſine omni tumultu, ſine violentia omni, porta hæc Regi patebit, & ſigilla eius non referabuntur. Aaronis virga arida ſine ſucco, in manu ſenis reſſoruit: & Deus non poterit ſine ſemine concipi in vtero virginis! Neque tamen aut aliqua ſuperna virtus, aut impotens natura, aut aliqua medica vis, hoc efficiet; ſed ipſe Deus: qui vt leges naturæ poſuit, atque præſcripſit; ita illis ipſe non ſubiicitur, illiſq; nullo modo teneri poteſt. Ne ſpectes in terram; totum hoc opus è cælis eſt. Cæleſtis erit partus, à cæleſti peragetur opifice. *Tabulas noſtræ naturæ*, inquit Nyſſenus, *quas culpa confregerat, denuò verus Legiſlator, de terra noſtra ſibi dolabit abſque concubitu, diuinitatis ſuæ corpus ſuſceptibile creans, quod digitus Dei*

Dei sculpet, id est, Spiritus sanctus veniens in te. Qui scripsit digito lapideas tabulas sine ferro, grauidabit te Spiritu sancto sine semine: qui produxit panē in eremo sine aratione, ipse imprægnabit te sine corruptione: qui percussit petrā in deserto, & fluxerunt aquæ, ipse educet nouam progeniem ex vtero tuo: qui fecit virgam sine humiditate germinare, ipse faciet te sine semine generare. paries, inquam, operatione diuina, seminatione superna, & aduentu Spiritus sancti. Quod opus etsi totius trinitatis sanctæ erit, in eo tamē primæ partes Spiritu sancto tribuentur; vt qui amor, & gratia sit; ab eo totū opus hoc, amoris & charitatis perficiatur. Dignum: utem erat, vt qui corruptam in Adam massam sanare venit; non de seminis corruptione, sed de potentia spiritus sancti nascatur. Illius, inquam, spiritus sancti, cuius obstetricante manu vniuersa hæc creatura producta constitit. Qui quidem spiritus sanctus, instar nubis cuiusdā rorantis, cælitus superueniet in te, id est, copiosior gratia illabetur in te: ac veluti arrē cuiusdā loco, accipies spiritum sanctū; & quam gratiam antea ad omne genus virtutis cōplendæ plenissimam accepisti; nunc ad hunc effectum, vt parias & grauida fias, copiosam gratiam, tum vt corpus tuum sanctificetur, tum vt salutarem foetum concipere possis, accipies. Nam quemad-

X

modum

modum vapor cæli virtute excitatus, congelatur in rorem, quo terra læta & fertilis redditur : ita purissimus beatæ virginis sanguis, spiritus sancti vi eleuatus fuit, & ex eo pretiosissimum Iesu Christi corpus formatum. Calor iste cælestis, non adurens est, sed foecundans : rosq; hic sanctus rorans de cælo, non conuellet, sed aperiet terram tuam, & germinabit saluatorē : *Dñus dabit benignitatem: & terra tua dabit fructum suū.* Si enim calor humorq; iste naturalis habet eam vim & facultatē, vt terram aperiat, seminaq; in vtero illius foecundet: quantò magis spiritus & calor hic diuinus & cælestis, spiritus, inquam, sanctus te faciet foecundam ? Et si spiritus æthereus in semine viri conclusus partum animat, conformat, & perficit : quantò magis spiritus altissimi omnia conformabit ? Neq; longo aliquo conamine & interuallo ; sed simul vt purissimum virginis sanguinē in vterum collegerit, illumq; attigerit, statim consolidabit, configurabit, perfectumque faciet hominem; ita, vt foemina perfectum circumdet virum, vt homo integer nascatur in ea, vt plenum hominem plenus accipiat Deus. Non tamen spiritus sancti tantum hoc erit opus, sed & ipsius patris, & filii etiam : *Virtus enim altissimi*, splendorque inaccessibilis, virtus illa, qua portat, & regit vniuersa, quæ operata est coram Pharaone in omnibus filiis Israël, ob-

ēl, *obumbrabit tibi*: hoc autem est, diuinā vis, tan-
 quam extensis alis vmbram tibi faciet, partesq; viri
 aget extendens pallium super te; iuxta illud Ruth:
Extende pallium tuū super ancillam tuā: ne immēsus ^{Ruth 3.}
 diuinitatis sol te adurat, ne uē à nimia opprimaris
 gloria téperabit, ne aciē mentis tuæ maiestas ob-
 tundat, atq; perstringat; nec irradiabit tibi, secun-
 dū plenitudinem suæ claritatis, sed velut vmbrā
 suo splendori faciens, exercebit in te effectum suæ
 potestatis. omnipotens Deus pater obumbrabit ti-
 ti: id est, suam potestatem immensam tuæ capacita-
 ti contemperabit, vt eius immensum lumen ferre
 queas: vt candidissimum lumen, inquit Bernardus,
 purissimumque fulgorem capias; eademque virtus
 cælestis, instar cuiusdam aquilæ, quæ te in conce-
 ptione tua ab omni labe peccati alis suis texit, om-
 nemque fomitem ex carne tua purissima sustulit, in
 omni vita custodiuit; nunc etiam in conceptio-
 ne, obumbrabit tibi, ne ab vilo prauæ cupidi-
 tatis ardore, à quo procul abes, aduraris: *Vmbra*,
item, inquit Athanasius, *& lineamenta faciet, vt vi-*
deas, quantum fieri potest, Deum in te habitantem.
 Hic enim est mons ille, quem obumbrantem vocat
 Abacuc, qui te teget, ac defendet: omnesque defe-
 ctus, qui partum consequuntur, ipse implebit: *Sca-* ^{Psal. 90.}
pulis suis obumbrabit tibi, & sub pennis eius sperabis.

id est, tutam te ab omni, vel naturæ, vel integritatis & pudoris læsione, conseruabit: ab omni item infamia & obrectatione, contradictioneque linguarum: obumbrabit, inquam, quia res nimirum in sacramento erit: & quod sola per se Trinitas in te sola, & cum sola, voluit operari; soli datū erit nosse, quatenus sibi totus tantum notus, habeatur & tibi. Ne igitur à me expectes virgo, quo modo, & qua ratione id spiritus sanctus, aut hæc ipsa virtus altissimi sit effectura, cum id solus tecum qui efficiet, cogniturus est; neque quisquam id nouerit, præter illum qui facit. Ineptè igitur, vt pleraque omnia, Philippus, eam virtutis altissimi obumbrationē ad necessarios pauores ac terrores conscientie peccati, à quibus nulla creatura libera est, refert. Quasi verò, hoc nuntium timoris & pauoris, & nō potius lætitiæ & gaudij sit: aut quasi in regno peccati, aliquē locum integritas virginalis habere possit. Sed apud istos nihil sanctū est, nihil incorruptum, nihil non inquinatū. Quo quidem loco, pulcherrimus modus & ratio nobis proponitur, quantisper arcana diuina sint perscrutanda; tantisper scilicet, vt ad voluntatem excelsi, & omnipotentem manum eius omnia referamus: quomodo autem & qua ratione quid faciat; ipsi soli scire, qui facit, relinquamus; cum vel ipsius naturæ opera non satis perspecta habeamus.

Pul-

Pulchrè D. Anselmus : *Sufficere nobis debet ad rationem voluntas Dei, licet non videamus, cur ita velit; voluntas namque Dei, nunquam est irrationabilis.* Cur Deus homo cap. 8.
 Quod igitur nunc de hac conceptione in vtero, respondet virgini Angelus; hoc idem & nos de ea transmutatione, quæ fit panis & vini in verum corpus, & sanguinem Iesu Christi, Sacramentariis tutissimè respondere possumus. Quærunt illi ex nobis, num credamus, verum corpus & sanguinem Christi sub speciebus panis & vini contineri; respondeamus, nos credere. Cur ita? Quia ipse dixit: *Hoc est corpus meum. Hic est sanguis meus.* Vrgent illi, quomodo id fiat? dicamus; Spiritus sanctus superuenit, & virtus altissimi obumbrat. Quærunt amplius, quomodo aut spiritus sanctus, aut virtus altissimi id efficiat? respondeamus, nos Angelicas metas, Angelicos terminos, transcendere non posse. Vtrobique autem esse verum Christum; utrobique eodem modo & eadē virtute esse & effici, tam in vtero, quam sub speciebus panis & vini, docent vetustissimi patres. In primis beatus Ignatius Episcopus & martyr; In epist. ad Romanos. cuius ardore sancto flagrantis illa vox est: *Panem Dei volo, panem cælestem, panem vitæ, qui est caro Iesu Christi filij Dei. Vinum, qui natus est in nouissimo ex semine David & Abrahæ.* Iustinus verò, & hic ipse martyr, palam affirmat, ad diuinum cibum, qui

In Apolog.
2. ad Antoni-
um Pium.

Eucharistia dicitur, iam olim admissos non esse alios, nisi hanc fidem profitentes, Christum, qui carnem & sanguinem è virgine pro nostra salute assumpsisset, eandem corporis veritatem nobis in Eucharistia donasse ac reliquisse. Vnde in suo Apologetico verbis disertis illud pronunciat: *Quemadmodum per verbum Dei, caro factus Iesus Christus servator noster, carnem & sanguinem pro salute nostra habuit; sic per verbum precationis & gratiarum actionis, sacramentum ab ipso alimoniam, ex qua caro nostra & sanguis aluntur, illius carnem & sanguinem didicimus esse.*

Lib. 5. contra
Valentin.
& li. 4. c. 34.

Neque aliter docet Irenæus, cuius ad hæreticos refellendos hæc est ratiocinatio, vt rem in pauca contraham. Si Christus verum & naturale corpus de virgine non assumpsit; falsò credimus nos Christi sanguine redimi; & in Eucharistia nos carne eius pasci & sanguine; cùm sanguis non dicatur, nisi qui naturalis est, & per humani corporis venas diffunditur. Et Hilarius simili vtitur ratiocinatione: *Si vere verbum caro factum est; & nos vere verbum carnem cibo dominico sumimus: si vere carnem corporis nostri Christus assumpsit; & verè homo ille, qui ex Maria fuit, Christus est; nosq; vere sub mysterio carnem corporis Christi sumimus, & per hoc vnum erimus, quia pater in eo est, & ille in nobis, etc.* Ambrosius

Lib. 9. de Tri-
nitate.

habet in hunc modum: *Nunquid naturæ usus præ-*

De iis qui
mysteriis ini-
tiantur ca. 9.

cessit:

cessit, cum Iesus dominus ex Maria nasceretur? si ordinem quærimus, viro mixta fœmina generare consuevit. Liquet igitur quod præter naturæ ordinem virgo genuit; & hoc quod conficimus, sacerdotes, corpus ex virgine est. Quid hîc quæris naturæ ordinem in Christi corpore, cum præter naturam sit ipse Dominus Iesus partus ex virgine? vera utique caro Christi, quæ crucifixa est, quæ sepulta est; vere ergo carnis illius sacramentum est. Ipse clamat Dominus Iesus: Hoc est corpus meum. Quid verò Augustinus? quam euidenter Christum, Christi quæ carnem de Maria susceptam, in Eucharistia tum manducandam, tum adorandam esse affirmat: Suscepit, inquit, de terra terram, quia caro de terra est, & de carne Mariæ carnem accepit. Et quia in ipsa carne hîc ambulauit; & ipsam carnem nobis manducandam ad salutem dedit: nemo autem illam carnem manducat, nisi prius adorauerit: inuentum est, quemadmodum adoretur tale scabellum pedum domini; ut non solum non peccemus adorando, sed peccemus non adorando. Ac alibi rursus: Totus erit apud patrem, quando venit in virginem; impleuit illam, nec recessit ab illo: Veniebat in carnem, ut cum homines manducarent; & manebat integer apud patrem, ut Angelos pasceret. Gregorii Nysseni oratio est: Huius corporis panem non aratio, non sacrificio, non agriculturæ opus effecit; sed terra intacta permansit;

In Psal. 98.

In sermo. de
verb. EuangIn lib. de vi-
ta Moyfi.

mansit; & tamen pane plena fuit: quo famescen-
 Lib. 6. in Le *tes, mysterium virginis perdocti, facile saturantur. Et*
 uit, cap. 22. *Gregorij Nazianzeni discipulus Hefychius: San-*

Ad Monimū
 lib. 2.

cta sanctorum, inquit, sunt propria Christi mysteria;
quia ipse est corpus, de quo Gabriel ad virginem di-
cebat, Spiritus sanctus superueniet in te, & virtus al-
tissimi obumbrabit tibi, ideo quod nascetur sanctum,
vocabitur filius Dei. Fulgentius item: Quando au-
tem conuenientius, quàm ad consecrandum sacrificium
corporis Christi sancta ecclesia, quæ corpus est Christi,
spiritus sancti deposcat aduentum? quæ ipsum caput su-
um secundum carnem de spiritu sancto nouerit natum.

Sermone 67

His Chrysologus consonat, qui succinctè quidem,
sed grauitè & scitè dixit: Ipse Christus est panis, qui
satus in virgine, fermentatus in carne, in passione con-
fectus, in fornace coctus sepulchri, in Ecclesiis condi-
tus, illatus altaribus, cælestem cibum quotidie fidelibus

Lib. 4. de fi-
 de orthodo-
 xa cap. 14.

subministrat. Concludit Damascenus: Corpus secun-
dum veritatem coniunctum est diuinitati, quod ex san-
cta virgine corpus est: non quod ipsum corpus assum-
ptum ex cælo descenderit; sed quod ipse panis & vi-
num transmutatur in corpus & sanguinem Dei. Si au-
tem modum requiris, quonam pacto fiat; sat sit tibi au-
dire, quoniam per spiritum sanctum, quemadmodum
ex sancta Deipara seipso, & in seipso dominus carnem
susceperat. Hæc illi. Addit Angelus: Ideoq; & quod
nasce-

nascetur ex te sanctum, vocabitur filius Dei. Corpus illud filij Dei benedictum, non cælitus afferetur, vt Eutyches, & Valentinus, ex veteribus; impuri Anabaptistæ, ex nostris sentiunt: non ex syderibus & elementis cõponetur, vt Apelles putauit: non ex ipsius diuinæ substantiæ parte cõdetur, vt Apollinaris opinatus est: non ex nihilo fiet, vt Manichæi asseruerunt; sed ex tuis purissimis sanguinibus, in te, & ex te nascetur. Quomodo enim ex radice Iesse promanaret: quomodo filius hominis esset: quomodo natus ex muliere: quomodo fructus ventris: quomodo seruus ex vtero: quomodo primogenitus mortuorũ: quomodo primitiæ dormientiũ: quomodo filius tuus: quomodo frater noster: quomodo ex terra ortus: quomodo os ex ossibus, caro ex carne nostra verè diceretur? Aut quomodo nõ esset vera calumnia, quã refert Cyrillus, Iuliani Apostatæ; qui i-
 deò negabat Christũ esse ex tribu Iuda, quòd nõ ex Ioseph, sed ex spiritu sancto eum natũ esse dicamus.

Lib. 8. contra Iulianum

Nascetur autẽ sanctum, id est, sanctũ erit natura, nõ cooptatione; quomodo primogenitũ, sanctũ veteris legis dicebatur. Refutantur ergo ex hoc loco Anabaptistæ, & qui illos in hac parte sequitur Calvinus, qui putant eos infantes, qui ex christianis parentibus nascuntur, sanctos & iustos nasci; & ideò ne baptis-
 mato quidem statim opus habere. Atqui non

Z

vident

vident id proprium filij Dei priuilegium fuisse: idque eam ob causam, quod non ex commistione viri, sed operatione spiritus sancti, atque virtutis altissimi obumbratione, natus esset. Quod Angelus ipse indicat. Vbi enim primùm dixit, spiritus sanctus superueniet in te, & virtus altissimi obumbrabit tibi; mox infert; ideò quod nascetur ex te, ab omni contagione peccati remotum, sanctum vocabitur.

Lib. 8. Mora
lium cap. 27.

D. verò Gregorius latius etiam hoc ipsum explicat: *Ad distinctionem nostræ sanctitatis, Iesus singulariter sanctus nasciturus asseritur. Nos quippè et si sancti efficiamur, non tamen nascimur, quia ipsa naturæ corruptibilis cognatione constringimur; ille autem solus veraciter sanctus est, qui ex coniunctione carnalis copulæ conceptus non est: qui non, sicut hæreticus desipit, alter in humanitate, alter in Deitate est; ut purus homo conceptus, atque editus; & post per meritum, ut Deus esset accepit: sed nunciante Angelo, & adueniente Spiritu sancto, mox verbum in utero, mox intra uterum verbum caro. Et Anselmus: Quoniam propagatio viri de sola virgine, ita non est naturalis aut voluntaria, sed mirabilis: sicut illa quæ mulierem protulit de solo viro, & sicut creatio viri de limo; palam est, quia nequaquam subiacet legibus & meritis illius propagationis. Quia & voluntas & natura quamvis discretè operentur; aliud enim ibi facit volun-*

voluntas, aliud natum; taliter tamen verus est homo: & Adam non de homine, & Iesus de sola muliere, & Eua de solo viro; sicut est verus homo, quilibet vir aut mulier, de viro & muliere. Omnis autem homo aut Adam est, aut de Adam est: sed Eua de solo Adam est, & omnes alii de Adam & Eua. Quoniam namque Maria, de qua sola est Iesus, de Adam & Eua est; non potest ipse de eisdem non esse. Sic namque expediebat, ut qui redempturus erat genus humanum, esset & nasceretur de patre & matre omnium. Ita isti proprium filij Dei priuilegium, qui ex virgine natus est, ad se, filiosq; suos impiè transferre non erubescunt: ita ad lumen Euangelii cæcutiunt: & cum illud se maximè sequi ac tueri putant, interea euerunt. Hoc, inquit, quod nascetur ex te sanctum; quod Isaias sanctum semen vocat. Attende quæso, Hom. 41 de B. virgine, quàm reuerenter dixerit: Quod nascetur ex te sanctum. inquit Bernardus: Ut quid enim tam simpliciter sanctum, & absque additamento? Credo, quod non habuit, quod proprie digneque nominaret; illud eximium, illud magnificum, illud reuerendum, quod de purissima videlicet virginis carne, cum sua anima unico patris erat unendum. Si diceret, sancta caro, vel sanctus homo, vel sanctus infans, quicquid tale poneret, parum sibi dixisse videretur. Posuit ergo indefinitè sanctum; quia quicquid illud sit, quod virgo genuit, san-

*Etum proculdubio, ac singulariter sanctum fuit, & per
 spiritus sanctificationem, & per verbi assumptionem.*
 Et Angelus quidem sic reuerenter. Nostri autem
 Ebionitæ quid? Pudet referre. Quod si Angelum
 in hoc tanto mysterio deficiunt verba, quid de no-
 bis dicemus? In diuinis mysteriis explicandis, crea-
 tura omnis muta, & infans est. *Vocabitur filius Dei.*
 Vt enim id, quod natura est ab æterno ex patre, tu-
 um dicetur; ita vicissim id, quod nascetur ex te se-
 cundum carnem, vocabitur filius Dei, propter, du-
 arum naturarum in vnam personam, hypostaticam con-
 iunctionem: cum ipsa persona filij Dei, vnam Iesu
 Christi, vt etiam est filius Mariæ, constituat perso-
 nam: & ideò, quod nascetur ex te sanctum, vocabi-
 tur filius Dei. Vocabitur etiam secundum carnem
 verè naturalis, & non adoptiuus filius. Adoptiuum
 enim repugnat naturali, non secundum diuinitatem
 tantum, sed etiam iuxta carnem, propter eam, quæ
 in vna persona, quam filiatio sequitur, facta est, vni-
 onem. Sic autem & quod natum est ex ipso patre,
 erit tuum: & quod nascetur ex te, erit eius; vt tamen
 non sint filij duo, sed vnus: & licet aliud quidem ex
 te, aliud ex illo sit; non tamen cuiusque suus, sed
 vnus vtriusque erit filius: tuque ^{θεοτοκος} mater Dei
 & hominis vocaberis, & eris, iuxta elogium Eliza-
 beth: *Unde hoc mihi, vt veniat mater Domini mei*
ad me

ad me? non quod diuinitatē genueris; sed quod diuinitas in tuo vtero inhabitauerit. Ex quo loco omnis Nestoriana prauitas refutatur, quę dicebat nudū hominem ex Maria natum, cui postea Deus ad Iordanem in baptismo adhæserit; in eoq; inhabitaerit, quam in hac parte xiiij. Canon Calcedonen. expressis verbis damnat. *Si quis non confitetur Deum esse veraciter Emmanuel; & propterea genitricem sanctam virginem matrem Dei, anathema esto.* Quamuis autem hoc tam insigne incarnationis opus toti sanctę attribuitur Trinitati, patre sanctificante, filio obumbrante, spiritu sancto fœcundante; peculiariter tamē attribuitur spiritui sancto, vel quod producendi, viuificandi, ac obstetricandi eius partes sunt, iuxta illud: *Spiritus Domini ferebatur super aquas.* Et illud: *Verbo Domini cæli firmati sunt, & spiritu oris eius omnis virtus eorum.* Vel quod hoc tantum beneficium summi & excellētis amoris est, spiritus autem sanctus amor est: *Sic enim Deus dilexit mundum, vt filium suum daret.* vel quod omne verbum per spiritum foras se prodit: *Eructauit cor meum verbum bonum.* vel quod Dei in carnem aduentus, primum ac summum donum est; spiritus autem sanctus donum vocatur. Vel quod tota sanctificationis virtus, penes spiritum sanctum peculiariter esse dicatur; ob eamque causam ipse spiritus

Psal. 32.

Ioan. 3.

Psal. 44.

Lib. 2. de
Spiritu S.

sanctus à sanctificando, teste Basilio, vocatus est. Conceptus tamen & natus de spiritu sancto dicitur; non quod spiritus sanctus fuerit virgini pro semine. Non enim de substantia spiritus sancti semen partus accepit; sed quia per gratiam Dei, & operationem spiritus sancti, de carne virginis est assumptum, quod verbo est unitum. Cuius rei rationem pulchrè ita explicat Ambrosius: *Quod ex aliquo est, aut ex substantia, aut ex potestate eius est. Ex substantia sicut filius, qui à patre vel ex patre, & spiritus sanctus, qui à patre & filio procedit. Ex potestate autem, sicut ex Deo omnia. Quomodo ergo in utero habuit Maria ex spiritu sancto? Si quasi ex substantia: ergo spiritus in carnem & ossa conuersus est. Non utique. Si verò quasi ex operatione, & potestate eius virgo concepit: quis neget spiritum sanctum dominicæ incarnationis autorem? Quanquam aut opera Dei nullis argumentis demonstrari possint: mos est tamen diuinæ scripturæ, ut similitudinibus quibusdam à rebus nobis notis desumptis, res difficiles illustret; atque hoc modo intellectus nostri curiositatem reprimat ac soletur. Hoc facit Angelus; remq; difficilem alia difficili verisimilem facit. Non quod virgo non credat; quæ eo nomine beata prædicatur, quod crediderit; sed ut dum miraculum miraculo redditur, inquit Bernardus, gaudium gaudio cumuletur. Ecce, inquit,*

inquit, *Elizabeth cognata tua*. Permiscebatur enim domus Iuda cum domo Leui, regia, inquam, cum sacerdotali, eò quòd summum regem & sacerdotē Christum dominum editura erat: & quòd Leui sorte hæreditaria inter tribus caruit; vt nullus metus esset, ne tribuum possessiones ac hæreditariæ sortes commiscerentur: cuius rei causa iussum fuerat, vt quisque in sua tribu vxorem duceret. Quod ita esse docet scriptura: *Nubant quibus volunt, tantū vt suæ* Numeri. 36. *tribus hominibus, ne commisceretur possessio filiorum Israhel de tribu in tribum. Omnes enim viri ducent vxores de tribu & cognatione sua, & cunctæ fœminæ de eadem tribu maritos accipient, vt hæreditas permaneat in familiis, nec sibi misceantur tribus, sed ita manent, vt à Domino separatæ sunt.* Vnde Gregorius De Christi Nazianzenus: *Querit aliquis, qualiter ad Dauid* genealogia. *Christus referatur, siquidem Maria de sanguine manauit Aaron, cuius cognatam Angelus Elizabeth asseruit. Sed hoc nutu superno contigit; vt regium genus sacerdotali stirpi iungeretur, vt Christus, qui rex est & sacerdos ab utrisq; secundum carnem nasceretur. Le-* Exodi 6. *gitur etiam in Exodo, quoniam Aaron, primus secundum legem sacerdos, duxit ex tribu Iuda coniugem Elizabeth filiam Aminadab. Et attende sacratissimam spiritus administrationē, dum & hanc Zachariæ coniugem statuit Elizabeth vocari, reducens nos ad illam*
Eliza-

Elizabeth, quam duxerit Aaron. Cuius cognationis rationem Cyrillum Ierosolymitanum, authorē grauiſſimum, & fide dignum, aliquando è patribus in Ephesine Synodo prodidiſſe aiunt: Emerentianam habuiſſe duas filias, Annam & Esmeriam; quarum Esmeria mater Elizabethæ fuit, Anna verò ipſius virginis Mariæ: vnde conſtaret, Mariam & Elizabetham, duarum ſororum filias fuiſſe, ob idque cognatas appellari. Quod ita eſſe, etiam Eccleſiam Ieroſolymitanam ſenſiſſe narrant; cui non difficile fuerit ab ipſa virgine Deipara, & vniuerſa familia, ea cognoscere, & poſteritati tradere: *Et ipſa*, inquit me nuntio, *concepit filium in ſenectute ſua.* Non te, inquit, moueat tempus, non ætas; nam ecce ea, quæ tecum viuit ſenex: non curſus naturæ; nam ea, quæ à ſterilitate nomen habet, anus deploratæ ſterilitatis: non conditio; nam cognata tua, eiſdem altiſſimi virtute concepit filium in ſenectute ſua, & filium non quemuis, ſed eum, qui, vt ipſe præibit ante faciem filij tui, parare vias eius; ita etiam eius natiuitas, filij tui natiuitatis erit prænuncia: *Et hic menſis eſt ſextus illi, quæ vocatur ſterilis.* Res eſt clara, ſextus iam menſis agitur, foetus moueri incipit. Ac in ſumma ſcias virgo me hæc, quæ promitto, nõ de mea, ſed de illius qui me miſit, virtute præſumentem dicere, dixi quod accepi, quod audiui; nec vllum

Ium mandatum habeo, ut dicam quomodo id futurum sit; sed futurum tantum prædico: *Non erit impossibile apud Deum omne verbum*: siue pro re, siue promissionis loco sumatur, inquit Basilii, Tota ratio facti erit potentia facientis: dictum factum est apud Deum. Vox virtutis hæc est, quam iterum atque iterum iam in scriptura legimus: *Nunquid Deo quicquam est difficile? Nunquid mihi difficile siue impossibile erit omne verbum?* Nam quæ apud homines impossibilia sunt, possibilia sunt apud Deum. Non dicit autem omnem rem non esse impossibile, aut omne factum, sed omne verbum. quia quàm facile possunt homines loqui quod volunt, etiã quod nullatenus facere possunt; tam facile, imò incomparabiliter facilius, valet Deus opere implere; quicquid illi valent verbo exprimere. Dicam apertius: si hominibus tam facile esset facere quàm dicere, quod volunt; & ipsis quoque non esset impossibile omne verbum. Nunc autem quoniam vulgaris, & verus sermo est, multum interesse inter loqui & facere; sed apud homines, non apud Deum: soli Deo quia idem est facere, quod loqui, idem loqui quod velle, meritò non erit impossibile apud Deum omne verbum. Siquidem apud Deum nec verbum disfidet ab intentione, quia veritas est, nec factum à verbo, quia virtus est, nec modus à facto, quia fas-

piencia est ; ac per hoc non erit impossibile apud Deum omne verbum. Quæ utinam huius seculi Euangelici expenderent, non profectò laboraremus.

Audisti igitur virgo factum, audisti & modum, vtrunque mirum, vtrunque incredibile, vtrumq; salutare : *Iucundare filia Sion, & exulta satis filia Ierusalem* : & quoniam auditui tuo datum est gaudium & lætitia, audiamus & nos à te responsum, salutis & lætitia. Expectat Angelus responsum, tempus enim est ut reuertatur ad Deum, qui misit eum; confectus est apparatus legationis, confecta legatio, effectus legationis desideratur. Nihil iam deerat ad tantum totque seculis apparatus opus, quàm ut virgo consentiret. Neque enim ille quemquam cogit; qui omnes liberos creauit; & ad eandem libertatem sempiterna manumissione sua recreauit. Credibile est equidem, tunc Adam & Euam, vniuersamque patriarcharum, prophetarum, ac omnium sanctorum manum, animo in virginem conuerso obstupuisse; ac quid tandem in tam inusitata re dictura facturaque esset, animis suspensis expectasse; sed & Angelos, atque adeò illum ipsum, qui hominem liberum esse voluit, cordium imperatorem Deum, credibile est omnes vno voto, illud ipsum à virgine expetiisse. Responde ô beatissima mulier verbum, & suscipe verbum; profer tuum, & concipe diui.

diuinum; emitte transitorium, amplectere sempiternum. Expectamus & nos, ô domina, verbum miserationis, quos miserabiliter premit sententia damnationis. Et ecce offertur tibi pretium salutis nostræ, statim liberabimur si consentis: in sempiterno Dei verbo facti sumus omnes; & ecce morimur; in tuo breui responso reficiendi, vt ad vitam reuocemur: nec immeritò, quando ex ore tuo pendet mœstorum consolatio: miserorum redemptio: captiuorum liberatio: salus denique vniuersorum filiorû Adam, totius generis tui. Da virgo responsum festinanter, ô domina: responde verbum, quod terra, & inferi, quod expectant & superi; ipse quoque rex omnium, & Dominus, quantum concupiuit decorem tuum, tantum desiderat & responsionis assensum, in quo nimirum proposuit saluare mundû. Et cui placuisti in silentio, iam magis placebis ex verbo, cùm ipse tibi clamet è cælo. Credibile est igitur, virginem genibus flexis, ac manibus compositis, magna animi submissione dixisse: *Ecce ancilla Domini fiat mihi*, de verbo, *secundum verbum tuum*. Tabula ego sum, scribæ velociter scribentis: quod illi placet, mihi inscribat. Benedictus qui venit in nomine Domini. Orsa fuit virgo à voce castitatis: *Quomodo fiet istud?* desinit in verbum obedientiæ & humilitatis: *Ecce, inquit, ancilla*

la, ad obediendum facilis, ad seruiendum parata, ad suscipiendum prompta. Quem submissum assensum mirificè iam ante expressit Sibylla :

Hinc ut lætificis mens est recreata loquelis :

Erubuit malas ridens puerile venustas.

Læticia dulciq; animum demulsa pudore

Tunc ad se rediit, verbumq; volauit in aluum.

Idq; suo factum, atque animatum tempore corpus :

Mortali facie cretum est, puer inde creatus

Virgineo partu ; mira est mortalibus hæc res,

Sed res nulla Deo patri natoq; stupenda.

Simile quid respondit familiæ Dauid in vxorē eius

asciscenda Abigail: *Ecce famula tua sit in ancillam,*

ut lauet pedes seruorum domini mei. Et Isaias: *Ecce*

ego, inquit, Domine, mitte me. Et Samuel: *Ecce*

ego. Ecce ancilla Domini, fiat mihi secundum verbum tuum. Non est, inquit, meum, quæ serua & an-

cilla sum, arcana & secreta summi parentis perscru-

tari: non est meum id velle nosse, quod ille solus

nouit; ancilla eius sum, fiat mecum quod vult: non

meæ neque Iosephi, sed eius sum potestatis; illum

iubere; me iussa capeßere fas est. O fides Deo ac-

cepta: ô humilitas grata: ô obedientia omni sacri-

ficio iucundius Deo oblata! Quid ergo quod veni-

entis Dei, oculos offenderet, in illa poterat reside-

re; in qua tantarum virtutum insignia, veniens in-

uenit:

1. Reg. 25.

Isaïæ 6.

1. Reg. 3.

uenit redolere? Rara virtus, honorata humilitas: ancillam se dicit, quæ mater eligitur. *Ita pro inobedientia obedientia commutatur*, inquit Augustinus, *Et fides pro perfidia compensatur*. Superba Eua dum Dea esse vult, serua facta est: hæc dum se ancillam humiliter proficitur, Dei mater facta est: ideò humilis Eua, facta est superbæ Euæ adiocata: & sicut Eua inobediens, facta est sibi & vniuerso generi humano causa mortis; sic Maria obediens, facta est sibi & vniuerso generi humano causa salutis. Discamus & nos nostra omnia Dei voluntati subiicere; neq; in arcanis & mirabilibus eius curiosi esse. Nam si coram rege, non vult nos sapiens sapientes videri velle; quantò magis coram Deo, apud quem omnis nostra sapientia stulticia est? *Ecce*, inquit, *ancilla Domini, fiat mihi secundum verbum tuum. Beata quæ credidisti, quia perfectæ sunt in te, quæ prædictæ sunt tibi*. Dum enim fidem das humiliter, cæli in te opificem recipis. Tunc enim subito, contra quàm putant Centuriatores, filius Dei, ex sinu patris descendit in sinum virginis; non locum mutando, sed præsentiam suam per carnem exhibendo. Nam & radius solis, solem nunquam deserit; & tamen per fenestras domû ingreditur: tunc diuina humanis, cælestia terrenis, sublimia humilibus sunt iuncta: multa fiunt secundum naturam, supra natura-

Trenæus li. 2.
ca. 11. aduersus
Valentin.

turam plura ; tunc cælestis imber, virginum in vel-
 lus placido lapsu se infudit, & tota diuinitatis vnda
 bibulo se nostræ carnis celauit in vellere, donec per
 patibulum crucis expressa, terris omnibus salutis
 pluuiam infunderet : tunc æterni patris sapientia,
 quæ ab initio possedit, quæ ab æterno ordinata est ;
 quæ antequam essent abyssi, concepta est ; secundò,
 in tempore, in ea quam accipit carne, concipitur :
 tunc manu omnipotentis Dei, natura nostra pro-
 lapsa, apprehensa est : tunc cælestis Iob, testam cor-
 poris nostri accepit ; qua sordes naturæ nostræ de-
 tergeret : tunc natus est regi Dauid, refert traditio
 hebraica, verus Selomo, ad curam & medicinam
 peccatorum eius : tunc Deus sanctus & benedictus,
 dicunt Rabini, factus est Israël consanguineus &
 cognatus : tunc quasi super fratre suo & proximo
 suo complacuit in nobis : tunc seruilia membra, pro
 seruis sumpsit Dominus : tunc se ille ipse, qui sem-
 per liber est, in nostris ligari passus est : tunc cuius
 cælum sedes est, apprehendit scabellum pedum su-
 orum : tunc descendit de cælo filius hominis, qui
 est in cælo ; descendit primò, vt exponit D. Tho-
 mas, ratione diuinæ naturæ ; non quòd diuina na-
 tura in cælo esse desierit, sed quia in infimis nouo
 modo esse incepit : deinde ratione corporis ; non
 quòd ipsum corpus Christi secundum suam substan-
 tiam

In Midras
 Tehilim.

tiam de cælo descenderit ; sed quòd virtute cælesti,
 id est , spiritu sancto est eius corpus formatum : *Et*
verbum caro factum est, & habitauit in nobis, & vi-
dimus gloriam eius. Cuius rei rationem doctè expli-
 cat Damascenus : *Post consensum* , inquit , *sanctæ* Lib. 3 ortho
virginis, spiritus sanctus superuenit in eam, emundans do. fidei c. 2.
eam, & virtutem ad suscipiendam verbi diuinitatem
simulq; ad generandum præbens ; & tunc obumbravit
ei Dei altissimi in sua subsistens hypostasi, sapientia &
virtus, filius Dei patris consubstantialis, veluti diui-
num semen ; & construxit sibiipsi ex castis & purissi-
mis eius sanguinibus carnem animatam, anima, ratione
ac mente prædita, primitias nostræ consperfusionis ; non
seminatam, sed creatam per spiritum sanctum ; non
paulatim per additamenta completa figura, sed statim
absoluta, quod ipsum Dei verbum hypostasis carni fa-
ctum esset. Non enim ei, quæ secundum seipsam ante
subsisteret, unitus est Deus verbum ; sed in sua hypo-
stasi ingressus tanquam habitaculum ; non circumscri-
pto modo sanctæ virginis uterum, carnem sibi anima-
tam, vt ante dictum est, condidit ; vt simul sit caro, si-
mul Dei verbi caro, simul caro animata, ratione ac
mente prædita. Quamobrem non hominem deificatum
dicimus, sed Deum hominem factum. Nam qui est,
natura perfectus Deus, factus est idem perfectus ho-
mo ; non mutata natura sua, neque simulata rerum
actione

actione, sed ei, quam è sancta virgine àsumpsit; & ad ipsam essentiam perduxit carni unitus secundum hypostasim, sine confusione, immutatione, ac diuisione. Non transmutans suæ ipsius deitatis naturam in carnis substantiam, neque certè carnis suæ substantiam, in suæ deitatis naturam; neque ex diuina suipsius natura, & ea quam assumpsit humana, unam naturam perfecit compositam. Et alio loco: Totum me totus assumpsit; & totus toti unitus est, toti salutem largiatur. Nam quod non assumitur, id sanari non potest. Unitum igitur est carni, mentis medio, verbum Dei, quæ medium obtinet, inter Dei puritatem, & carnis crassitiem. Principatum enim animæ & carnis mens tenet; cum sit pars animæ purissima; mentis verò Deus: & quando à præstantiore occupatur, ibi mens proprium Christi regimen exhibet; cedit autem paratq; præstantiori, & ea operatur, quæ diuina voluntas iusserit. Et paulò post: In nouissimis autem diebus, non discedens è sinu patris verbum, non circumscripto modo inhabitauit in utero sanctæ virginis αὐτοῦς ὡς ἀπερίληπτος, hoc est, ita, vt neque seminatum sit, neq; ratio eius rei comprehendere queat, eo videlicet modo, quem ille scit, & in ipsa plusquam æterna sua hypostasi ex sancta virgine suscepit carnem. In omnibus igitur & super omnia erit, etiam cum in utero sanctæ Dei-paræ fuisset, sed in ipsa per incarnationis operationem.

Incar-

Lib. 3. ortho-
doxæ fidei
cap. 6.

I. lib. 2. ortho-
do. fidei c. 7.

Incarnatus ergo, eandem fecit carni hypostasim, quæ est Dei verbi hypostasis; ut composita fieret, quæ prius erat simplex verbi hypostasis: composita verò ex duabus perfectis naturis, diuina scilicet & humana: atque ut ipsa ferat, non tantum diuini Dei verbi filiati-
onis characteristicam, & discretiuam proprietatem, per quam à patre & spiritu sancto discernitur; verum etiam carnis characteristicas & discretiuas proprieta-
tes, per quas à matre & aliis hominibus differt: simul-
que ut ferat, tam diuinæ naturæ proprietates, per quas vnitur patri & spiritui; quàm humanæ naturæ noti-
ones, per quas vnitur matri & nobis: præterea dif-
ferret non tantum à patre & spiritu, sed etiam à matre & nobis; eò quòd idem sit Deus & homo simul. Hanc
enim proprietatem hypostaseos, Christi maxime propri-
am esse cognoscimus. Enimuerò confitemur eum esse
vnum filium Dei, etiam post humanæ naturæ assump-
tionem: & filium Dei eundem, vnum Christum, v-
num Dominum, vnicum illum vnigenitum filium, &
verbum Dei, Iesum Dominum nostrum: veneramur-
que duas eius natiuitates; vnā ex patre ante secula,
quæ causam, rationem, tempus, & natiuitatem supe-
rat; & alteram, quæ nouissimis temporibus facta est
propter nos, secundum nos, & supra nos. Propter nos,
quia propter nostram salutem: secundum nos, quia na-
tus est ex muliere, legitimoque partus tempore: supra nos,

Bb

quia

In Lucam.

quia non ex semine, sed de spiritu sancto, & ex virgine sancta, supraq; legem partus. Vbi, quæ, & quanta miracula concurrant, vide. Miraculum est, ad talem tantumque foetum formandum, viri omnem operam excludi; & per talem legationem, virginisque consensum, virgineum duntaxat vterum adhiberi. Noli moneri virgo, inquit Ambrosius, nuntio festinanter responde verbum, & suscipe filium; da fidem, & senti virtutem: Ecce, inquit, ancilla domini, fiat mihi secundum verbum tuum. Nec mora, reuertitur nuntius, & virginali thalamum ingreditur Christus. Efficitur subito prægnans beata Dei genitrix: & cuncta per secula prædicatur felix: concepit mox diuinitatem verbi, virilis ignara consortij. Miraculum item est, tantum de purissimo virginis sanguine transferri & coagulari, in masculumque formari, quantum ad generationem hominis sufficiebat: Nuntiante enim Angelo, inquit Gregorius, & adueniente spiritu, mox verbum in vtero, mox intra vterum verbum caro; & manente incommutabili essentia, quæ ei est cum patre & cum sancto spiritu coæterna; assumpsit intra virginea viscera, vnde & impassibilis pati, & immortalis mori, & æternus ante secula, temporalis posset esse in fine seculorum: ut per ineffabile sacramentum conceptu sancto, & partu inuiolabili, secundum veritatem, vtriusque naturæ eadem virgo, & ancilla Domini esset
& ma-

Lib. 18. Mora
 lium cap. 27.

Et mater. Miraculum & illud est consuetum dierum numerum, qui ad formandum hominis corpus desideratur, non expectari; ut & semen ad figuram corporis aptetur, & anima in corpus ipsum influat: sed eodem plane momento, & sine successione temporis, corpulentam substantiam à virginis corpore diuidi, formari, simul & animari, vegetandi, sentiendi, & intelligendi vires omnes pariter adesse; & ad suas functiones, in ipso corpore, rationali anima, iam perfecte informato, exercendas conspirare: *Verissime enim, et absq; vlla ambiguitate dicitur, inquit Lom* 2. distinct.
bardus, quia ex quo Deus hominem assumpsit, simul sibi uniuit animam & carnem: nec caro prius fuit concepta, & post modum assumpta; sed in conceptione assumpta, & in assumptione concepta. Quando Angelus istam virginem salutauit, tunc eam spiritus sanctus fecundauit; tunc illa foemina virum sine viro concepit; tunc est repleta gratia; tunc dominum suscepit, ut esset in ea, qui fecerat eam. Neque enim illa expositio Theophylacti, exponentis illud, obumbrabit tibi, placet: Quemadmodum pictor, primum opus delineat & adumbrat, deinde perfectis coloribus illustrat; sic & ipse Dominus, sibi ipsi corpus fabricans, ac hominis imaginem effingens, primum in utero virginis obumbravit, deinde paulatim per partes formauit: Simul enim & semel totum foemina comprehendit virum, vel

Lib. 1. ad Eu-
geniū de cō-
sideratione.

propter infinitam virtutem spiritus sancti, cuius ob-
stetricante manu tantus partus conceptus est; vel
quod non decuit Deum assumere aliquid imper-
fectum. Miraculum est, dum anima corpori iungi-
tur, eodem momento diuinitatem homini in vnam
personam vniri, ac verbum æternum se carni inse-
parabiliter sociare: vt idem Dei & hominis filius in
virgineo vtero constitueretur. Itaq; præclare Ber-
nardus Mariam virginem Euangelicæ illi mulieri
comparat, quæ tres mensuras farinæ, siue vt no-
ster legit interpres, tria fata, modicè addito fermento
commiscuit, atque contemperauit; vt tota de-
inde conspersio, in vnum simul corpus conflatur
atque vniatur. Etenim hæc præstantis fidei suæ fer-
mento, id quod alius nemo potuit, perfecit; vt in
suo vtero tres naturæ, verbum, anima, & caro, per-
inde ac tria fata, in vnitatem personæ Christi con-
iungerentur, & coniunctæ non diuellerentur. Mi-
raculum item illud est, Mariæ filiū inde ab ipsa con-
ceptione, tanta cumulari gratia, vt anima eius cum
Angelis Dei essentiam clarissimè intueri, ac Dei
gloria beatissimè perfrui posset. Miraculum deniq;
est, eiusdem animam ab initio vnde quaque perfe-
ctam, & summis Dei donis refertam fuisse; vt non
solum omnes thesauri scientiæ & sapientiæ Dei il-
lic recondiderentur; sed etiam, vt simul atque verbū
caro

caro factum est, mox plenitudo diuinitatis in homine Christo corporaliter inhabitaret: *Factus est primus Adam in animam viuentem; nouissimus Adam in spiritum viuificantem*, dixit Paulus. Si Adam terrenus, quamprimùm ei Deus spiraculū vitæ inspirauit, magnā vim intelligendi subitò consequutus est: quantò vberius Adam cælestis, omnes sapientiæ ac scientiæ thesauros in se recepit, quamprimū in vtero virginali cōceptus est. Fœmina statim circumdedit virum, virum sapientia, non ætate: animi vigore non viribus corporis: maturitate sensuum, non corpulentia membrorum. A principio ille perfectus fuit, à principio plenus spiritu sapientiæ & intellectus; contra quàm sensit rerum profanator omniū Lutherus, plenus omnibus tam corporis, quàm animæ gratiis ac dotibus; sapientia item atq; scientia, tam ea quæ beatorum est, & quæ ex præsentī diuina visione oritur, quàm ea quæ infusa dicitur, quæ ab illa prima solo modo in Christo fuit distincta. Illa enim formarum & exemplarium est, hæc effectuum ipsorum. Vtraque à prima suæ conceptionis hora, cū propter hypostaticam vnionem, tum propter plenitudinem gratiæ ac vnctionis, Christus prædictus fuit. Nam creuisse dicitur, non secundum quod erat, sed secundum quod apparebat; non quod aliquid è nouo accederet, quod antea non haberet;

Serm. 4. cō-
tra Arianos.

In laudem
Basilij Magni

Athanasius
ibidem.

sed quod accedere videretur, quando volebat ut videretur: *Quanto magis*, inquit Athanasius, *diuinitas Christi reuelabatur, tanto plenius gratia crescebat, ut hominis apud homines. Infantulus enim gestabatur, puer autem factus remansit in templo, sacerdotesq; interrogauit de lege: paulatim autem corpore adolescente, verboq; seipsum in corpore manifestante, factum est deinde, ut agnosceretur pro filio Dei. Et Nazianzenus similiter: Christus ut ætate, ita & sapientia, & gratia proficiebat; non quod hæc incrementum caperent: quid enim eo, quod à principio perfectum est, perfectius esse possit? sed quod paulatim patefierent, et elucerent. Hominum est proficere: filius autem Dei quandoquidem non habebat, quo proficeret; utpotè perfectè existens in suo patre, humiliavit seipsum pro nobis, ut in illius humilitate, nos magis ac magis cresceremus. Acquirebat ille nihil ex nostris, præter infirmitates ac calamitates nostras, quibus illum circumdari oportuit: eaque sola sapientia crescebat, quam ex usu & experientia miseriarum nostrarum comparabat. Negat hæc omnia Sacramentarius, Zuinglius, Brentius, Calvinus, Bucerus: sed quid mirum, si ipsi adulto Iesu Christo notam ignorantia, inurere non verentur cum Photino atq; Agnoitis. Talia ergo & tanta miracula facta sunt, cum susciperet Dñus cœnum nostrū. *Artificum enim op-*
*timis,**

timi, dicebat Theophilus in Ephesiâ Sinodo, non in pretiosis tantum materiebus artem ostēdentes, in admiratione sunt; sed vilissimum lutum & terram dissolutam plerunque asumentes, suæ disciplinæ demonstrantes virtutem, multo magis laudantur: ita omnium optimus artifex Dei verbum, non aliquam pretiosam materiā corporis cælestis apprehendens, ad nos aduenit: in luto magnitudinem artis suæ ostendit. In qua tam admirabili incarnatione, eiusque denunciatione, ea quæ summa sunt inclinantur: Angelus virginem salutat: virgo consentit: Deus homo fit. Quam triplicem inclinationem; triplici in die pulsu, prouocans nos ad gratiarum actiones, repræsentat Ecclesia; matutino, inquam, & eo qui fit in meridie, ac vespertino: quæ omnia nunc hæresis irridet, & contemnit. Non facit hæc Mahometanus, qui in suo Alchorano, eas Angelorū de Maria voces recitat: O Maria. cunctis viris fæminisq; præclarior, soli Deo perseueranter studens. Et alio loco: O Maria, Deus annunciauit tibi verbū ex ipso, nomē eius Iesus filius Mariæ, & erit honorabilis in hoc seculo & in futuro. Mahometis certē ipsius illa vox est: E viris multi perfecti fuerunt: nulla autem ex mulieribus vnquam perfecta fuit, nisi Maria mater Iesu. Verūm hæc alterius sint loci & temporis. Inclinemus nos corda & capita nostra Deo, scientes quia propter nos, & propter nostrā salutem descen-

In cap. 5. &
 74. Alchorani.

In historia re-
gis Stephani

descendit de cælis, & incarnatus est de spiritu san-
cto, natus ex Maria virgine, & homo factus est: cru-
cifixus etiam pro nobis sub Pontio Pilato, passus, &
sepultus est: gratiasq; illi agamus, quòd nō dereli-
quit nos vsq; in finem, sed recordatus est figmenti
manuum suarum. Matremq; eius, vas sanctissimū,
omniq; laude dignissimum, honoremus. Tuq; in-
primis rex Stephane D. Stephanum regem ac po-
pularem tuum imitare, regnumq; tuum virgini san-
ctæ, vt ille iam iamq; moriturus fecit, verbis eius
commenda: *Regina cæli, mundi inclita repatrix,
tuo patrocinio sanctam Ecclesiam, cum Clero & Epi-
scopis, regnumq; cū Primatibus & populo, tuis precibus
commendo; quibus ego nunc vltimum valedicens, ani-
mam quoq; meā tuis manibus committo.* Hæc est enim
illa virgo: quā gens tua apprimè semper coluit; pa-
tronamq; suam esse voluit: quam in auro monetaq;
sua impressit: cuius olim familia, parsq; hæreditatis
regnum Hungariæ dicebatur. Quod quamdiu san-
ctè ac religiosè faciebant; Aper ille de silua den-
te suo, eos attingere nunquam potuit. Nos autem
alij ita eam Athanasii verbis compellemus: *Et iam
scilicet audi filia Davidis & Abraham, & inclina au-
rem tuam in preces nostras, & ne obliuiscaris populi
tui, neque nostri, qui sumus de familia & domo patris
tui. Parentes enim tui sumus, secundum generis pro-
sapia-*

De sanctissi-
ma Deipara.

Sapientiamque rationem; nostramque filia es, quia ex nobis genita es: decet enim, te matrem, regeneratricem, dominam, ac heram nostram cognominemus, eò quòd ex te prodit rex, Dominus ac Deus noster: assistentem illi, nobis quidem terribili; tibi autem dulci, omnemque gratiam largienti, qua de causa factum est, ut gratia plena appellata sis; utpotè quæ omni gratia abundares, idque per superuentum in te spiritus sancti. Ideoque vultum tuum deprecantur omnes diuites plebis, ditati scilicet istiusmodi bonis, & spiritualibus contemplationibus. Ad te clamamus, recordare nostri sanctissima Virgo, quæ etiam à partu virgo permansisti, & retribue nobis, pro exiguis istis eloquiis, magna dona ex diuitiis tuarum gratiarum, tu quæ gratia plena es. Nam ideo his vocibus, ut ex re ipsa desumptis, & natura laudatoriis, præcipue in tuum encomium utimur, si quando hymnus, si quando laus tibi, siue à nobis, siue ab vniuersa creatura offertur. Nazianzeni item:

*In Christo
patiente.*

*At tu, quod precor, summum, id mihi
Concede, vita sic ut excedam, illius
Ut tantum habens te præsidem semper, velut
Ingentem opum vim, te tuum erga filium
Mibi patronam sentiam acceptissimam.
Ne me ergo tradi tu sinas, tanquam ad crucem,
Ludibrioque illius exponi, omnium
Iunatus hostis qui sit, & mortalium*

*Pestis : tuere me, atque ab æterno affere
 Igne, & tenebris : per fidem , qua iustior
 Sum factus, & per gratiam tuam inclytam,
 Qua nuppiam vlla notior nobis fuit.
 Hoc propter, ecce texo nunc tibi memor
 Gnatumq; carmen , ô puella gratia
 Equanda nullis, mater & virgo, supra
 Omnes deorum virgines & maxima :
 Quæ vincis omnes cælitum ordines ,
 Regina, domina, generis humani bonum :
 Amica semper esto tu mortalibus ;
 Maximâque quouis in loco mihi salus.*

August. tom.
 10. ferm. 2.
 de Annun-
 ciatione.

Cum Augustino item : O Maria : quis tibi dignè
 valeat iura gratiarum, & laudum præconia impende-
 re, quæ singulari tuo assensu mundo succurristi perdi-
 to ? quas tibi laudes fragilitas humani generis, per-
 soluat, quæ solo tuo commercio recuperandi aditum
 inuenit ? Ita mihi assensum istum appone illi, qua Eva
 serpenti consensit in perniciem nostram. Et sic quidem
 virginem matrem honoremus, illud cum magno
 Gregorio profitentes : Mariam sic à nobis coli, ut
 eam pro Dei ancilla, & matre habeamus : ancillam
 quidem, quia verbo æterno, ut nemo alius, ministra-
 vit : matrem verò, quod æqualis patri filius, in vir-
 gineis visceribus eius, à spiritu sancto, & materna
 eius carne, homo factus sit atque procreatus.

Cæle.

Cælestem autem parentem petamus, vt quemad-
modum illa, mente & corpore verbum concepit
Dei; nos mente & animo nostro, dignè concipere
ita illud mereamur; vt tandē læti & alacres eius
natalem, confecta incarnationis memoria,
celebrare possimus. Cui sit laus,
& gloria in secula.
Amen.

Ora pro nobis sancta Dei
genitrix; vt digni efficia-
mur promissionibus Christi.

M. ANDREAE SCHONEI

ODA

MAGNAE MATRI VIRGINI

Pro Sarmatia.

O *Diua cælis altior omnibus,
Parens supremi Numinis, æthere
Ex alto, ab ipso Spiritu almo
Plena, thoro sine coniugali.*

*Te Graia tellus, te Latium potens
Laudauit odis dulcibus, oreque
Semper rotundo: te reperta
Nuper & India, iam secundam*

*Deo celebrat, numen & omnibus
Tuum in periclis inuocat. Accipe
Ergò quoque à Septentrione
Hoc gelido, Boreaqué, & Arcto*

*Rigente, laudes ore humili datas
Pauenteque; hostesque undique nos fera
Duraque cingentes corona:
Inque tuam sobolem parantes*

Vin-

*Vinclâ, arma, mortes, exilia ultima,
Dextra potenti, comprime, sterneque;
Vt sentiant quid possit, intrâ
Viscera sancta Deum tulisse.*

*Hic christianis terminus ultimus
Limesque stat; nos præsidium ferè
Solùm impias contrâ cohortes,
Barbariemque sumus ferocem.*

*Deiecta propugnacula Lechidùm,
Vnâ in ruinam deijcient grauem,
Arces potentes, regnâque ampla,
Spesque, animosque virùm superbos.*

*Has ergò semper respice lumine
Terras benigno: sis bona Sarmatis
Patrona: postque istos tumultus,
Faustam oleæ foliis decoram*

*Pacem reduc: quam si dederis, dabis
Cuncta; vnâ nobis, aurea pax, salus:
Ne fortè secum præliantes,
Christiadas dirimat Tyrannus*

*Externus, ac vi, proh dolor, occupet;
Ut nuper aureæ Pannoniæ accidit.*

*Fac, quod facit mater benigna :
Progeniem illa minus venustam*

*Atque ægriorem, plus alijs amat
Curatque. Scis nos esse opis indigos :
Scis hostium vires, minasque,
Armaque, telaque, semper in nos*

*Intenta. Moscus, Turca, Geta en propè.
Sic ægrum & afflictum SOCOLOVII,
Qui sauciùs pugnat feritque
Fortius, atque alij valentes ;*

*Novamque suplex nunc tabulam tuis
Suspendit aris ; tange manu caput
Fausta : ac dolorem pertinacem
Indomitumque leua vel aufer.*

Laus Christo incarnato.



